

# Wam Korĩt

## Pawre kot Korĩt kãm Jejus kôt hkwỳjê hwỳr kagà nê mênh

Pawre na pre kagàja nhĩpêx. Jejus nhỹ hã kapêr jarênh o pa xwỳnhjê hõ na pre. Na pre hipêx nê ma krĩ pê Korĩt kãm Jejus krajê hwỳr kumê. Nê kagàja kamã mẽ kãm tanhmã mẽmoj tã karõ hto. Na pre mẽ kot àhpumunh tỳx ã amnhĩ to jarkrar o pa nê mẽ kãm kapêr. Nê tanhmã amnhĩ tomnuj to nê mẽ kãm kapêr. Nê mẽ hprõ nê mẽ mjên xwỳnhjaja tanhmã wa kot axpên nhĩpêx to hã mẽ kãm karõ. Nê mẽ kot Tĩrtũm mã mex o mex ã harênh kaxyw axpên wỳr mẽ pikuprõnh nê tanhmã amnhĩ nhĩpêx to hã nhũm mẽ kãm karõ. ã na pre Pawre mẽ kãm mẽmoj tã karõ nê hã kagà anê. Nê mẽ kãm:

---

**1** 1Pa Korĩt kãm Jejus kôt ixkwỳjaja. Xà mẽ amex? Ot pa mẽ awỳr kagàja nhĩpêx nê kumê. Ixpê Pawre na pa Kris kôt mẽ pahtõ Sostenes mẽ wa awỳr ixpêr mẽ. Tã kagàja nhĩpêx nê mẽ awỳr kumê. Tĩrtũm na pre ixte Jejus Kris nhỹ hã mẽ ajahkre ho ri ixpa kaxyw ixãm. 2Tã ot pa mẽ awỳr kagà nhĩpêx nê mênh mã. Korĩt kãm ixpyrà nê mẽ apê Tĩrtũm krajê hwỳr.

Tĩrtũm kot amnhĩ kaxyw mẽ axunhwỳr jakamã na ka prem amnhĩ tomnuj kaga nê Kris kôt amnhĩ xunhwỳ nê hkôt amnhĩ nhĩpêx mex o ri apa. Krĩ piitã hkôt mẽ kot amnhĩ to Jejus Kris wỳr o mẽ pa xwỳnhjê pyrà nê. Mẽ panhõ Pahihti Jejus Krisja ãm pixi mex na.

3Nê Tĩrtũm kêp Mẽpahpãm maati nê Jejus Kris kêp mẽ panhõ Pahihti jakamã na pa hte mẽ ato wa hwỳr rãhã o ri ixpa nê mẽ ato wa hwỳr o:

—Kwa Tĩrtũm mẽ Jejus wa. Kêr ka wa Korĩt nhõ xwỳnhjê kutã anojarêr rãhã ho wa ri apa. Nê mẽ ho mex rãhã nê. Kê mẽ amnhĩ tã war apumunh kôt ri hamakêtkati nê hkĩnh nê àmnhĩx tanhmã ri amnhĩ nhĩpêx to ho ri pa. Anê.

**Tĩrtũm kot Jejus Kris kukwak ri mẽ pahto mex ã harẽnh**

*Sikũn Pẽtre 1.2; Wam Tesarõn 5.23-24*

4Nẽ mẽ ate amnhĩ kaxyw Jejus Kris kõt ajamaxpẽr o ri apa jakamã na hte Tĩrtũm mẽ ato mex nẽ. Tã pa hte kãm amnhĩ jarẽnh kaxyw nẽ kãm mẽ ajarẽnh o:

— Pa Tĩrtũm. ãm hãmri na ka pre Korĩt nhõ xwỳnh kwỳjê ho akra. Nà ja mex o mex. Anẽ.

5Nẽ ra mẽ ate Kris kõt amnhĩ xunhwỳr jakamã na ka mẽ ra amex kumrẽx nẽ ri apa. Nẽ aprĩ hã Kris kot amnhĩ nhĩpêx pumunh mex nẽ aprĩ hã akwỳjê mã harẽnh o ri mẽ hkõt apa. 6Na pa pre mẽ awỳr mõ nẽ mẽ amã Kris kot amnhĩ nhĩpêx ã harẽnh o ri mẽ akõt ixpa. Ka prem inhma nẽ hkõt amnhĩ xunhwỳr tỳx kurê kumrẽx. 7Jakamã nhũm Tĩrtũm mẽ ate kãm tanhmã amnhĩ nhĩpêx to ho apa kaxyw mẽ ato mẽ axihtỳx. Nẽ kaxyw mẽ amã mẽ ate axpẽn to mex xà piitã mẽ amã kugõ. Mẽ ate Jejus kot akupỳn mẽ pahwỳr wrỳk jamãr pê hapêr arĩt o apa pê tanhmã kãm axpẽn nhĩpêx to ho apa kaxyw. 8Koja Tĩrtũm tanhmã mẽ akrã hto ka mẽ hkõt pix mã ri amnhĩ nhĩpêx rãhã nhũm Pahihti Jejus Krisja akupỳn mẽ pahwỳr wrỳ. Hãmri nẽ mẽ ate amnhĩ nhĩpêx ã mẽ apumu nẽ mẽ ajarẽnh o:

— Nà ãm hãmri na hte jajaja amnhĩ to mex pix o ri pa. Anẽ.

9Nẽ koja Tĩrtũm ra kot amnhĩ jarẽnh xà hkõt mẽ ato mex nẽ. Ra kot mẽ ate Pahihti Jejus Kris kõt apa kaxyw amnhĩm mẽ axunhwỳr jakamã koja ra kot amnhĩ jarẽnh xà hkõt mẽ ato mex rãhã nẽ.

**Mẽ pahte mẽmoj tã axpẽn pê pahpigrãnh kêt ã mẽ pamã karõ**

*Rõmãn 15.5-6; Sikũn Korĩt 13.11; Epes 4.1-6; Piripos 2.1-4; Wam Pẽtre 3.8*

10-11E Kris kõt ixkwỳjaja. Na ka xep htem mẽmoj tã axpẽn mã axàkjêr pix o ri apa nhũm pre Krojre hkwỳjaja amnẽ ixwỳr põj nẽ inhmã mẽ ajarẽ. Kwa nà mẽ ã amnhĩ nhĩpêx anhỳr kêt nẽ. Kêr ka mẽ axpẽn kõt ri amnhĩ nhĩpêx rãhã ho ri apa. Nẽ axpẽn kõt ri ajamaxpẽr rãhã nẽ. Te ixkre tipxi kamã mẽ ri apa pyrãk o mãn kêt mẽ axpẽn nhĩpêx o ri axpẽn kõt apa. Nẽ mẽ axpẽn kutã anojarêt rãhã ho ri apa. No mẽmoj tã axpẽn mã axàkjêr pê axpẽn pê apigrãnh kêt nẽ. Na pa Pahihti Jejus Kris nhỹ hã mẽ amã ã ja hã karõ anẽ.

12Nẽ na ka xep htem ahpỳnhã ri mẽ apê mẽ ixkwỳ hã amnhĩ jarẽnh o ri apa. Jao mẽ akwỳjaja pa ixkõt ri amnhĩ nhĩpêx xwỳnh ã amnhĩ jarẽ. Nẽ mẽ akwỳjaja axtem Apor kõt ri amnhĩ nhĩpêx xwỳnh ã amnhĩ jarẽ. Nẽ mẽ akwỳjaja axtem Simãw Pẽtre hkõt amnhĩ nhĩpêx xwỳnh ã amnhĩ jarẽ. Nẽ mẽ akwỳjaja axtem Kris kõt amnhĩ nhĩpêx o ri apa xwỳnh ã amnhĩ jarẽ. ã na ka xep htem ahpỳnhã amnhĩ jarẽnh anhỳr o ri apa.

13Kwa nà ka mẽ ã ahpỳnhã amnhĩ jarẽnh anẽ nẽ te mẽ ate Kris o

apigrànĥ pyràk o hipêx. Kwa mon ka hte mẽ akwỳjaja apê ixkwỳ ĥã amnhĩ jarê? Xà pa na pa pre pĩ kahpa ĥã ajêť nê mẽ anê ty? Nà Kris pix na pre mẽ panê ĥã ajêť nê ty. Xà mẽ apê pa ixkwỳ ĥã amnhĩ jarêĥ kaxyw na prem mẽ akrã kumrã? Nà mẽ apê Kris kwỳ ĥã amnhĩ jarêĥ kaxyw na prem ã mẽ anhĩpêx anê. Mẽ kot ja ĥã mẽ apumunĥ xwỳĥjaja kot mẽ apê Kris kwỳ ĥã mẽ apumunĥ kaxyw. Tã na ka xep htem axtem nê ã ri ahpỳĥã mẽ kãm amnhĩ jarêĥ anhỳr o ri apa.

14-15Kop ãm ixte amnhĩ kôt mẽ axunhwỳr prãm ronĥỳx pa mẽ ato mẽ axohtô nê mẽ akrã kumrã nê mẽ amã: “E ra mẽ apê ixkwỳ na ka mẽ.” Anê. Nom na pa pre ã mẽ amã ixkapêr anhỳr kêt nê. ãm ĥãmri na pa pre ãm mẽ ato grêre nê mẽ akrã kumrã. ãm Kripti mẽ Gajre wa pix. 16Ku nê xep mããĥn Estepti nê kaxyw mẽ ĥkwỳjaja. ãm jajê pixjaja. Nom ko apu axte mẽ ĥkwỳ ko. Ixte mẽ ĥkrã kumrãr xwỳĥĥê mã ijamaxpêr tỳx kêt. 17Na pre Kris ixte mẽ ĥkrã kumrãr o ri ixpa kaxyw ixãm kêt nê. ãm ixte mẽ kãm kapêr jarêĥ o ri mẽ ĥkôt ixpa pix kaxyw na pre ixãm.

Nê na pa hte amnhĩ krã ĥkôt ri ixujarêĥ o ri mẽ akôt ixpa ĥkêt nê. Kot pa ã amnhĩ nhĩpêx anê nhũm mẽ ixkapêr mex ã inhma nê pa ixkôt amnhĩ xunhwỳ. Ja pymaj na pa hte amnhĩ krã ĥkôt ri tanĥmã ixujarêĥ to ho ri ixpa ĥkêt nê. Na pa hte ãm ixprĩ ĥã Kris kot tanĥmã mẽ panê amnhĩ nhĩpêx to ĥã harêĥ o ri mẽ ĥkôt ixpa. Mẽ pahpiitã mẽ panê htyk ã harêĥja pa hte mẽ kãm harê. Mẽ kot ĥprĩ ĥã mar nê ĥkôt amnhĩ xunhwỳr kaxyw. Jao amnhĩ krãm mẽ ujarêĥ mexta jagjêĥ nê ĥã no htỳx kaxyw. Pa ja ĥã mẽ omu nê ixkĩĥ nê ijamaxpêr o:

—Na htem ixkapêr ma nê Jejus kôt amnhĩ xunhwỳr kurê kumrêx. Nà ãm ĥãmri na pa hte mẽ kãm ixkapêr kaprỳ ho ri ixpa ĥkêt nê. Anê.

18No kêt mẽ pahte Tĩrtũm kot mẽ pahto ĥkra xwỳĥjaja ra mẽ pahte Kris pĩ kahpa ĥã mẽ panê htyk ã harêĥ mar nê pahkĩĥ nê papa xwỳĥ na pu mẽ. Jakamã na pu htem pajamaxpêr o:

—Nà ãm ĥãmri na Tĩrtũm Kraja htyk kukwak ri mẽ ixto mex nê mẽ ixto ĥkra. Mẽ ujarêĥja mex kumrêx. Anê.

No kêt mẽ kêp ĥkra ĥkêt xwỳĥjaja na htem tee ri Kris tyk ã harêĥ ma nê ĥamaxpêr o:

—Tk. Tanĥmã kot kêt we amnhĩ to nê mẽ panê ty? ãm amarĩ mẽ kot amnhĩ krã ĥkôt pĩ kahpa ĥã nhôr nê ĥpĩr kênã. Anê.

### **Tĩrtũm kra ĥkêt xwỳĥĥê jarêĥ**

*Matêwre 11.25-26; Wam Korĩt 3.19*

19Nê Tĩrtũm kapêr ã kagã htũm kot mẽ kêp ĥkra ĥkêt xwỳĥĥê jarêĥ kot:

Mẽ kot htỳx ri àĥpumunĥ tỳx ã amnhĩ to jarkrar o pa ĥtã kot paj mẽ kêp ja ho iĥapêx pa nhũm mẽ ã amnhĩ jarêĥ anhỳr kaprỳ. Anê.

20 Jakamã mẽ àhpumunh tỳx ã mẽ kot amnhĩ to jarkrar xwỳnhjaja nẽ mẽ kot Mojes kapêr o mẽ ahkre ho ri mẽ pa xwỳnhjaja nẽ mẽ kapêr rũnh xwỳnhjaja. Mẽ kot Tĩrtũm Kra hkôt amnhĩ xunhwỳr kêt jakamã te mẽ àhpumunh kêt pyràk. Tĩrtũm kra hkêt xwỳnhjaja kot mẽ àhpumunh tỳx ã mẽ harênh tã no ãm Tĩrtũm noo mã te mẽ àhpumunh kêt pyràk. Nẽ te htỳx ri mẽ kot amnhĩ nhĩpêx o pa pyràk. 21 Tĩrtũm àhpumunh o àhpumunh jakamã na pre ra mẽ hkukamã hamaxpêr o:

— Nà kot paj mẽ àhpumunh tỳx ã mẽ omunh xà hkôt mẽ ho ixkra hkêt nẽ. ãm mẽ kot ixkra Jejus kot mẽ nê htyk ã harênh mar nẽ amnhĩ kaxyw hkôt hamaxpêr pix ã mẽ omunh xà hkôt kot paj mẽ ho ixkra. Anẽ.

22-24 No Ijaewjaja kãm amnhĩ krã hkôt pix mã amnhĩ nhĩpêx prãm jakamã na pa hte mẽ ixpê Jejus kwỳjaja mẽ hwỳr mra nẽ mẽ kãm Kris kapêr jarênh o ri ixpa nhũm mẽ inhma nẽ ãm mẽ inhma. Nẽ te mẽ kot mẽ inhmar kêt pyrã nẽ mẽ inhmã:

— Tk. Nà kot paj mẽ tokyx axujarênh kôt amnhĩ nhĩpêx kêt nẽ. Kot kaj mẽ inhmã mẽ ixte aa mẽmoj pumunh kêt õ ho anẽ pa mẽ ja hã apumu nẽ axihtỳx ã apumu nẽ rĩ kormã hkôt amnhĩ nhĩpêx.

Anhỳr o inhmã kapêr. Tã no pa mẽ kãm ã amnhĩ nhĩpêx anhỳr kêt nẽ. ãm Kris kot mẽ panê pĩ kahpa hã htykja pix pa htem mẽ kãm harênh o ri ixpa. Ja kamã nhũm mẽ hkwỳjaja mẽ inhma nẽ ãm mẽ inhma nẽ Kris xihtỳx kêt ã ãm amarĩ htyk ã harê. No mẽ hkwỳjaja. Tĩrtũm kot amnhĩ kaxyw mẽ unhwỳr xwỳnhjaja na htem mẽ kurom mẽ inhma nẽ ra mẽ inhmar tỳx kurê kumrêx. Nẽ mẽ inhmã kapêr o:

— Nà ãm hãmri na Krisja Tĩrtũm pyrã nẽ hihtỳx o hihtỳx. ãm hãmri na ka ã harênh anẽ. Anẽ.

No Ijaew kêt xwỳnhjaja na Ijaew pyrã nẽ kãm amnhĩ krã hkôt amnhĩ nhĩpêx o pa hprãm kêt nẽ. Nẽ mẽ kãm mẽ àhpumunh tỳx pix prãm o pa. Jakamã na pa htem mẽ kãm Kris kapêr jarênh o ri mẽ hkôt ixpa nhũm mẽ hkwỳjaja mẽ inhma nẽ Ijaew kwỳjê pyrã nẽ ãm mẽ inhma nẽ mẽ inhmã:

— Tk. Nà na ka htem ãm ri axêx o ri apa. Kot pa mẽ akapêr mar kêt nẽ. Kot paj mẽ axàhpumunh tỳx ã mẽ apumu nẽ rĩ kormã mẽ ama nẽ mẽ akôt amnhĩ nhĩpêx.

Anhỳr tã pa mẽ ãm arĩ Kris kot mẽ panê htykja pix pa mẽ kãm harênh o ri mẽ hkôt ixpa. Nhũm mẽ hkwỳjaja mẽ inhma nẽ mẽ inhmã:

— Nà mẽ axàhpumunh kêt jakamã na ka htem atỳx ri ã ja jarênh anẽ.

Anhỳr tã no nhũm mẽ hkwỳjaja. Tĩrtũm kot amnhĩ kaxyw mẽ unhwỳr xwỳnhjaja na htem mẽ inhma nẽ mẽ inhmã kapêr o:

— Nà ãm hãmri na ka mẽ ã Krisja jarênh anẽ. Tĩrtũm pyrã nẽ àhpumunh o àhpumunh kênã. Anẽ.

25 Tĩrtũm mẽ Jejus wa mẽ pakurom àhpumunh o àhpumunh nẽ hihtỳx o hihtỳx.

**Tirtùm mẽ parom hihtỳx o hihtỳx ấ harễnh***Matêwre 11.25; Sikũn Korit 12.7-10; Xiakre 2.5*

26E Kris kôt ixtõ nễ ixtõxjaja. Amnepê mã Tirtùm kot amnhĩm mẽ axunhwỳrta ấ tanhmã na ka prem amnhĩ nhĩpêx to ho ri apa? Nà na ka prem axohtô nễ jar mẽ noo mã axàhpumunh kêt nễ ri apa. Nễ mẽ apê pahĩ hkêt nễ ri apa. Mễ axohtô nễ amnhĩ to hkryre nễ ri apa. 27Tã nhũm Tirtùm amnhĩ kôt mẽ ate amnhĩ to hkryre xwỳnhjê xunhwỳ. Koja nhỹrmã kot tanhmã mẽ pahpiitã mẽ pajarễnh to xà hã arĩgrota kato hãmri nhũm mẽ àhpumunh tỳx ấ amnhĩ to jarkrar xwỳnhjaja Tirtùm kot mẽ kurom mẽ pahto hkra hã mẽ pahpumu hãmri nễ tee ri amnhĩ kukamã hamaxpêr nễ amnhĩ kamã hpijaàm tỳx nễ. Nễ mẽ hihtỳx ấ amnhĩ to jarkrar xwỳnhjaja haxwỳja. Nhũm Tirtùm kot mẽ kurom mẽ pahto hkra hã mẽ pahpumu nễ tee ri amnhĩ kukamã hamaxpêr nễ amnhĩ kamã hpijaàm tỳx nễ.

28Na hte Tirtùm amnhĩ kaxyw mẽ kot amnhĩ to hkryre xwỳnhjê xunhwỳ. Nễ mẽ kot mẽ kamã kahak o pa xwỳnhjê xunhwỳ. Jar pyka ja kamã mẽ hkwỳ kot mẽ hkaga htã nhũm Tirtùm amnhĩ mã mẽ unhwỳ. Mễmo kaxyw na hte ấ amnhĩm mẽ unhwỳr anễ? Nà mẽ kot nhỹrmã tee ri mẽ àhpumunh tỳx ấ amnhĩ jarễnh xwỳnhjê pumunh nễ axpẽn mã mẽ harễnh o:

—Kwa mẽ pahte mẽ àhpumunh tỳx ấ mẽ harễnh tã nhũm Tirtùm mẽ pahpyrà nễ amnhĩ kaxyw mẽ unhwỳr kêt nễ. Nà te mẽ àhpumunh kêt pyràk.

Anhỹr o axpẽn mã mẽ harễnh kaxyw na pre Tirtùm amnhĩm mẽ kot amnhĩ to hkryre xwỳnhjê xunhwỳ. 29Jakamã kot puj mẽ nhỹrmã Tirtùm mã amnhĩ to jarkrar pê tanhmã kãm amnhĩ jarễnh to hkêt nễ. Rỳ kãm:

—Kwa ga ixpumu Tirtùm. Na pa hte ấ amnhĩ nhĩpêx anễ nễ ấ amnhĩ nhĩpêx anễ. Kwa ja hã ixpumu nễ ixto akra nà?

Anhỹr o amnhĩ to hwỳr kêt nễ. 30Ấm Jejus pix kukwak ri na hte Tirtùm mẽ pahto hkra. Tãm na pre Tirtùm noo mã amnhĩm mẽ paxunhwỳ. Mễ pahte uràk nễ pahpê hkra kaxyw. Jakamã na pu htem ấm pix kukwak ri amnhĩ nhĩpêx mex o ri papa. Nhũm mẽ pamã àhpumunh tỳx xà hkwỳ gõ. Tã ra kot mẽ pahte amnhĩ tomnuj pê mẽ papytãr jakamã kot puj mẽ nhỹrmã pahtyk tã no ấm akupỳm pahtĩr nễ Tirtùm mẽ wa kuri pahtĩr tũm nễ pamex kumrêx nễ papa ho papa. 31Tã ấ Jejus kot mẽ panhĩpêx kot anhỹr jakamã Tirtùm kapêr ấ kagà htũm kot ja jarễnh kot:

Kot ka mẽ amã mẽmoj tã jarkrar prãm nom kêr ka mẽ kamjaja amnhĩ to jarkrar kêt nễ. Mễ panhõ Pahihiti ra kot mẽ panê tanhmã amnhĩ nhĩpêx toja pix ấ tanhmã ho jarkrar to ho ri apa. Anễ.

**Pawre kot tanhmã Kris jarēnh to hã harēnh**

*Sikũn Korĩt 4.1-7; Wam Pêtre 3.15*

**2** 1-2E Kris kôt ixtõ nẽ ixtõxjaja. Amnepê mã ixte mẽ awỳr inhmõrta ã na pa pre inhnojarêh nẽ ijamaxpêr o:

—Kot paj ma mẽ hwỳr mõi nẽ mẽ kãm Kris kapêr jarê. Kot amnhĩ grõnh kõt mẽ inhnê htykja pa mẽ kãm harê. ãm ja pix jarēnh o ri mẽ hkõt ixpa. Nom kot paj mẽ kapêr japjê xwỳnhjê pyrã nẽ mẽ kãm ixkapêr japjê hkêt nẽ. Rỳ mẽ uràk nẽ te ixàhpumunh tỳx o ri ixkapêr japjê pyrãk o ri mẽ kãm ixkapêr japjê hkêt nẽ. Kot paj ãm ixkatat kõt ri mẽ kãm tanhmã Jejus jarēnh to pix o ri mẽ hkõt ixpa.

Anhỳr o mẽ akukamã ijamaxpêr. Hãmri nẽ ma mẽ awỳr mõi nẽ mẽ awỳr pøj nẽ mẽ amã Jejus kot mẽ panê htyk nẽ akupỳm htĩrja pix jarēnh rãhã ho ri ixpa. 3Na pa pre tee ri amnhĩ kukamã ijamaxpêr nẽ ijamaxpêr o:

—Hêxta waa nẽ. Tanhmã kot pa we mẽ kãm Tĩrtũm kapêr jarēnh to nhũm mẽ inhmar tỳx nẽ hkõt amnhĩ xunhwỳr kurê kumrêx wehe? Kot paj amnhĩ krã hkõt mẽ kãm harēnh kêt nẽ. Ja kaxyw ijamaxpêr tỳx kêt kênã. Kot paj amnhĩ krã hkõt mẽ kãm harê nhũm mẽ ãm inhma nẽ hkõt amnhĩ xunhwỳr kêt nẽ. Nà kot paj Tĩrtũm nhỹ hã mẽ kãm tanhmã ixkapêr to kê tãm tanhmã mẽ hkrã hto kê mẽ inhma nẽ hkõt amnhĩ xunhwỳr japêr.

Anhỳr o ijamaxpêr. 4Nẽ mẽ ate inhmar kaxyw na pa pre ixêx rom tanhmã mẽ ano kupyw to ho ri ixpa hkêt nẽ. Rỳ mẽ pajaja mẽ ixàhpumunh xà hkõt tanhmã mẽ amã ixkapêr to hkêt nẽ. Na pa pre ãm Tĩrtũm Karõ nhỹ hã mẽ amã awjarê. Mẽ ate mar nẽ hihtỳx o hihtỳx ã omunh kaxyw. 5Jakamã na ka prem Tĩrtũm xihtỳx ã omu nẽ amnhĩ kaxyw hkõt ajamaxpêr kurê kumrêx. No pa ixàhpumunh tỳx ã ixpumunh kõt ixkõt ajamaxpêr kêt nẽ. Na ka prem ixkapêr ma nẽ ajamaxpêr o:

—Nà Tĩrtũm na mẽ parom àhpumunh o àhpumunh nẽ hihtỳx o hihtỳx.

Anhỳr o ajamaxpêr kõt ajamaxpêr kurê kumrêx.

**Tĩrtũm Karõ kot mẽ pamã àhpumunh xà nhõr ã harēnh**

*Matêwre 7.6; Juãw 14.22, 16.13-15; Xiakre 3.13-18*

6Nẽ na hte Tĩrtũm kra hkwỳjaja Tĩrtũm kot amnhĩ nhĩpêx ã omunh mex. Nẽ hamaxpêr ã omunh mex. Jakamã na pa hte mẽ ahkre japjê ho mẽ hkõt ixpa. Nom jar pika ja kamã mẽ pajamaxpêr tỳx xà ho mẽ ahkre hkêt nẽ. Rỳ pika piitã hkõt mẽ utar xwỳnhjê jamaxpêr tỳx xà ho ri mẽ ahkre ho ri ixpa hkêt nẽ. Kojã nhỹrmã mẽ àhpumunh xàja mẽ kêp hapêx pa. 7Jakamã na pa hte ãm Tĩrtũm xàhpumunh xà pix o mẽ ahkre o ri ixpa.

Amnepê mã kormã mẽmoj piitã hkêt ri na pre Tĩrtũm amnhĩ kukamã amnhĩ jarẽnh o:

— Mẽ kot amnhĩ kaxyw Ixkra hkôt mẽ hamaxpẽr o mẽ pa xwỳnhjaja kot paj mẽ ho ixkra nhũm mẽ mex kumrẽx nẽ pa ho pa.

Anhỹr o mẽ harẽ. Nom mẽ kot hkôt amnhĩ xunhwỳr kêt xwỳnhjaja nhũm kormã mẽ kãm ja ho amnhĩrĩt kêt nẽ. Tã ja na pa hte ra mẽ kãm harẽnh rãhã ho ri mẽ hkôt ixpa nhũm mẽ Tĩrtũm kãm mẽ pahto hkra hprãm hã harẽnh ma. <sup>8</sup>Nom pika piitã hkôt mẽ ho amnhĩptar xwỳnhjaja na mẽ kormã ja mar kêt nẽ. Kêp apu mẽ kot mar ronhỹx prem pĩ kahpa hã mẽ panhõ Pahihti nhõr nẽ hpĩr kêt nẽ. Mex o mex tã nhũm prem axtem nẽ ã hipêx anẽ. <sup>9</sup>Mẽ kot mẽmoj mex pumunh kêt tã Tĩrtũm kapẽr ã kagã htũm kot mẽmoj mex jarẽnh kot:

Na pre Tĩrtũm mẽ kãm hkĩnh xwỳnhjê kutêp mẽmoj mex kwỳ  
jaxwỳ nhũm mex o mex nẽ mẽ ahã hikwỳ.

Aa mẽhõ kot mẽmoj mex o mexja pumunh kêt.

Nẽ aa mẽhõ kot ã mẽmoj kot anhỹr pumunh kêt.

Nẽ aa ã mẽmoj mex kot anhỹr kukamã hamaxpẽr kêt.

Tã nhũm Tĩrtũm mẽ kutêp hkwỳ jaxwỳ.

Anhỹr o kot harẽnh tã no nhũm mẽ kot hkôt amnhĩ xunhwỳr kêt xwỳnhjaja ã kapẽr anhỹrja mar kêt nẽ. <sup>10</sup>Mẽ pamã na pre Tĩrtũm ja ho amnhĩrĩt. Na pre ra mẽ pamã Karõ gõ nhũm mẽ pamã gjêx o mẽ pamã mẽmoj to amnhĩrĩt mex nẽ. Tĩrtũm Karõja àhpumunh tỳx o àhpumunh tỳx. Nẽ kot hprĩ hã Tĩrtũm jamaxpẽr pumunh par. <sup>11</sup>No mẽ papajaja na pu htem axpẽn jamaxpẽr kôt axpẽn pumunh kêt nẽ. Na pu htem papam amnhĩ jamaxpẽr ã amnhĩ pumu. Ja pyrã nẽ Tĩrtũm Karõ pix na hte Tĩrtũm jamaxpẽr pumunh. <sup>12</sup>No mẽ pahpê hkrajaja na hte mẽ pahkarõja pix mẽ pakamã pa hkêt nẽ. Na hte mããnẽn Tĩrtũm Karõja mẽ pakamã pa nẽ mẽ pamã tanhmã mẽmoj to amnhĩrĩt to ho mẽ pahkôt pa. Nẽ Tĩrtũm kot mẽ pakutêp mẽmoj mex jaxwỳrja nhũm ja kukamã mẽ pamã harẽnh o amnhĩrĩt.

<sup>13</sup>Jakamã na pa htem amnhĩ krã hkôt ri mẽ kãm ixujarẽnh kêt nẽ. ãm Tĩrtũm Karõ nhỹ hã na pa hte ixprĩ hã mẽ kãm kapẽr jarẽnh o ri mẽ hkôt ixpa. Ra Tĩrtũm Karõ kot mẽ amã gjêx xwỳnhjê mã pa ÿ hã ixkapẽr. <sup>14</sup>No mẽ kãm Tĩrtũm Karõ kapẽr mar prãm kêt xwỳnhjaja na htem Tĩrtũm kot amnhĩ nhĩpêx pumu nẽ hprĩ hã omunh kêt nẽ. Mẽ kãm kapẽr mar prãm kêt jakamã na htem ri kot tanhmã mẽ pahto mex to hã harẽnh ma nẽ hamaxpẽr o:

— Tk. Kwa mo kaxyw na htem ri ã Tĩrtũm jarẽnh anẽ? Tanhmã kot we amnhĩ to nẽ mẽ pahto mex? Nà kot anhỹr kêt. Anẽ.

<sup>15</sup>Nom mẽ pahpê Tĩrtũm kra hkwỳ hã mẽ pahte Karõ kapẽr mar mex xwỳnhjaja na pu hte mẽ kurom Tĩrtũm kot amnhĩ nhĩpêx ã omunh mex nẽ. Nẽ Karõ xõ ri mar mex nẽ nhũm mẽ kot Karõ kapẽr mar kêt

xw̃nhjaja tee ri ã mẽ pahte amnhĩ nhĩpêx anh̃yr ã mẽ pahpumu. Nom hprĩ hã mẽ pahte Tĩrtũm kõt amnhĩ nhĩpêx pumunh kêt nê. 16Tĩrtũm kapêr ã kagà htũm kot ja jarênh kot:

Mêhõ na kot Tĩrtũm jamaxpêr pumunh?

Nê mẽhõ na pre we kãm hamaxpêr gõ?

Nà amrakati kumrêx. Tapxipix na àhpumunh t̃yx o àhpumunh t̃yx. Anê.

Tã mẽ papajaja mẽ pahte Tĩrtũm Karõ kapêr mar t̃yx xw̃nhjaja na pu htem Kris xõ ri pahprĩ hã hamaxpêr kõt omunh mex nê.

### Mê kot Tĩrtũm mã tanhmã amnhĩ nhĩpêx to xw̃nhjê jarênh

*Wam Korĩt 14.20; Karatas 5.16-21; Epes 4.14; Eprêw 5.11*

**3** 1E Kris kõt ixtõ nê ixtõxjaja. Pa mẽ amã mẽmoj jarê ka mẽ inhma nê kãm ajamaxpêr. Nà amnepê mã kormã mẽ ate Kris kõt amnhĩ nhĩpêx tohtuj anh̃yrta ã tanhmã na ka prem amnhĩ nhĩpêx to ho ri apa wehe? Na ka prem arĩ ajamaxpêr tũm kõt pix mã amnhĩ nhĩpêx. Kormã mẽ ate Tĩrtũm Karõ hkõt amnhĩ nhĩpêx mex kêt jakamã na ka pre htem mẽhprĩre kot amnhĩ nhĩpêx pyrãk o amnhĩ nhĩpêx. Nê mẽ urak nê kormã mẽmoj piitã omunh kêt nê. Jakamã na pa pre mẽ amã ixujarênh kaxyw nê te mẽ ate kormã Tĩrtũm kapêr mar kêt xw̃nhjê pyrãk o mẽ anhĩpêx nê mẽ amã tanhmã ixujarênh to. 2Mê hkarãre na htem mẽ hkà kagõ pix kaõ nê kormã mẽ apkur xà mex kur kêt nê. Ja pyrã nê na pa pre te ixte mẽ ato hpjiaõr pyrã nê mẽ amã Tĩrtũm kapêr piitã harênh par kurê kumrêx kêt nê. Am mẽ amã hkw̃y pix jarê ka prem ama nê Jesus kõt amnhĩ xunhw̃y. Tã na pa hte arĩ mẽ amã hkw̃y pix jarênh o ri ixpa nê kormã piitã ho mẽ ajahkre jatur xàm mênh kêt nê. 3Na ka htem arĩ te mẽ apê Kris kw̃y hkêt pyrãk o amnhĩ nhĩpêx o apa. Nê mẽmoj kõt axpên kãm agryk axpên mã axakjêr o apa. ã amnhĩ nhĩpêx anh̃yr jao arĩ mẽ ate amnhĩ nhĩpêx tũm kõt amnhĩ nhĩpêx rãhã nê.

4Na hte mẽ akw̃yjaja amnhĩ jarênh o: “Ixpê Pawre hkw̃y na pa.” Anê. Nê mẽ akw̃yjaja amnhĩ jarênh o: “Pa na ixpê Apor kw̃y na pa.” Anê. Kwa na ka htem ã amnhĩ jarênh anh̃yr o te mẽ apê Kris kw̃y hkêt pyrãk. 5Apor mẽ pa am wa ixte Tĩrtũm kapêr o mẽ ajahkre xw̃nh pix na pa wa. Wa ixpê mẽ anhõ pahihiti hkêt kênã kot ka kêt mẽ axtem nê mẽ apê ahp̃ynhã wa ixkw̃y hã amnhĩ jarê. Na pa pre wa mẽ amã Tĩrtũm kapêr jarênh o ri mẽ akõt ixpa ka prem wa inhma nê amnhĩ kaxyw hkõt ajamaxpêr t̃yx nê. Nê hkõt amnhĩ xunhw̃y nom wa pa wa ixkõt amnhĩ xunhw̃y kêt nê. Na pa wa am Tĩrtũm kapêr o mẽ ajahkre nom amnhĩ kõt mẽ axunhw̃y kêt nê.

6-9E pa ixprĩ hã mẽ amã war amnhĩ jarê ka mẽ inhma. Te wa ixpê Tĩrtũm pur kãm wa ixapênh xw̃nh pyrãk no mẽ kajaja te mẽ apê hpur pyrãk. Na htem hpur karê nhũm hirã nhũm mẽ kamã ahkre ho pa. Ja

pyrà nê na pa pre ixkumrêx mē awÿr ixpa nê mē amã Tĩrtũm kapêr jarênh o ri mē akôt ixpa. Te mē kot pur kãm ahkre ho ri pata pyræk. Tã nhũm Apor ixpãnhã ma mē awÿr pa nê te mē kot pur karêrta pyræk o mē anhĩpêx nê mē amã Tĩrtũm kapêr o mē ajahkre mex o ri pa. Xà na hte pur karêr xwÿnhja rÿ kamã ahkre xwÿnhja tãm tanhmã mēmo hy hto nhũm ra higrôt nê hprêk nê ô? Nà na htem ãm ahkre hpa nhũm arĩ hikwÿ. Nhũm Tĩrtũm tãm tanhmã hyta to nhũm higrôt nê hprêk nê ô. Ja pyrà nê na hte Tĩrtũm mē ho hkra nê tanhmã mē ho nhũm mē amnhĩ kaxyw hkôt hamaxpêr tÿx nê hkôt amnhĩ nhĩpêx mex o pa. Nom mē kãm harênh o pa xwÿnhhta kôt amnhĩ xunhwÿr kêt nê.

Nê na hte pur karêr xwÿnh rÿ kamã ahkre xwÿnhja tãm tanhmã hyta to nê ho htĩr kêt nê. Tĩrtũm pix na hte tanhmã ho nhũm higrôt. Ja pyrà nê na pa hte Tĩrtũm kapêr o mē ajahkre o ri mē akôt ixpa nom pa tanhmã mē ato ka mē apê Tĩrtũm kra nê ri apa hkêt nê. Tanhmã kot pa mē ato ka mē apê hkra? Tapxipix na kot mē pahto hkra kaxyw àhpumunh. Nê tapxipix na hte tanhmã mē pahkrã hto pu mē kãm hprãm xà hkôt amnhĩ nhĩpêx mex o ri papa.

Nê pur karêr xwÿnh mē pur kãm ahkre xwÿnhja wa. Hamê wa àpênh mex jakamã koja hamê wa kot pur kãm àpênh pãnhã amnhĩm ujamÿnh rax nê. Ja pyrà nê kot paj mē ixte Tĩrtũm kapêr o mē ajahkre ho ri mē akôt ixpa xwÿnhjaja nhũm Tĩrtũm nhÿrmã mē ixàpênh pãnhã mē inhmã amnhĩrer mex nê.

Nê te mē ate Tĩrtũm nhõ ixkre pyræk. **10**Nê pa te ixpê Tĩrtũm mã ixkre hã ixàpênh xwÿnh pyræk jakamã na pre Tĩrtũm mē akaxyw tanhmã ixto pa mē amã tanhmã kot amnhĩ nhĩpêx to hã harênh o ri mē akôt ixpa. Te ixte õ ixkre kaxyw ãm xà maati xãm pyræk o mē anhĩpêx. Jao mē amã kapêr jarênh o ri mē akôt ixpa. Mē ate amnhĩ kaxyw hkôt ajamaxpêr nê hkôt amnhĩ xunhwÿr kaxyw. Tã na ka prem hkôt amnhĩ xunhwÿ nhũm ixpãnhã Tĩrtũm kapêr o mē ahkre ho mē pa xwÿnh kwÿjjaja mē awÿr mra nê mē amã kapêr jarênh jatur xãm kurê. Nê hprĩ hã ho mē ajahkre ho ri mē akôt pa. Te ho mē kot ixkre krax nhĩpêx pyræk o mē anhĩpêx.

Nê kwa mē ate mē ahkre o mē apa xwÿnhjaja kêr ka mē akatàt kôt mē ahkre mex rãhã ho ri mē hkôt apa.

**11**Nê Jesus Kris tapxipix na pu htem hkôt amnhĩ xunhwÿ nhũm mē panê mē pahte amnhĩ tomnuj o hapêx. Jakamã te kêp kÿxpê ixkre nhĩmõk ã nõr xà maatita pyræk.

**12**Nê na htem tõhã ixkre nhĩpêx kaxyw nê pĩ htÿx jakà nê ho hipêx nhũm kritpê mē kãm mex ry nê kuhê. No na htem tõhã nojarêt kãm ixkre hã apê nê pĩ rerek o hipêx nhũm mē kãm mex ry hkêt nê. Koja rôr nhyre hwÿr mra nê mē kêp hapôk nê homnu. Ja pyrà nê na hte Tĩrtũm kapêr o mē ahkre ho ri mē pa xwÿnh kwÿjjaja te mē kot katàt kôt pĩ htÿx o ixkre nhĩpêxta pyrà nê katàt kôt mē ahkre ho ri mē hkôt pa. No nhũm

mě hkwỳjaja axtem nẽ te mẽ kot pĩ rerek o ixkre nhĩpêxta pyræk o amnhĩ nhĩpêx nẽ htỳx ri Tĩrtũm kapêr kwỳm ri tanhmã mẽ ahkre hto ho pa. Jao hkwỳm ri amnhĩ nhĩpêx rãhã ho ri pa.

13Nẽ koja mẽhõ pĩ htỳx pix o amnhĩm òrkwỳ nhĩpêx hãmri nhũm mẽmo arĩgro hã tanhmã amnhĩ to nẽ kêp pôr. No ãm hã põja pix xêt pa nhũm kãm hikwỳ xà nẽ òkwa êja arĩ piitã mex nhũm ixkre hpãm axte hã pô janhôr o nyw. No koja pĩ rerek o hipêx nhũm mẽmo arĩgro hã kêp pôr hãmri nẽ piitã kêp kaxàr pa. Ja pyrã nẽ koja nhỹrmã Krisja akupỳn mẽ pahwỳr wrỳ hãmri nẽ mẽ pahte kãm tanhmã amnhĩ nhĩpêx to ho papaja piitã hã mẽ pahpumunh kôt tanhmã mẽ pajarênh to. Koja mẽ pahkwỳjaja mẽ pahte mẽ kot pĩ htỳx o ixkre nhĩpêxta pyrã nẽ Tĩrtũm mã mẽ pahte amnhĩ nhĩpêx mex o mẽ papa xwỳnhjê xàpênh pumu nẽ mẽ pahte amnhĩ to mex xwỳnh ã mẽ pajarê. Hãmri nẽ hpãnhã mẽ kot pĩ rerek o ixkre nhĩpêxta pyrã nẽ mẽ kot kãm amnhĩ nhĩpêx mex kêt xwỳnhjê pumu nẽ mẽ kot amnhĩ to mex kêt xwỳnh hã mẽ harê.

14Nẽ pĩ htỳxja na hte tanhmã amnhĩ to nẽ hpôr no ãm arĩ mex nẽ kuhê nhũm mẽ piitã arĩ mex ã omu. Ja pyrã nẽ koja Krisja mẽ kot kãm tanhmã amnhĩ nhĩpêx mex to ho mẽ pa xwỳnhjê pumu nẽ mẽ kot tanhmã kãm amnhĩ nhĩpêx to hpãnhã mẽ kãm amnhĩre nhũm mẽ piitã mẽ kot amnhĩ to mex ã mẽ omu. 15No pĩ rerekja na hte pôr nẽ kaxàr pa. Ja pyrã nẽ mẽ kot Kris mã amnhĩ nhĩpêx mex hkêt xwỳnhjaja koja Tĩrtũm mẽ kãm amnhĩrer kêt nẽ. Nom arĩ mẽ kêp hkra jakamã koja mẽ arĩ kuri hfĩr tũm nẽ pa. No ãm mẽ kot Tĩrtũm mã amnhĩ nhĩpêx mex kêt jakamã koja mẽ hkwỳjê hkĩnh ã amnhĩm mẽmoj mex kwỳ jamỳnh kêt nẽ. Te mẽhõ nhòrkwỳ kêp hpôr nhũm mẽ hkukrêx kwỳ jamỳnh kêt nẽ ỹ kamã kurũm hapôx pyræk.

16-17E pa mẽ amã mẽmoj jarê. Ra mẽ ate mar tã mãn ka mẽ ra tanhmã amnhĩ to nẽ hã ano hkêt rỳ ko. Nà te mẽ pahpê Tĩrtũm nhòrkwỳ pyræk. Tĩrtũm nhòrkwỳja ò na. Tã mẽ pahpê hkra nhũm Karõ kot mẽ pakaxwỳnh mã gjêx jakamã te mẽ pahpê òrkwỳ pyræk. Jakamã mẽ kot kapêr kwỳm ri mẽ ajahkre o ri mẽ pa xwỳnhjaja te mẽ kot Tĩrtũm nhòrkwỳ grành xwỳnh pyræk. Koja mẽ nhỹrmã amnhĩ xà htỳx kamã hamak o pa.

### Mẽ pahte amnhĩ to jarkrar kêt ã mẽ pamã karõ

*Wam Korĩt 1.10-25*

18Nẽ kot kaj mẽ atõ axàhpumunh tỳx o amnhĩ to jarkrar o ri apa japêr. Kwa mẽ jam anhũre nẽ axte ri ã amnhĩ nhĩpêx anhỹr kêt nẽ. Nẽ te mẽ ate amnhĩ nẽ axàhpumunh tỳx xàja nhãm rênh par pyræk o amnhĩ nhĩpêx. Mẽ paxàhpumunh xàja pika kamã mẽ àhpumunh pix jakamã kêr ka mẽ te amnhĩ nẽ nhãm rênh pyrã nẽ hpãnhã Tĩrtũm xàhpumunh xà hkôt pix mã amnhĩ nhĩpêx o ri apa. 19No pika kamã mẽ àhpumunh

xwÿnhjaja Tĩrtũm noo mã te mẽ hkrã pipãnh nẽ htÿx ri pata pyrãk. Tĩrtũm kapẽr ã kagã htũm kot mẽ harẽnh kot:

Pika ja kamã mẽ àhpumunh tÿx ã mẽ kot amnhĩ to jarkrar  
xwÿnhjaja Tĩrtũm noo mã te mẽ kot amnhĩ to hẽx o pa  
pyrãk. Anẽ.

20Nẽ mããnẽn mẽ harẽnh kot:

Mẽ kot amnhĩ xàhpumunh tÿx ã amnhĩ to jarkrar o ri mẽ pa  
xwÿnhjaja na hte Tĩrtũm mẽ omu nẽ mẽ kot ã amnhĩ  
jarẽnh anhÿr kaprÿ hã mẽ harẽ. Anẽ.

21-22Jakamã kwa kêr ka mẽ axte mẽ apê ixkwÿ rÿ mẽ apê Apor kwÿ hã  
amnhĩ jarẽnh o ri apa hkêt nẽ. Mẽ apê wa ixkwÿ hkêt kẽnã. Nẽ mẽ apê  
nhãm mẽhõ hkwy hkêt. Mẽ pahpiitã mẽ pahpê Kris kwÿ na pu mẽ.

Nẽ kot puj mẽ nhÿrmã pahtyk tã akupÿm pahĩr nẽ Tĩrtũm mẽ Jejus  
wa kuri pamex nẽ pahĩr tũm nẽ ri papa. Jakamã kwa mẽ tee ri amnhĩ  
kukamã ajamaxpẽr kêt nẽ.

Nẽ jarãhã mẽmoj piitã mẽ panhõõ. Nẽ kormã mẽmoj kot amnhĩrĩt  
kêt xwÿnhjaja haxwÿja mẽ panhõ na. ãm mẽmoj piitã mẽ panhõ jakamã  
te mẽ pahpê mẽmoj piitã mẽõ pahi pyrãk. 23No mẽ papajaja axtem Kris  
kêp mẽ panhõ Pahihti. Nẽ Tĩrtũm kêp Kris nhõ Pahihti.

### Tĩrtũm pix kot tanhmã mẽ pajarẽnh to xwÿnh ã harẽnh

*Eprẽw 13.17*

**4** 1Nẽ mẽ pajaja mẽ ixpê mẽ anhõ pahi hkêt. ãm mẽ ixte Kris mã  
tanhmã amnhĩ nhĩpẽx to ho ixpa xwÿnh pix jakamã Tĩrtũm kormã  
kapẽr kwÿ ho amnhĩrĩt kêtja na pa htem mẽ amã ho amnhĩrĩt o ri mẽ  
akõt ixpa. Ja kaxyw na pre mẽ ixunhwÿ. 2Na pre Kris tanhmã mẽ inhmã  
kapẽr to nẽ mẽ inhmã:

—E kêr ka mẽ ixkapẽr pix o mãn mẽ ahkre ho ri mẽ hkõt apa. Anẽ.

3-4Kumã pix mã ixte amnhĩ nhĩpẽx o ri ixpa jakamã koja tapxipix  
ixte kãm amnhĩ nhĩpẽx ã ixpumunh kõt tanhmã ijarẽnh to. Ixte kãm  
amnhĩ nhĩpẽx mex ã ijarẽ rÿ ixte kãm amnhĩ nhĩpẽx mex kêt ã ijarẽ. ãm  
tapxipix koja tanhmã ijarẽnh to. No koja nhãm mẽhõ rÿ mẽ atõ ã ijarẽnh  
anẽ pa ama nẽ ãm ama. Rÿ papam tanhmã kãm ixte amnhĩ nhĩpẽx mex  
to hã kãm amnhĩ jarẽnh japêr hãmri nẽ ãm ixtÿx kãm ã amnhĩ nhĩpẽx  
anhÿr ã amnhĩ jarẽnh kaprÿ. Pahihti Kris pix kot hprĩ hã mẽ pahte  
amnhĩ nhĩpẽx kõt pahpumunh jakamã tapxipix koja tanhmã mẽ  
pajarẽnh to.

5Jakamã kwa kêr ka mẽ ri mẽ kot Tĩrtũm mã tanhmã amnhĩ nhĩpẽx  
to hã mẽ omunh xà hkõt tanhmã mẽ harẽnh to hkêt nẽ. Koja nhÿrmã  
Pahihti Krisja akupÿn mẽ pahwÿr wrÿ nẽ rĩ tãm tanhmã mẽ pahte amnhĩ  
nhĩpẽx to hã mẽ pahpumunh xà hkõt tanhmã mẽ pajarẽnh to. Nẽ mẽ kot  
hpimxur pẽ tanhmã amnhĩ tomnuj to ho mẽ pa xwÿnhjaja nhũm mẽ

piitã mẽ noo mã mẽ kãm ja ho amnhĩrĩť nhũm mẽ ja hã mẽ omu. Nẽ mẽ pahpiitã mẽ pajamaxpêr xà ho amnhĩrĩť nhũm mẽ piitã hprĩ hã ja hã axpên pumu. Hãmri nhũm Tĩrtũm rĩ kormã mẽ pahte kãm tanhmã amnhĩ nhĩpêx mex to ho pa xwỳnhjê jarê.

6E Jejus kôt ixkwỳjaja. Nà na pa ã mẽ amã Apor mẽ wa amnhĩ jarênh anê. Mẽ ate inhmar nê Tĩrtũm kapêr ã kagà hkôt tanhmã wa ijarênh to kaxyw. Kot kaj mẽ ã amnhĩ nhĩpêx anê hãmri nê ahpỳnhã tanhmã mẽ ixte Kris kapêr jarênh xwỳnhjê jarênh to hkêt nê. Nẽ axpên mã mẽ ijarênh o:

— Nà tãm kot Kris kapêr jarênh mex o kot hkwỳjê jakrenh jakamã kot paj hkôt pix mã mãn ri ixa.

Anhỹr o axpên mã mẽ ixtõ jarênh kêt nê. Kot kaj mẽ ã mẽ ixtõ jarênh anê nê te mẽ ixto jarkrar pyràk o amnhĩ nhĩpêx. 7Kwa mēhõ na pre mẽ amã tanhmã ri mẽ ijarênh to ka mẽ mar xà hkôt ã mẽ ijarênh anê? Nẽ mẽ ixkapêr mex ã mẽ ixkwỳjê jarê nê mẽ ixkapêr mex kêt ã mẽ ixkwỳjê jarê. Nà na ka mẽ ãm amnhĩ krã hkôt ã mẽ ijarênh anê nom Kris xàhpumunh xà ho ã mẽ ijarênh anhỹr kêt nê. ãm mẽ ixte Tĩrtũm kapêr o mẽ ajahkre xwỳnhjaja na pa prem mẽ amã mẽmoj jarê ka mẽ ama nê mẽ inhỹ hã hkôt axàhpumunh mex nê. No amnhĩ krã hkôt mẽ axàhpumunh kêt kênã kot ka kêt mẽ ã ahpỳnhã tanhmã mẽ ixto jarkrar anhỹr to ho ri apa.

8Te mẽ ate Apor mẽ wa ixrom Tĩrtũm kapêr mar par nê hkôt amnhĩ nhĩpêx mex pyràk. Te wa ixrom mẽ ate Jejus nhĩhkõ hã mẽ ho amnhĩptàr pyràk. Hêxta waa nê. Kop apu ãm hãmri mẽ ate ãhkõ hã mẽ ho amnhĩptàr ronhỹx pa ijaxwỳja mẽ apyrà nê ã amnhĩ nhĩpêx anê. Hãmri nê ixkĩnh tỳx kumrêx. 9Nom ja kot anhỹr kêt.

### Jejus nhỹ hã mẽ ahkre xwỳnhjê jarênh

*Sikũn Korĩť 4.8-10; Eprêw 12.1*

Nẽ mẽ ixpê Jejus nhỹ hã mẽ ajahkre ho mẽ ixpa xwỳnhjaja te Tĩrtũmja axtem tanhmã mẽ inhĩpêx to pyràk pa mẽ inhmex kêt nê ixpa. Te mẽ ixte gyw kãm amnhĩ rênh nhũm mẽ kot mẽ ixkamã ôkre kahak pyràk o na htem mẽ inhĩpêx. Jakamã na hte mẽ hkwỳjaja mẽ ixpumu nê mẽ ixkapêr ma nê ãm mẽ inhma nê axpên mã mẽ ijarênh o:

— Tk. Kot mẽ ahkreja mexti hã. Kwa pu mẽ himex ri.

Anhỹr jakamã te ra mẽ ixtyk nê mẽ inhĩkwỹ nhũm mẽ piitã mẽ ixtã htu nê mẽ ixpumunh nê ma pa pyràk o amnhĩ nhĩpêx. Jakamã na htem mẽ ixte mẽ ahkre ma nê ãm kuma nê ma pa. Nom Tĩrtũm kapêr o mẽ wrỳk xwỳnhjaja na htem ja hã mẽ pahpumu nê axpên mã mẽ pajarênh o:

— Kwa mẽ kot Jejus ã mẽ hipêx kati htã nhũm mẽ arĩ hkôt amnhĩ nhĩpêx mex nê aa hkaga hkêt nê. Hêxta waa nê. Nà ãm hãmri na htem ã amnhĩ nhĩpêx anhỹr o pa. Anê.

10Na hte mẽ kot mẽ ixkapēr mar xwỳnh kwỳjaja kãm mẽ ixkĩnh kêt nẽ tanhmã mẽ ixto kapēr punuj to. No mẽ kajaja nhũm mẽ ã mẽ ato kapēr anhỹr kêt nẽ. Na htem mẽ ixkrã pipãnh ã mẽ ijarẽ no mẽ kajaja nhũm mẽ Kris nhỹ hã mẽ axàhpumunh tỳx ã mẽ ajarẽ. Nẽ mẽ ixte Tĩrtũm kapēr kôt amnhĩ nhĩpêx mex kêt ã mẽ ijarẽ no mẽ kajaja na htem Tĩrtũm kôt mẽ ate amnhĩ nhĩpêx mex ã mẽ ajarẽ. Nẽ mẽ kot mẽ ixkamã òkre kahak tỳx tã mẽ akamã òkre kahak kêt nẽ mẽ kãm mẽ akapēr mar prãm nẽ. 11Na pa htem arĩ Kris ã ixpunuj nẽ ixpa. Nẽ mẽ inhmã prãm nẽ mẽ inhmã kôt nẽ ri ixpa. Nẽ mẽ ixẽ pikaxônhre nẽ ri ixpa. Nhũm htem Kris ã mẽ ixtak rũnh nẽ. Pa mẽ inhõrkwỹ hkêt nẽ nhãm ri ixpa nẽ nhãm ri ixpa. Na pa htem arĩ ã amnhĩ nhĩpêx anhỹr o ri ixpa. 12-13Nẽ ixàpkur xà kaxyw ixàpênh rũnh o ri ixpa. Nhũm hte mẽ kãm Jesus prãm kêt xwỳnhjaja mẽ ijapry ho pa htã pa mẽ amnhĩ kurom mẽ kãm ixkapēr mex nẽ mẽ kãm:

—E kê Tĩrtũm mẽ ato mex nẽ ka mẽ amex nẽ apa. Anẽ.

Nẽ mẽ kot mẽ inhĩpêx kati htã pa htem mẽ kutã amnhĩ to htỳx nẽ arĩ mẽ hkôt ixpa. Na htem te mẽ kot ahpunuj nhĩpêx pyrãk o mẽ inhĩpêx nẽ mẽ ixwỳr mrrar kêt nẽ. ã na htem mẽ ixte Jesus nhỹ hã mẽ ahkre o mẽ ixpa xwỳnhjẽ nhĩpêx anẽ.

### **Pawre te kệp mẽ hpãm pyrãk ã kot amnhĩ jarênh**

*Wam Tesarõn 2.11-12*

14-15E Kris kôt ixkwỳjaja. Na pa ã mẽ amã kagà nẽ mẽnh anẽ. Nom mẽ ate inhmar nẽ amnhĩ kamã apijaam kaxyw kêt. Inhmã mẽ ajapê jakamã na pa ã mẽ amã ixkapēr nẽ hã kagà nẽ mẽnh anẽ. Na mẽ ra ohtô nẽ ixpãnhã mẽ awỳr pa nẽ mẽ amã Tĩrtũm kapēr o mẽ ajahkre. Nom ixkumrẽx na pa pre mẽ amã kapēr jarẽ ka prem inhma nẽ Kris hkôt amnhĩ xunhwỳ nẽ amnhĩ kaxyw hkôt ajamaxpēr tỳx nẽ. Jakamã paxipix te ixpê mẽ apãm nhũm te mẽ apê ixkra pyrãk. 16Jakamã kwa mẽ ixte amnhĩ nhĩpêx kôt ixpumu nẽ ixkôt mãn kêt mẽ amnhĩ nhĩpêx o ri apa. 17Ã mẽ ate amnhĩ nhĩpêx anhỹr kaxyw na pa pre ijamaxpēr nẽ ma mẽ awỳr Ximotre mẽ. Haxwỳja Kris kôt te kệp ixkra pyrãk. Nẽ inhmã hapêê. Na hte jar Kris mã tanhmã amnhĩ nhĩpêx mex to ho pa. Tã pa pre mẽ awỳr kumẽ. Kojã ma mẽ awỳr mõi nẽ pøj nẽ mẽ amã Kris kapēr jarênh o ri mẽ akôt pa. Nẽ mẽ amã tanhmã ijarênh to nẽ mẽ amã:

—Nà Pawre na hte Jesus Kris jamaxpēr kôt hamaxpēr o pa. Nẽ kot amnhĩ nhĩpêx kôt amnhĩ nhĩpêx o pa. Nẽ krĩ piitã hkôt mẽ kot urãk nẽ ã amnhĩ nhĩpêx o pa anhỹr kaxyw mẽ ahkre mex o pa. Anẽ.

18Nẽ na xep mẽ akwỳjaja te ra àhpumunh tỳx pyrã nẽ tanhmã ijarênh to nẽ ijarênh o:

—Pawreja akupỹn mẽ pahwỳr mõi ã amnhĩ jarênh tã kojã akupỹn mõi kêt nẽ kãm ga. ãm kapēr kati xwỳnh na.

19Anhÿr ã ijarēnh tā koja Tirtūm kām tokyx ma mẽ awÿr inhmōr prām hã kot pa ma mẽ awÿr inhmōr kurê kumrêx. Hãmri nê pōj nê ixprī hã ã mẽ kot ixto kapēr anhÿr xwÿnhtajê pumu. Nê mēhō kot ã mẽ kām ijarēnh anhÿr xwÿnhta ã ahkukja. 20Tirtūm krajaja na htem hkôt pix mã amnhī nhīpêx jakamã na htem hkôt tanhmã amnhī nhīpêx to hã mẽ omu nê rī kormã kêp hkra hã mẽ harê. Tã kot paj nhÿrmã mẽ awÿr pōj nê ã ixto kapēr anhÿr xwÿnhjê pumu nê ixprī hã mẽ kot amnhī nhīpêx ã mẽ omu nê rī kormã tanhmã mẽ harēnh to. Jao Tirtūm nhÿ hã mẽ kot mẽ ajahkre hã mẽ omu rÿ amnhī krã hkôt mẽ kot mẽ ajahkre hã mẽ omu nê rī kormã tanhmã mẽ harēnh to. 21Jakamã kwa mẽ tokyx ixkutêp tãm amnhī nhīpêx o ri apa. Kêr pa mō nê mẽ awÿr pōj nê mẽ ate tãm amnhī nhīpêx ã mẽ apumu nê ixkīnh nê. Nê mẽmoj tã mẽ amã ixàkjêr kêt nê. Nê mẽ amã ixkapêr mex pix o ri mẽ amã ixkapêr. Te mẽ hipêêxà kot hkrajê mã kapêr mex pyræk o mẽ amã ixkapêr mex nê. Hãmri pu mẽ xpêñ pumu nê pahkīnh nê.

### Mēhō kot tanhmã amnhī tomnuj to hã harēnh

*Sikūn Korīt 2.5-11*

**5** 1Nê kwa na pa pre tee ri mẽ anhīōja jarēnh ma nê ixkaprī htÿx nê. Na xep hte amnhī tomnuj tÿx pê nã puro hã hpijaam kêt o pa. Kwa mẽ pahpê Kris kwÿjjaja mẽ pahte ã amnhī nhīpêx anhÿr kêt nhūm mẽ kot Kris kôt amnhī xunhwÿr kêt xwÿnhjaja haxwÿja ã amnhī nhīpêx anhÿr kêt tā nhūm ra mẽ anhīōja kot Kris kôt amnhī xãm tā ã amnhī nhīpêx anê. Kwa ja omnuj tÿx kumrêx. 2Na xep ri ã amnhī nhīpêx anhÿr o pa ka mẽ ja hã omu nê ãm omu nê nê tanhmã kām nê hkêt nê. Amarī hã omunh o ri hkôt apa. Mẽ ate Tirtūm kôt axàhpumunh tÿx ã amnhī jarēnh tā no ãm ja hã omu nê ãm hã omu nê nê tanhmã kām nê hkêt nê. Kwa nà. Mẽ tee ri kot ã amnhī nhīpêx anhÿrja ã omu nê akaprī nê hkêt wehe. Nê mẽ tokyx amnhī nê hano kê mẽ akôt Tirtūm mã amnhī jarēnh xà hã ixkre hwÿr axte mrrar kêt nê.

3-5Ixte mẽ apê awry htã ã kot amnhī nhīpêx anhÿr ã harēnh ma nê hkukamã tanhmã ijamaxpêr to. Nà ra ixte mẽ awÿr ixpōx ronhÿx pa mẽ ato akuprō. Pahihti Jejus nhÿ hã mẽ ato akuprō nê mẽ amã kot amnhī tomnuj xwÿnhta jarê nê mẽ anê hanor kurê kumrêx. Jakamã e kêr ka mẽ māmri ã amnhī nê hipêx anê. Mẽ panhō Pahihti Jejus nhÿ hã amnhī nê hano nê te Satanasti mã rer pyræk kê tee ri ja hã amnhī pumu nê tokyx kām urer japêr. Hãmri nê akupÿm tãm amnhī nhīpêx. Kê nhÿrmã Pahihti akupÿn mẽ pahwÿr wrÿ nhūm ma mẽ pahkôt õ krī hwÿr api.

6Mẽ ate Tirtūm kapêr jarēnh mar mex ã amnhī jarēnh tā kormã amnhī nê ã kot amnhī nhīpêx anhÿr xwÿnhta janor kêt nê. Kwa mẽ tokyx amnhī nê hano. Na htem pãwti nhīpêx kaxyw nê kamã kot ho hikot xà ho hkryre nê kamã kurê nê gaa nê rī ho piitã hikot pa. Ja pyrã nê kot ka

mẽ amnhĩ nê kot amnhĩ tomnuj xwỳnhhta janor kêt nê hãmri nê gaa nê ra uràk nê apiitã ã amnhĩ nhĩpêx anhỹr o ri apa.

7Kwa mẽ tokyx amnhĩ nê hano. Kêr ka mẽ arĩ amnhĩ to mex pix o ri axpên kôt apa nê tãm ri amnhĩ nhĩpêx o ri axpên kôt apa. Na pre ra Jejus Kris mẽ pahte amnhĩ to mex o papa kaxyw mẽ panê ty. Mẽ pahpiitã mẽ panê ty. 8Jakamã na pu htem ãm amnhĩ to mex pix o ri papa. Nê tãm amnhĩ nhĩpêx o ri papa. Jao tanhmã amnhĩ tomnuj to ho ri papa hkêt nê.

9Nê wam ixte mẽ awỳr kagà nê mênhta kamã na pa pre mẽ amã:

— Kêr ka mẽ nhãm mẽ kot mênijê kamã hpijaàm kêt o mẽ pa xwỳnhjê hkôt ri apa hkêt nê. ãm ri mẽ hkàx ã apa.

Anhỹr o mẽ amã hã karõ. 10-11Nom na pa pre mẽ piitã ã mẽ nê mẽ akurê anhỹr kêt nê. ãm mẽ kêp Kris kwỳ hã amnhĩ jarênh tã ã ri amnhĩ tomnuj anhỹr xwỳnh pixjaja na pa pre mẽ nê mẽ akurê. Koja mēhõ kêp Kris kôt mẽ pahtõ rỳ mẽ pahtõx ã amnhĩ jarênh tã mẽ kamã hpijaàm kêt o ri pa ka mẽ ja hã omu nê hkôt ri apa hkêt kurê kumrêx.

Nê mẽ kãm nhãm mẽ hkukrêx kĩnh o kãm ho õ hprãm o ri mẽ pa xwỳnhjaja.

Nê sãnti kutã hkõn krã ho rôrõk nê hkrĩ nê kãm mex ã harênh o ri mẽ pa xwỳnhjaja.

Nê mẽ kot axpên to kapêr punuj o ri mẽ pa xwỳnhjaja.

Nê mẽ pipãnh o ri mẽ pa xwỳnhjaja.

Nê axpên pê ri mẽ àhkĩnh o mẽ pa xwỳnhjaja.

Koja mēhõ kêp Kris kwỳ hã amnhĩ jarênh tã ã amnhĩ nhĩpêx anhỹr o ri pa ka mẽ ja hã mẽ omu nê hkôt ri apa hkêt kumrêx. Nê mẽ kutã axàpkur kêt nê. ãm mẽ hkàx ã ri mra.

No mẽ kêp Kris kwỳ hkêt xwỳnhjê nê na pa pre ã mẽ akurê anhỹr kêt nê. Mẽ piitã ã mẽ kot amnhĩ nhĩpêx anhỹr o pa kênã. Na htem axpên kãm hpijaàm kêt o ri pa.

Nê mẽ kãm axpên kukrêx kĩnh o kãm ho õ hprãm o ri pa.

Nê sãnti kutã hkõn krã ho rôrõk nê hkrĩ nê kãm amnhĩ jagrer pê amnhĩ to hwỳr o pa.

Nê mẽ axpên pê àhkĩnh pix o pa.

Kris kwỳ hkêt xwỳnhjaja na htem ã amnhĩ nhĩpêx anhỹr o pa. Tã tanhmã kot ka wem amnhĩ to nê mẽ hkàx ã ri apa? Mẽ piitã ã mẽ kot amnhĩ nhĩpêx anhỹr kênã. Kot puj mẽ nhỹrmã Tĩrtũm nhõ krĩ mex wỳr api nê rĩ kormã mẽ hkàx ã ri papa.

12-13Nê mẽ kêp Kris kwỳ hkêt xwỳnhjaja na pa hte mẽ kot amnhĩ tomnuj ã mẽ omu nê ãm mẽ omu nê tanhmã hã mẽ kãm nê hkêt nê. Tĩrtũm tãm koja nhỹrmã ja hã tanhmã mẽ hipêx to. No koja Kris kôt mẽ pahtõ rỳ mẽ pahtõxjê hõ tanhmã amnhĩ tomnuj to ho pa pu mẽ pahtõ ja hã omu nê nê tanhmã kãm pakapêr to kurê kumrêx. Tĩrtũm kapêr ã kagà htũm kot ja jarênh kot:

Kêr ka mẽ amnhĩ nê Kris kôt akwỳjê hõ kot tanhmã amnhĩ tomnuj to ho pa xwỳnhjê jano. ã harênh kot anhỹr.

**Mẽ pahte Kris kwỳjê ho pakapêr kêt**

*Matêwre 5.38-40*

**6** 1Nê na ka xep htem Kris kôt atõ rỳ atõxjê hõ mẽ ka wa tanhmã axpên tomnuj to nê axtem nê juisti hwỳr axpên to mra. Mẽ apyrà nê kêp Kris kwỳ hkêt tã ka htem ma hwỳr amnhĩ to mra nhũm war axpên tã war ama nê tanhmã war ajarênh to. Kwa mon ka htem axtem nê ã Kris kwỳ hkêt xwỳnhjê hwỳr mẽ amnhĩ to amrar anê? Kêt mẽ Kris kôt anhĩõ hwỳr mãn kêt mẽ amnhĩ to mra nê kumã mãn amnhĩ jarê kê axpên tã war ama nê axpên tã tanhmã war amã kapêr to.

2Ra mẽ ate ja mar tỳx tã hkôt amnhĩ nhĩpêx kêt nê. Mẽmoj ãm greire htã ka wa tokyx akupỹm hã tãm axpên xãm kêt nê. Rỳ Kris kôt war atõjê hõ hwỳr wa amnhĩ to atêm nhũm akupỹm tãm axpên tã war axãm kêt nê. ãm axtem nê mẽ kêp Kris kôt mẽ atõ hkêt xwỳnhjê hwỳr amnhĩ to mra. Kwa mẽ ã amnhĩ nhĩpêx anhỹr kêt nê. Mẽ pahpê Kris kwỳjaja kot puj mẽ nhỹrmã Kris nhĩhkô hã mẽ kêp hkwỳ hkêt xwỳnhjê tanhmã mẽ harênh to. 3Nê Tĩrtũm kapêr o mẽ wrỳk xwỳnhjaja kot puj mẽ määnên nhỹrmã tanhmã mẽ harênh to ho pahkrĩ. Jakamã kwa mãmri ã mẽ pahte amnhĩ nhĩpêx anhỹrja kukamã akupỹm tanhmã axpên xunhwỳr to ho apa. Mẽmoj tã mẽ atõjê hõ wa kot tanhmã axpên to hã wa omu nê tokyx akupỹm axpên tã wa kãm akapêr kê wa tokyx akupỹm tãm axpên nhĩpêx. ã mẽ kot axpên nhĩpêx anhỹr o paja na kêt mex. 4No na ka xep htem arĩ Kris kôt mẽ akwỳ hkêt xwỳnhjê hwỳr axpên to mra nê mẽ kãm amnhĩ jarê. Kwa mẽ ri ã amnhĩ nhĩpêx anhỹr kêt nê. 5Mẽ tokyx tee ri ja hã amnhĩ pumu nê amnhĩ kamã apijaàm kêt wehe. Xà mẽ akamã Kris kôt mẽ atõjê hõ pixire nê kot tãm akupỹm mẽ axunhwỳr kaxyw amrakati kumrêx? 6Na ka xep htem mẽmoj tã axpu. Kris kôt mẽ atõjê hõ mẽ mẽmoj tã axpu nê ra mẽ kêp Kris kwỳ hkêt xwỳnhjê hwỳr amnhĩ to mra. Kot tãm akupỹm mẽ unhwỳr xwỳnhjê hwỳr amnhĩ to mra.

7Mẽ apijapu ho apa jakamã na ka mẽ amnhĩ tomnuj tỳx nê. Hãmri nê te mẽ apê Kris kwỳ hkêt xwỳnh pyrà nê mẽ hwỳr amnhĩ to mra. Kwa kwãr Kris kôt anhĩõ mãmri apê ahkĩ rỳ tanhmã anhĩpêx to. Ka mẽ ãm amnhĩ tã omu kê tapxipix tanhmã amnhĩ tomnuj to. 8Ja mex tã mẽ ate ã amnhĩ nhĩpêx anhỹr kêt. Na ka htem axpên pê ahkĩ. Mẽ ate Kris kôt axpên to atõ nê atõx tã axtem nê ã axpên nhĩpêx anê. Te mẽ apijaàm kêt pyrak o amnhĩ nhĩpêx o ri apa. 9-10Mẽ kot tanhmã amnhĩ tomnuj to xwỳnhjaja koja mẽ nhỹrmã ma Tĩrtũm nhõ krĩ mex wỳr àpir kêt nê. Ra mẽ ate ja jarênh mar tỳx.

Mẽmyjê hõ kot nhãm mẽnijê hõ ho amnhĩ kati xwỳnhjaja.

Nê mẽnijê hõ kot nhãm mẽmyjê hõ ho amnhĩ kati xwỳnhjaja.

Ně mēnijaja axtem ně mẽ kot amnhĩõ ho mjên o ri mẽ pa  
xwỳnhjaja.

Ně mẽmyjaja haxwỳja axtem ně amnhĩõ ho hprõ ho ri mẽ pa  
xwỳnhjaja.

Ně mẽ àhkĩnh o ri mẽ pa xwỳnhjaja.

Ně mẽ kãm nhãm mẽ hkukrêx kĩnh o kãm ho õ hprãm o ri mẽ pa  
xwỳnhjaja.

Ně ri mẽ pipãnh o mẽ pa xwỳnhjaja.

Ně ri axpẽn to kapêr punuj o mẽ pa xwỳnhjaja.

Ně mẽ kot amnhĩ to sãnti hwỳr o mẽ pa xwỳnhjaja.

Ã mẽ kot amnhĩ nhĩpêx anhỳr xwỳnh piitã koja mẽ Tĩrtũm nhõ krĩ hwỳr  
àpir kêt nẽ.

11Kormã mẽ ate Kris kôt amnhĩ xunhwỳr kêt ri na ka pre mẽ  
akwỳjaja ã amnhĩ nhĩpêx anhỳr o ri apa. Tã amnhĩ kaxyw Jejus kôt  
ajamaxpêr ně hkôt amnhĩ xunhwỳ. Hãmri nhũm Tĩrtũm Karõ mẽ Pahihti  
Jejus Krisja wa mẽ anê mẽ ate amnhĩ tomnuj piitã rênh pa ně mẽ apê  
Tĩrtũm kra hã mẽ axunhwỳ ně amnhĩm mẽ ate amnhĩ to mex xwỳnh ã  
mẽ ajarê.

**Mẽ pahte tãm amnhĩ nhĩpêx o papa hã mẽ pamã karõ**

*Matêwre 5.27; Rõmãn 12.1-2; Epes 5.3; Korosê 3.5; Wam Tesarõn 4.1-8*

12Ně na ka hte mẽ akwỳjaja amnhĩ jarênh o:

—Nà na pa hte pa inhmã tanhmã amnhĩ nhĩpêx to hprãm xà hkôt  
amnhĩ krã hkôt amnhĩ nhĩpêx o ri ixpa. Anẽ.

Mẽ ate ã amnhĩ jarênh anhỳr tã no ãm mẽ ate amnhĩ jarênhja mex  
kêt. Měmoj piitã mẽ pamã mex kêt. Na pu htem pamã hprãm xà hkôt  
měmoj to anê ně gaa ně ra ho amnhĩ pyrà ně ho anhỳr pix o papa. Ně  
gaa ně kãm panhũrer kêt kumrêx. Jao ra pahpipãnh pix o ri papa. Rỳ  
paxêx pix o ri papa. Rỳ paxàhkĩnh pix o ri papa. Jakamã kêr pu mẽ pamã  
tanhmã amnhĩ nhĩpêx to hprãm xà hkôt tanhmã amnhĩ nhĩpêx to ho  
papa hkêt nẽ. ãm amnhĩ mẽ amnhĩ kaxyw Jejus mã pajamaxpêr pix nẽ.

13Ně na htem amnhĩ jarênh o:

—Nà kot paj inhmã prãm ně mãmri mẽmoj ku. Ně inhmã nhãm  
mẽhõ kamã ixpijaàm kêt prãm ně mãmri ã amnhĩ nhĩpêx anẽ. Ja tanhmã  
inhmã kute hkêt. Anẽ.

Tã koja nhỹrmã Tĩrtũm mẽ panhĩja o hapêx pa. Na pre mẽ pahte  
nhãm mẽ kamã pahpijaàm kêt o papa kaxyw mẽ panhĩpêx kêt nẽ. ãm  
mẽ pahte mẽ panhĩpêx xwỳnh maatija mã tanhmã amnhĩ nhĩpêx mex to  
ho papa pix kaxyw na pre mẽ panhĩpêx.

14Ně na pre Pahihtija ty nhũm Tĩrtũm akupỹm ho htĩr. Ja pyrà ně  
kot puj mẽ nhỹrmã mẽ pajaxwỳja ty nhũm akupỹm mẽ pahto mẽ pahĩr.  
Ja kaxyw tapxipix pix na àhpumunh tỳx o àhpumunh tỳx. 15Na pu htem

Kris kôt amnhĩ xunhwỳr kôt pahpê hkwỳ nê te pahpê ĩ pyràk. Jakamã kwa mẽ ja hã anohtỳx nê axte nhãm mẽ hkuprỳjê hwỳr amrar nê mẽ ho amnhĩkati hkêt nê. Tĩrtũm kêp ja omnuj. Te mẽ pahte Kris nhĩ pyràk jakamã kot kaj mẽ ã amnhĩ nhĩpêx anhỳr jao te Kris tãm kot ã amnhĩ nhĩpêx anhỳr o pa pyràk. Kwa ja mex kêt. Xà kot we Krisja ã amnhĩ nhĩpêx anê? Nà koja ã amnhĩ nhĩpêx anhỳr kêt nê. 16Tĩrtũm kapêr ã kagà htũm kot ja jarênh kot:

Kot ka mẽ atõ mênijê hõ ho aprõ nhũm kêp aprõ kumrêx. Hãmri nê te ra war atipxi pyràk o axpên nhĩpêx. Anê.

Ã kot aprõ mẽ wa ajarênh anhỳr jakamã kwa kêr ka mẽ atỳx ri nhãm mẽ hkuprỳjê hwỳr apa hkêt nê. Kot kaj mẽ ã amnhĩ nhĩpêx anê nê Tĩrtũm noo mã te ate aprõ kuhpa hã hkuprỳta o aprõ pyràk. Te wam aprõta kuhpa hã war atipxi pyràk. 17Na pu htem Pahihti Jejus Kris kôt amnhĩ xunhwỳ nhũm amnhĩ tã mẽ pahpumu nê mẽ pamã Karõ gõ nhũm mẽ pamã agjê. Pu mẽ ra Karõja kôt te ra Jejus mẽ wa pahtipxi nê ri papa pyràk o axpên nhĩpêx. Jao Kris jamaxpêr mẽ mẽ pajamaxpêrja te wa kot axpên pyràk. Nê Kris kot amnhĩ nhĩpêx mẽ mẽ pahte amnhĩ nhĩpêxja te kot axpên pyràk.

18Jakamã kwa kêr ka mẽ amnhĩ prõ pix tãnopxar o ri apa. Nê mẽ anijaja amjên pix tãnopxar o ri apa. No mẽ nhãm mêmjê ho amnhĩkati ho ri apa hkêt nê. Nê mẽ amyjaja nhãm mênijê ho amnhĩkati ho ri apa hkêt nê. Kot ka mẽ nhãm mêmjoj tanhmã omnuj kute ho anê no ãm amnhĩ nhĩ homnu hkêt nê. Nom kot kaj mẽ nhãm mênijê ho amnhĩkati rỳ nhãm mêmjê ho amnhĩkati hãmri nê ra amnhĩ nhĩ homnu hpa. 19Mê panhĩ kamã na hte Tĩrtũm Karõ agjê nê kamã hkrĩ. Tĩrtũm na pre mẽ pahwỳr kurê nhũm mẽ pahkarõ mã agjê pu mẽ te mẽ pahpê òrkwỳ pyràk. Jakamã na pu htem amnhĩ krã hkôt pahtỳx ri mêmjoj tanhmã ho ho papa hkêt nê. ãm Tĩrtũm jamaxpêr xà hkôt pix mã na pu htem tanhmã mêmjoj nhĩpêx to ho papa. 20Na pre ra Jejus mẽ pahte amnhĩ tomnuj pãnhã amnhĩrer kaxyw mẽ pahpiitã mẽ panê ty. Te htyk o amnhĩm mẽ pajaprõr pyràk o mẽ panhĩpêx. Jakamã kwa kêr pu mẽ ãm hkôt pix mã mãn ri amnhĩ nhĩpêx rãhã ho ri papa. Kê mẽ pahkwỳjaja ja hã mẽ pahpumunh kôt Tĩrtũm mã mex o mex ã harênh o ri pa.

**Mê mjên mẽ mẽ hprõ wa kot axpên to mex ã mẽ pamã karõ**

*Epes 5.22; Korosê 3.18; Eprêw 13.4*

**7** 1Nê ota mẽ ate ixwỳr kagà nê mênhta na pre ixwỳr pøj pa omu. Nê kamã mẽ ate mẽ aprõ hã ixkukjêr xwỳnhhta pa kamã harê nê omu. Tã kot paj mẽ amã tanhmã harênh to ka mẽ inhma.

Nà kot ka mẽ amyjê hõ amã aprõ hkêt nê ahte ri apa hprãm nê kam nê aprõ hkêt apa. Ja tanhmã kute hkêt. Nom kêr ka mẽ hkuprỳjê ho presija ho ri apa hkêt nê. 2Na htem tõhã kãm hprõ hprãm kêt nê ri pa

ně gaa ně mẽ hkuprÿjê hõ pumu rÿ mẽ kêp mẽ hprõjê hõ pumu ně kamã hpijaam kêt o ri pa. Ja pymaj kêr ka mẽ amyjaja mãmrĩ aprõ ně mẽ anijaja mãmrĩ amjên.

3Ně mẽ anijaja. Koja mẽ amjên akamã hkurê ka mẽ mãmrĩ kãm amnhĩ gõ kê mẽ anĩ. Ně mẽ amyjaja mãänën. Koja mẽ aprõ mẽ akamã hkurê ka mẽ mãmrĩ mẽ anĩ. 4Ãm ka amã tanhmã amnhĩ nhĩpêx to hprãm xà hkõt pix mã amnhĩ nhĩpêx kêt ně. Mãänën amã aprõ kot kãm tanhmã amnhĩ nhĩpêx to hprãm xà hkõt mãänën hkõt kãm amnhĩ nhĩpêx.

5Ně kot kaj mẽ mẽmo arĩgro hã amã Tirtũm mã amnhĩ jarênh ryy hprãm japêr. Hãmri ně aprõ mã:

—E kot puj jarãhã axpên to amnhĩkati hkêt ně. Kot puj ãm Tirtũm pix mã amnhĩ jarênh o amÿkry. Anê.

Hãmri ně mãmrĩ ã amnhĩ nhĩpêx anê. No kwa kêr ka mẽ ãm ja ho anhÿr o apkati pixi ně kãm anhũre. Nhũm jãã ka mẽ amã axpên to amnhĩkati hprãm ně mãmrĩ tanhmã axpên nhĩpêx to. No kot kaj mẽ ã amnhĩ nhĩpêx anhÿr kêt o hã atã apkati xohtõ ně gaa ně ra akurê xàj axtem ně Satanasti jamaxpêr o ajamaxpêr. Jao nhãm mēhõ ni hwÿr mra ně aprõ kuhpa hã kamã akurê ho kamã apijaam kêt. Rÿ nhũm mēnijaja nhãm mẽmyjê hõ hwÿr mra ně mjên kuhpa hã kamã hkurê ho war axpên kamã hpijaam kêt.

6E mẽ ate ja hã ixkukjêr jakamã na pa ã ixprĩ hã mẽ amã ja jarênh anê. Ka mẽ akwÿjaja amã aprõ hprãm ně mãmrĩ aprõ ně ri apa. Ně mẽ akwÿjaja amã aprõ hprãm kêt ně mãmrĩ aprõ hkêt ně ri apa. Nom kot pa paa mẽ amã mẽ aprõ hã ixãmnênh kêt ně. Ka mẽ kam amnhĩ krã hkõt ajamaxpêr xà hkõt tanhmã amnhĩ nhĩpêx to. 7Na pa hte ixprõ hkêt ně ri ixpa nom inhmã ja mex pa hte ahte ixpa.

### Mě mjên kêt ně mẽ hprõ kêt xwÿnhjê jarênh

Ně kormã mẽ aprõ hkêt xwÿnhjaja. Ka mẽ ixpyrà ně aprõ hkêt ně ri apa ronhÿx inhmã ja mex ně. Na hte mẽmy hkwÿjaja hprõ kêt ně ri pa nhũm Tirtũm ja hã mẽ omu ně tanhmã mẽ ho nhũm mẽ mex ně ri pa ně mēnijê kamã hkurê ho mẽ kamã hpijaam kêt o ri pa hkêt ně. No na hte mẽ hkwÿjaja hprõ hkêt ně ri pa ně gaa ně ra hkurê xàj mēnijê kamã hpijaam kêt. ã mẽ ate amnhĩ nhĩpêx anhÿr pymaj kêr ka mẽ amã aprõ hprãm ně mãmrĩ aprõ. Tirtũm mã ja mex kênã.



Wam Korĩt 7.1-5

8E mẽ aprõ hkêt nõ mẽ amjên kêt xwýnhjaja. Nẽ ra mẽ apê mẽ aprõ htyk rỳ mẽ amjên htyk xwýnhjaja. Pa mẽ amã mẽmoj jarẽ. Nà kot kaj mẽ ixpyrà nõ mẽ aprõ hkêt nõ ri apa rỳ mẽ amjên kêt nõ ri apa nhũm ja inhmã mex nõ. 9No kot ka mẽ atõ ra akurẽ japêr nõ mãmrĩ aprõ rỳ mãmrĩ amjên. Ja mããnẽn tanhmã kute hkêt.

### Mẽ pahte xypẽn kaga hkêt ã mẽ pamã karõ

*Matêwre 5.31, 19.3-9; Makre 10.2*

10E kot paj hpãnhã ra mẽ ate xypẽn to amjên nõ xypẽn to aprõ xwýnhjê mã ixkapêr. Nom kot paj amnhĩ krã hkõt tanhmã ixkapêr to hkêt nõ. Pahihti Jejus Kris kapêr xà hkõt kot paj mẽ amã ixkapêr. Jakamã e kêr ka mẽ anijaja mẽ amjên kaga hkêt nõ. 11Nom kot kaj mẽ tanhmã ajamxpêr to nõ hkaga japêr hãmri nõ ahte ri apa nõ axte nhãm mẽhõ ho amjên kêt nõ. Rỳ tee ri amnhĩ kukamã ajamxpêr nõ mãmrĩ akupỹm amjênta wỳr tẽ nõ akupỹm hkõt ri apa. No kêr ka mẽ axte nhãm mẽhõ ho amjên kêt nõ.

Nẽ ra mẽ amyjaja kêr ka mẽ ajaxwỳja ã amnhĩ nhĩpêx anẽ nõ mẽ aprõ kaga hkêt nõ. E kêr ka mẽ ã amnhĩ nhĩpêx anhỹr o ri apa.

12Nẽ mẽ ate ixwỳr kagã mẽnh kamã xypẽn tã ixkukjêrta kot paj hpãnhã mẽ amã harẽ. Na Pahihti Jejusja ja hã tanhmã inhmã nõ hkêt nõ. ãm amnhĩ krã hkõt kot paj mẽ amã tanhmã harẽnh to ka mẽ inhma.

Ka mẽ amyjê hõ ra Kris kõt amnhĩ xãm nom nhũm aprõ kormã hkõt amnhĩ xãm kêt japêr. Nom koja kãm arĩ ri akõt pa hprãm ka hkaga hkêt nõ. Kê arĩ ri akõt pa. 13Nẽ mẽ anijaja. Ka mẽ ajaxwỳja ra apê Kris kwỳ hã ri apa nhũm amjên kêt hwỳ hkêt tã arĩ ri akõt pa hprãm nõ arĩ ri akõt pa ka hkaga hkêt nõ. 14Kêp Kris kwỳ hkêt tã koja akõt Kris kwỳjê hkõt ri pa. Rỳ mẽ aprõ kêt Kris kwỳ hkêt tã koja akõt Kris kwỳjê hkõt ri pa. Jao Tirtũm kapêr mar o pa nõ gaa nõ apyrã nõ hkõt amnhĩ xãm japêr. Nẽ mẽ akra kêt Kris kwỳ hkêt xwýnhjaja haxwỳja mẽ akõt Kris kwỳjê hkõt ri pa nõ Tirtũm kapêr mar o pa nõ gaa nõ akõt Jejus kõt amnhĩ xunhwỳr japêr.

15Nom koja aprõ kêt Kris kwỳ hkêt ã kãm akaga hprãm nõ rĩ tãm mãmrĩ akaga. Rỳ amjên kêt Kris kwỳ hkêt ã kãm akaga hprãm nõ rĩ tãm mãmrĩ akaga. Kêr ka mẽ kot akaga nê tee ri kãm tanhmã akapêr to hkêt nõ. Kwãr mãmrĩ akaga ka ahte ajamakêtkati nõ axãmnhĩx ri apa. Mẽ pajamakêtkati nõ mẽ pamex nõ ri papaja na Tirtũm kãm hprãm.

16No koja amjên kêt Kris kwỳ hkêt tã kãm mẽ akaga hprãm kêt nõ ka mẽ hkaga hkêt nõ. Rỳ aprõ kêt Kris kwỳ hkêt tã ka mẽ kam hkaga hkêt nõ. Koja arĩ ate amnhĩ nhĩpêx ã apumunh o ri akõt pa nõ gaa nõ rĩ apyrã nõ Kris kõt amnhĩ xãm japêr. 17Jakamã kot ka mẽ aprõ rỳ amjên ra Kris kõt ahte amnhĩ xãm. Hãmri nõ wa arĩ ri xypẽn kõt ri apa ho apa. Na pa hte krĩ piitã hkõt Jejus kõt mẽ pahkwỳjê mã ã ixujarênh anhỹr o ri ixa. Tã kêr ka mẽ ã amnhĩ nhĩpêx anhỹr o ri apa.

### **Kris kôt amnhĩ xunhwÿr kêt ri tanhmã mẽ pakute hã mẽ pajarênh**

18Ja pyrã nê kot kaj mẽ ra amy kwrÿt kà jakàr japêr. Tã ra Kris kôt amnhĩ xãm nê arĩ arãhã ri apa. Rÿ amnhĩ jakàr kêt rãhã hkôt amnhĩ xãm japêr nê arĩ arãhã ri apa. Mo kaxyw kot ka kêt amnhĩ jakà? 19Tĩrtũm na hte mẽ pahte amnhĩ my kwrÿt kà jakàr ã mẽ pahpumunh kôt tanhmã mẽ pajarênh to hkêt nê. Rÿ mẽ pahte amnhĩ jakàr kêt ã mẽ pahpumunh kôt mããnên tanhmã mẽ pajarênh to hkêt nê. ãm mẽ pahte hkôt amnhĩ nhĩpêx pix ã mẽ pahpumunh kôt na hte tanhmã mẽ pajarênh to. 20Jakamã kêr pu mẽ pahte Kris kôt amnhĩ xunhwÿr kêt ri tanhmã mẽ pakuteja arĩ rãhã ri papa. 21Ka mẽ akwÿjaja ate nhãm mẽ kãm mẽ axapênh o apa htã Jejus kôt amnhĩ xunhwÿ. Tã kêr ka mẽ mãmrĩ mẽ kãm axapênh o ri apa. Nom koja anhõ patrãwja amnhĩ nê mẽ ajano ka mẽ mãmrĩ ma mra nê amnhĩ mã tanhmã axapênh to ho ri apa.

22Nê koja mẽhõ Kris kôt amnhĩ xãm. Tanhmãn kêp mẽ õ patrãw rÿ kot mẽ kãm mẽ àpênh xwÿnhjê hõ. Tã Kris kôt amnhĩ xãm hãmri nê arĩ amnhĩ nhĩpêx tũm kôt ri amnhĩ nhĩpêx o pa hkêt nê. Ra Kris kôt amnhĩ nhĩpêx nyw o amnhĩ nhĩpêx o pa. Jao ra tanhmã amnhĩ tomnuj to hkêt nê. Te kot õ patrãw punuj kaga nê hpãnhã õ patrãw mex kapêr kôt amnhĩ nhĩpêx pix o pa pyrãk.

23Na pre Jejus mẽ pahte amnhĩ tomnuj piitã hpãnhã amnhĩrer kaxyw mẽ panê ty. Te htyk o kot amnhĩm mẽ pajaprõr pyrãk o mẽ panhĩpêx. Jakamã kwa kêr ka mẽ jar mẽ anhõ patrãw kôt pix mã amnhĩ nhĩpêx o ri apa hkêt nê. Mẽ mããnên Tĩrtũm kapêr kôt amnhĩ nhĩpêx o ri apa. 24Jakamã kêr pu mẽ pahte Kris kôt amnhĩ xunhwÿr kêt ri tanhmã mẽ pakuteta pu mẽ arĩ rãhã ri hã papa.

Ra mẽ pahte amnhĩ jakà rÿ mẽ pahte amnhĩ jakàr kêt.

Rÿ ra mẽ pahte nhãm mẽhõ mã paxapênh o papa rÿ amnhĩ mã paxapênh o papa.

Rÿ ra mẽ pahprõ nê ri papa rÿ mẽ pahprõ hkêt nê ri papa.

Pu mẽ pahte Kris kôt amnhĩ xunhwÿr kêt ri tanhmã mẽ pakuteta ãm arĩ rãhã hã ri papa. Jao Tĩrtũm kãm hprãm xà kôt pix mã amnhĩ nhĩpêx o ri papa.

### **Mẽ hprõ nê mẽ mjên kêt xwÿnhjê jarênh**

*Matêwre 19.10-12*

25Nê mẽ ate ixwÿr kagã mênhta kamã na ka mẽ mããnên kormã mẽ hprõ hkêt xwÿnhjê hã ixkukja. Tã kot paj mẽ amã tanhmã mẽ harênh to. Nom Pahihti Jejus Kris na pre ja hã tanhmã inhmã nê hkêt nê. ãm pa kot paj ãm amnhĩ krã hkôt tanhmã hã mẽ amã ixkapêr to. Na pre Pahihti mẽ akaxyw tanhmã ixkrã hto pa hte ÿ hã tanhmã mẽ amã mẽmoj tã karõ hto ho ri ixpa. Jakamã e mẽ inhma nê inhmar tÿx nê.

26-27 Nà ra mẽ kãm mẽ pahkurê xwỳnhjaja Kris ã mẽ pahtomnuj o pa jakamã koja ixpyrà nê mẽ hprõ hkêt rãhã mẽ pa xwỳnhjaja ahte ri pa nhũm ja mex nê. Nhũm mẽ umaj amnhĩ pix tãnopxar o ri pa. Nê mẽ aprõ xwỳnhjaja kêr ka mẽ kãm mẽ pahkurê xwỳnhjê pymaj mẽ aprõ kaga hkêt nê. ãm pix tãnopxar o ri apa.

28 Tã kot ka mẽ atõ amã aprõ hprãm nê mãmri aprõ. Ja määnên tanhmã ixpê kute hkêt. Nê mẽ anijaja mẽ amã amjên prãm nê mãmri amjên. Ja tanhmã ixpê kute hkêt. Nom kot ka mẽ akwỳjê pyrà nê aprõ rỳ amjên. Nê gaa nê akra. Hãmri nê tanhmã mẽmoj kute kamã ka tee ri wa mẽ amnhĩ kukamã ri ajamxpêr o ri apa. Ja pymaj na pa hte mẽ amjên kêt nê mẽ aprõ hkêt ã mẽ amã awjarê.

29 Nê Kris tokyx akupỳn mẽ pahwỳr wrỳk kaxyw jakamã kwa ra mẽ aprõ nê apa xwỳnhjaja. Kêr ka mẽ amnhĩ prõ nê amnhĩ kra pix kukamã ajamxpêr o ri apa hkêt nê. Te ho mẽ hprõ hkêt nê mẽ pa xwỳnhjaja kot amnhĩ nhĩpêx pyrà nê Kris kutêp kumrêx mã ajamxpêr pê tanhmã amnhĩ nhĩpêx to ho apa nê arĩ kormã aprõ nê akrajê ho hapu nê tanhmã mẽ kutã anojarêt to ho apa.

30 Kris kot tokyx akupỳn mẽ pahwỳr wrỳk jakamã kwa mẽ ri amỳr o ri mẽ apa xwỳnhjaja. Kêr ka mẽ kutêp tee ri amnhĩ kaprĩ pix mã ajamxpêr o akaprĩ nê ri apa hkêt nê. Nê mẽ akĩnh nê ri apikunhar o ri mẽ apa xwỳnhjaja kêr ka mẽ Kris kutêp amnhĩ kĩnh xà pix mã ajamxpêr o ri apa hkêt nê. Nê ri mẽ axujaprõr o ri mẽ apa xwỳnhjaja kêr ka mẽ Kris kutêp tanhmã axujaprõr to pix kukamã ri ajamxpêr kêt nê. 31 Nê mẽ apê mẽ ate mẽmoj to wênê ho ri mẽ apa xwỳnhjaja Kris kutêp ãm ri mẽ akukrêx pix kukamã ajamxpêr kêt nê. Koja mẽ panhõ pika piitã hkôt mẽ pakukrêxja nê mẽmoj piitã arĩ rãhã hkêt nê. 32 Jakamã kot kaj mẽ akukrêx pix kukamã ajamxpêr nê amnhĩ pix kukamã ajamxpêr nhũm ja apê omnuj nê. Kris kwỳ pê mẽ hprõ hkêt xwỳnhjaja na htem Pahihti Jejus Kris kãm hprãm xà hkôt pix mã kãm tanhmã amnhĩ nhĩpêx to ho ri pa hprãm. Jao ãm pix kutã tanhmã nojarêt to rãhã ho ri pa. 33 No kêt ra mẽ hprõ nê mẽ pa xwỳnhjaja na htem hprõ pix kukamã kãm tanhmã amnhĩ nhĩpêx to ho pa hprãm. Jao pix kukamã amnhĩ nhĩpêx o pa. 34 Mẽ kãm Tirtũm kapêr kôt amnhĩ nhĩpêx prãm tã no ãm määnên kãm hprõ kapêr mar nê hkôt kãm tanhmã amnhĩ nhĩpêx to ho ri pa hprãm.

Nê mênijaja kot Jejus kôt amnhĩ nhĩpêx nê kormã mẽ mjên kêt xwỳnhjaja na htem kãm Pahihti Jejus kãm hprãm xà hkôt pix mã kãm tanhmã amnhĩ nhĩpêx to ho pa hprãm. Nê ãm pix mã hamxpêr o pa. Nê ãm hkôt pix mã amnhĩ nhĩpêx o pa. No ra mẽ mjên nê mẽ pa xwỳnhjaja na htem arĩ ri mẽ hikukrêx tãnopxar o pa. Nê mjên mã hprãm xà hkôt tanhmã kãm amnhĩ nhĩpêx to ho pa. Jakamã tanhmã kot wem amnhĩ to nê Jejus kãm prãm xà hkôt pix mã amnhĩ nhĩpêx o pa?

35E ixte mẽ ato ajuta kaxyw na pa ã mẽ amã ixkapêr anê. Jakamã na pa mẽ ate mẽhõ ho aprõ nê mẽ akurê hkêt nê. ãm mẽ ate Tirtũm kapêr kôt pix mã amnhĩ nhĩpêx o apa hã na pa mẽ amã karõ. Mẽ ate kumã pix mã ajamaxpêr o ri apa pix kaxyw. Nê kumã pix mã tanhmã ri amnhĩ nhĩpêx to ho apa kaxyw na pa mẽ amã tanhmã mẽmoj tã karõ hto.

### Mẽ kot mẽ hprõ mã xwỳnhjê jarênh

36E kot paj hpãnhã mẽ ate mẽhõ ho aprõ mã xwỳnhjê mã ixkapêr ka mẽ ixkapêr ma. Nà kot kaj mẽ atõ ate ho aprõ mã xwỳnhhta kukamã ajamaxpêr o:

— Nà kot paj ho ixprõ hkêt nê. Inhmã hkĩnh tỳx tã kot paj ho ixprõ hkêt nê. Kot paj ãm ixprõ hkêt nê ahte ri ixpa. Anê.

Hãmri nê ahte ri apa. Tã ra tee amnhĩ kurê kamã ama nê ajamaxpêr o:

— Hêxta waa nê. Mon pa pre ho ixprõ hkêt nê ahte ri ixpa? Anê.

Hãmri nê mãmrĩ ma hwỳr tẽ nê kãm amnhĩ jarẽ nê ho aprõ. Ra ate aprõ hkêt nê ahte ri apa hã amnhĩ jarênh tã no ãm mãmrĩ ho aprõ. Ja tanhmã kute hkêt kênã. 37Nom kot kaj ho aprõ hkêt ã amnhĩ jarẽ nê mããnên akurê hkêt nê ri apa. Hãmri nê mãmrĩ ho aprõ hkêt nê ri ahte ri apa. Ja mããnên tanhmã kute hkêt. 38Kot ka ho aprõ nê war amex nê apa. Rỳ kot ka ho aprõ kêt nê mããnên amex kumrêx nê ri apa. Ja na mex o ate mẽhõ ho aprõ nê ho apata jakrenh.

### Mẽ kêp mẽ mjên tyk xwỳnhjê jarênh

39E kot paj hpãnhã mẽ apê mẽ amjên tyk xwỳnhjê mã ixkapêr. Nà koja amjên arĩ htĩr ri ka ãm hkõt pix mã axkamẽ nê hkaga hkêt nê. No koja nhỹrmã apê ty hãmri ka tee ri amnhĩ kukamã ajamaxpêr hãmri nê amã axte amjên prãm nê mãmrĩ axte amjên. Nom kwa kêr ka mẽ amnhĩ pyrã nê Kris kôt akwỳjê hõ pix o amjên. No mamrĩ nhãm mẽhõ ho amjên kêt nê. 40No kot ka mẽ axte amjên kêt nê ahte ri apa hãmri nê axãmnhĩx ri ajamakêtkati nê apa. No na pa ãm amnhĩ krã hkõt mẽ amã ã ja jarênh anê. Mãn Tirtũm Karõ mã mããnên ja mex nê.

### Sãnti hã mẽ apkur xà jarênh

*Rõmãn 14.13-23; Wam Korõt 10.14-22, 13.2; Karatas 5.13;*

*Wam Pêtre 4.8; Wam Juãw 3.18*

**8** 1Nê mẽ ate ixwỳr kagã mênhta kamã na ka prem mããnên sãnti hã mẽ apkur xà hã ixkukja. Tã kot paj mẽ amã tanhmã ja jarênh to ka mẽ inhma.

Nà na hte Kris kôt pahkwỳ hkêt xwỳnhjaja mẽmo karõ ho sãnti nhĩpêx mã mẽõ hkwỳ nhĩpêx nê hwỳr o mra. Hãmri nê hpar pê haxwỳ nê kutã hkõn krã ho rõrõk nê hkrĩ nê kãm mex o mex ã harẽ nê kãm amnhĩ jagrer pê amnhĩ to kuwỳ. Hãmri nê kãm amnhĩ jagrer pa nê

akupỹm amnhĩm mẽõta jamỳ nẽ ma o mra nẽ hkwỳjê mã ho wẽnê. Na htem ã amnhĩ nhĩpêx anhỹr o pa. Tã na ka prem kagãta kamã mẽ ate mẽ kêp mẽõ japrõr nẽ hkur ã ixkukja. Nã ra mẽ ate sãnti pumunh mex. ãm mẽ kot ãhkra pix o hipêx ã omunh mex jakamã na pu htem hã pamã mẽ apkur xãta hkur prãm nẽ mãmrĩ paxãmnhĩx ri kuku. Ja tanhmã Tĩrtũm pê kute hkêt. Ra mẽ pahte ja pumunh mex. Tã nom kwa kêr pu mẽ ja hã Kris kõt mẽ pahkwỳjê mã amnhĩ to jarkrar o ri papa hkêt nẽ. Nẽ ja hã mẽ kurom paxãhpumunh tỳx ã mẽ kãm amnhĩ to jarkrar hkêt nẽ. Kot pu mẽ ã amnhĩ nhĩpêx anhỹr o mẽ hamaxpêr o hihtỳx hkêt nẽ. Kêr pu mẽ ãm mẽ kamã paxukapřĩ pê tanhmã mẽ ho mex to ho papa. Nẽ Kris kõt mẽ hamaxpêr o hihtỳx o papa. ã mẽ pa hte amnhĩ nhĩpêxja na Tĩrtũm kãm hprãm. 2No koja mẽhõ mẽmoj pumunh tỳx ã amnhĩ to jarkrar o ri pa nẽ ãm tee ri ã amnhĩ jarênh anhỹr kapřy. 3No koja mẽhõ ãhpumunh tỳx kêt tã kãm Tĩrtũm kĩnh nhũm amnhĩ tã omu nẽ kãm hapê nẽ ho hkra. Kêt ja na mex o mex.

4E kot paj ixprĩ hã mẽ amã tanhmã sãnti hã mẽ apkur xãta jarênh to ka mẽ inhma. Nã Mẽpahpãmja pixii. Axtem hõ hkêt. Nom mẽ kot sãnti nhĩpêxta ãm mẽ kot ãhkra o hipêx jakamã htĩr kêt. Ra mẽ pahte ja jarênh mar tỳx nẽ omunh mex. 5Na htem ohtõ nẽ ri sãnti kêp Mẽpahpãm ã hkamnhĩx o pa. Kaxkwa kamã mẽmo karõ nhĩpêxja nẽ pika kamã mẽmo karõ nhĩpêxja nhũm htem kêp Mẽpahpãm ã harênh ho pa. Nom ja kot anhỹr kêt. 6Mẽpahpãmja ãm pixi ho pixi mex. Mẽ panhõ Tĩrtũmja. Tãm na pre mẽmoj piitã ho kator pa. Jakamã na pu htem kapêr kõt pix mã amnhĩ nhĩpêx o ri papa.

Nẽ mẽ panhõ Pahihti haxwỳja pixii. Pahihti Jejus Krisja. Na pre Tĩrtũm nhĩhkõ hã mẽmoj piitã ho kator pa. Na pu htem ja hã omunh xã hkõt ri pamex nẽ ri papa. Ra mẽ pahte ja jarênh mar tỳx nẽ omunh mex. Jakamã na pu htem paxãmnhĩx ri mẽmoj piitã hkur o papa. Tĩrtũm kot mẽmoj piitã ho kator par kênã. 7Tã no ãm ham mẽ kot Kris kõt amnhĩ xunhwỳr xwỳnhjaja na htem mẽ pahkĩnhã kãm sãnti hã mẽ apkur xã hkur puma nẽ. Ham mẽ kot sãnti kaga nẽ amnhĩ kaxyw Kris kõt amnhĩ xunhwỳr jakamã kormã Tĩrtũm kõt amnhĩ nhĩpêx tohtuj anẽ. Jakamã na htem tee ri sãnti hã mẽ apkur xãja pumu nẽ hamaxpêr o:

—Nã kot paj ja kur kêt nẽ. Kot paj anẽ nhũm apu Tĩrtũmja pê ja omnuj nẽ. Anẽ.

8Nom na kêt hte Tĩrtũm mẽ paxãpkur xã hã mẽ pahpumunh kõt mẽ pahte amnhĩ to mex xwỳnh ã mẽ pajarênh kêt nẽ. Kot puj mẽ mẽmoj ku rỳ mẽmoj kur kêt nẽ nhũm ja hã mẽ pahpumunh kõt tanhmã mẽ pamex ã pajarênh to hkêt nẽ. Jakamã na pu htem mãmrĩ paxãmnhĩx ri mẽmoj tã mẽ apkur xã hkur o papa nẽ tanhmã amnhĩ to hkêt nẽ. 9-10Nom kwa mẽ okora. Kêr ka mẽ sãnti mã amnhĩ jarênh xã hã ixkre hwỳr agjêx nẽ kamã axãpkur hkêt nẽ. Kot kaj mẽ atõ ã

amnhĩ nhĩpêx anê nhũm mēhō kormã kot Kris kôt amnhĩ xãm tohtuj anhỹr xwỳnhja ja hã mē apumu nē tee ri hamaxpêr. Axàhpumunh tỳx ã ate amnhĩ jarēnh tã sãnti nhōrkwỳ kamã axàpkur o nhỹ nhũm ja hã apumu nē tanhmã amnhĩ nhĩpêx to wehe? Koja ja kêp omnuj tã apyrà nē tē nē axà nē mē kutã apku. Hãmri nē apkur pa nē tee ri amnhĩ kukamã hamaxpêr o:

—Hêxta waa nē. Kwa mon pa axtem nē ri ã mēmojjã kur anê? Nà na pa anê nē ra amnhĩ tomnuj tỳx nē. Anê.

Hãmri nē hkaprĩ nē pa. **11**Ate axàhpumunh tỳx ã amnhĩ jarēnh tã amnhĩ kôt atōja mex kukamã ajamaxpêr kêt nē. Kris ra mỳrapê htyk tã nhũm ã ate sãnti hã mēō hkur ã apumu nē tee ri hamaxpêr o Jesus hkôt amnhĩ nhĩpêx mex kêt nē. **12**Kormã kot Kris kôt amnhĩ xãm tỳx kêt tã tee ri ja hã mē apumu nē hamaxpêr mex kêt nē. Jakamã ka Kris noo mã amnhĩ tomnuj nē. **13**Tã ã ixte Kris kôt ixkwỳjê nhĩpêx anhỹr pymaj koja ixtōjê hō kãm mēmoj kur pyma nē. Nē htỳx ho Tĩrtũm kêp omnuj ã hkamnhĩx. Pa ja hã omu nē ijaxwỳja axte hkur kêt nē. Ixte mex ã omunh tã no ãm kot tee ri ja hã ixpumunh nē hamaxpêr o:

—Kwa Tĩrtũm kêp ja mex kêt tã nhũm Pawreja ri kuku. Jakamã kot paj ijaxwỳja uràk nē kuku. Omnuj tãã.

Anhỹr o hamaxpêr pymaj kot paj uràk nē mēmota kur kêt nē. Na pa hte ã Kris kôt ixtōjê mex kukamã ri ijamaxpêr anhỹr o ixpa.

### **Pawre kot amarĩ Tĩrtũm kapêr o mē ahkre hã amnhĩ jarēnh**

*Atre 9.1-18, 20.33-35; Sikũn Korĩt 11.7-9*

**9** **1**Nē ixte Jesus nhỹ hã mē ahkre ho mē pa xwỳnhjê hō jakamã na pa hte Tĩrtũm kapêr o mē ajahkre ho ri ixpa. Na pa pre inhno ho mē panhō Pahihti Jesus pumu nē mē amã harēnh o ri mē akôt ixpa ka prem inhma nē hkôt amnhĩ xunhwỳ. **2**Mē hkwỳjaja kot axpên mã ixpê Jesus nhỹ hã mē ahkre xwỳnh kêt ã ijarēnh tã mē kajaja mē ate ja hã ixpumunh mex. Ixte mē amã mē ujarēnh mexja jarēnh nhũm mē ate mar nē hkôt amnhĩ xunhwỳrja kukwak ri na ka mē apê Jesus kwỳy. **3**Jakamã koja mē atã ixto kapêr japêr kot paj ã mē kãm mē ajarēnh anê. **4**Nē ixte Jesus nhỹ hã kapêr jahkre o ixpa xwỳnh jakamã kot paj inhmã Kris kwỳjê kutã amarĩ ixàpkur prãm nē mãmrĩ mē kutã apku. Ja tanhmã kute hkêt tã kot paj ã amnhĩ nhĩpêx anhỹr kêt nē. Kot paj ixàpkur kaxyw nē amnhĩ pãnhã amnhĩre nē rĩ kormã apku. Na pa hte ã amnhĩ nhĩpêx anhỹr o ri mē akôt ixpa. **5**Rỳ kot pa ixkwỳjê pyrà nē inhmã Kris kôt ixkwỳjê hō ho ixprō hprãm nē mãmrĩ ho ixprō. Nē wa ma krĩ piitã hkôt Kris kwỳjê kukwak ri ixàpkur o ixpa hprãm nē wa mãmrĩ ã amnhĩ nhĩpêx anhỹr o ixpa. Ja mex kênã. Na hte ã Simãw Pêtre mē Jesus tō kot hapujaja amnhĩ nhĩpêx anhỹr o pa nhũm ja tanhmã kêp kute hkêt. No ãm mē hkĩnhã ixprō hkêt na pa hte ri ixpa.

6Ně ixkwỳjaja na htem apkur xà hpānhā àpēnh o pa hkēt nē. Na htem Jejus nhỹ hā kapēr jarēnh o ri pa nhūm hte Jejus kwỳjaja mẽ kām mẽ apkur xà gō nhūm mẽ amarĩ hkur o pa. Tã no pa na pa hte Panāpe mẽ wa ã amnhĩ nhĩpêx anhỹr kêt nē. Na pa hte wa mry kà ho ixkre nhĩpêx nē mẽ kām ho wēnê nē hpānhā amnhĩm awjaprô. Na pa hte wa ã amnhĩ pa kukwak ri ixujaprô nē ho ixàpkur o ri ixpa anē.

7Mě kām pur kām harôj jamýnh o mẽ pa xwýnhjaja na htem amarĩ hkwy jamý nē ho apkur o pa. Nē motre jamār o mẽ pa xwýnhjaja haxwỳja amarĩ hkà kagô janê nē ho hkôm o pa. Nē pôristijaja na hte mẽ õ pahija mẽ àpēnh pānhā mẽ kām amnhĩrer o pa. Jajê piitã na htem mẽ àpēnh pānhā mẽ kām amnhĩrer o pa. Ja pyrã nē te ixpê mẽ amã ixàpēnh o ixpa xwýnh pyrãk jakamã ixte mẽ ajahkreta pānhā kot ka mẽ inhmã inhô ho apa nhūm ja määnēn mex nē. 8No ãm papxipix na pa hte ja mex ã harēnh kêt nē. Tĩrtũm kapēr ã kagà htũm haxwỳja kot ja mex ã harēnh. 9Kamã na pre finat Mojesja Tĩrtũm nhỹ hā harēnh kot:

Koja akrit amã àpēnh o pa ka omu nē ho mex nē. Kām õ mex nē. Anhỹr o kot harēnh. Xà na pre Tĩrtũmja ãm mẽ pahkrit pix kukamã ukaprĩ nē ã harēnh anē nà? Nà kot anhỹr kêt. 10Määnēn mẽ pahpê panhĩ kaxyw na pre ã ja jarēnh anē. Mě pahte mẽ hpur kām paxàhkre xwýnhjaja nē mẽ pahte kamã paxujamýnh o papa xwýnhjaja. Jajê kaxyw mẽ pahte pur kukwak ri amarĩ paxàpkur o ri papa kaxyw ã pre ã ja jarēnh anē. 11Tã ja pyrã nē na pa hte mẽ awýr mō nē mẽ amã Tĩrtũm kapēr jarēnh o ri mẽ akôt ixpa. Nē mẽ akôt ho mẽ ajahkre ho ri ixpa ka htem inhmã ixàpēnhhta pānhā amnhĩrer kêt nē. Ixkwỳjaja kot Tĩrtũm kapēr o mẽ ajahkre hpānhā mẽ ate mẽ kām amnhĩrer tã pa inhmã amnhĩrer kêt nē. Na pa pre mẽ ajahkreta pānhā mẽmoj tã mẽ awýr kêt nē. ãm nhãm ixàpēnh õta kukwak ri na pa hte ixàpkur o ri ixpa.

12Ně na hte mẽ ixkwỳjaja mẽ awýr mra nē Tĩrtũm kapēr o mẽ ajahkre o ri mẽ akôt pa. Hãmri nē hpānhā mẽ apkur xà hā mẽ awý ka mẽ kām mẽmoj gō. No kêt pa na pa hte mẽ urãk nē ixàpkur xà hā mẽ awýr kêt nē. Kot pa apu hā mẽ awý ka mẽ tanhmã ixto akapēr to nē axpēn mã ijarēnh o:

—Pēr ãm mẽ pahte kām amnhĩrer pix kaxyw na hte Pawre mẽ pahwýr mra nē mẽ pamã Jejus Kris kot tanhmã mẽ panê amnhĩ nhĩpêx to hā harēnh o pa. Pēr ãm apkur xà pix prãm xaj ã kot mẽ pamã ujarēnh anhỹr o pa. Jakamã kot puj mẽ kuma nē ãm kuma.

Anhỹr o axpēn mã ijarēnh pymaj na pa hte mẽ ajahkre hpānhā mẽmoj tã mẽ awýr kêt nē. Na pa hte ãm mry kà ho ixkre nhĩpêx nē ho wēnê nē ja pix kukwak ri ixàpkur o ri ixpa. Nē amarĩ ri mẽ ajahkre ho ri mẽ akôt ixpa.

13Ně Tĩrtũm mã amnhĩ jarēnh xà hā ixkre kamã mẽ àpēnh xwýnhjaja na htem hwýr mẽ mrrar xwýnhjaja mẽ àpēnh pānhā mẽ kām amnhĩre.

Ně mẽ kot mẽ kãm Tĩrtũm mã mẽmoj nhõr o kuhê xwỳnhjaja na htem mãânèn mẽ àpênh pãnhã mẽ kãm amnhĩre. 14Ně Pahihti Krisja na pre ja hã mẽ pakukamã pahtã karõ kot:

— Kêr ka mẽ kot tanhmã mẽ amã ijarênh to ho ri mẽ pa xwỳnhjê mã amnhĩrer o ri apa. Aně.

15Tã no na pa hte aa mẽmoj tã ixàhwỳr kêt nẽ. Ně mẽ ate inhmã amnhĩrer kaxyw pa mẽ amã ja jarênh kêt nẽ. Aa ixte mẽmoj tã mẽ awỳr kêt. Kot paj apu aně nẽ ixpijaam nẽ. Rỳ kot pa apu aně nẽ mẽ akukwak ri ixàpkur o ri ixpa hãmri nhũm mẽ akwỳjaja ja hã ixpumu nẽ hã ijarênh o:

— Tk. Na hte amarĩ mẽ pajahkre o ri pa hkêt nẽ. Ām mẽ apkur xà pix prãm xàj na hte ã mẽ pajahkre ho pa aně. Aně.

Jakamã na pa hte mẽmoj tã mẽ awỳr kêt nẽ. 16Ixte mẽ amã mẽ ujarênh mexja jarênh o ri ixpa htã na pa hte ja hã amnhĩ to jarkrar o ri ixpa hkêt nẽ. Pahihti Jejus na pre ja hã inhmã karõ pa hte kãm ho anhỳr o ri ixpa. Kot paj kãm ho anhỳr kêt nẽ ixpunuj nẽ ri ixpa. 17Kêp ãm amnhĩ krã hkõt mãn tanhmã mẽ amã ixujarênh to ho mẽ akõt ri ixpa ronhỹx pa hpãnhã ixãmnhĩx kàxpore hã mẽ awỳ. No ãm ã ixte amnhĩ nhĩpêx anhỳr kêt. Tĩrtũm tãm kot inhmã ja hã karõ jakamã na pa hte amarĩ ixãmnhĩx ri mẽ amã kapêr jarênh o mẽ ajahkre ho ri mẽ akõt ixpa nẽ mẽmoj tã ixàhwỳr o ri ixpa hkêt nẽ. 18Ixte amarĩ ri mẽ amã mẽ ujarênh mexta jarênh o ri ixpaja na inhmã hprãm. Ja na inhmã mex. Na pa hte ã amnhĩ nhĩpêx anhỳr o ri ixpa nhũm ja inhmã mex pa ixkĩnh nẽ ri ixpa. Jakamã na pa hte hpãnhã ixàhwỳr kêt nẽ. Nẽ inhmã mẽmoj prãm o ri ixpa hkêt nẽ. 19Ně nhãm mẽ kãm tanhmã ixàpênh to ho ixpa hkêt tã pa hte mẽ piitã tanhmã mẽ kãm amnhĩ nhĩpêx to ho ri ixpa. Pê mẽ kãm Jejus kapêr jarênh o ri ixpa. Jakamã na mẽ ra ohtõ nẽ ixujarênh ma nẽ amnhĩ kaxyw Jejus kõt hamaxpêr nẽ hkõt amnhĩ xunhwỳ.

### **Pawre kot tãm mẽ piitã mẽ hipêx o pa hã amnhĩ jarênh**

*Wam Korĩt 10.33*

20Ně na pa hte Ijaewjê hwỳr ixpa nẽ mẽ kot amnhĩ nhĩpêx kõt amnhĩ nhĩpêx o ri mẽ hkõt ixpa. Ixte mẽ kurom Tĩrtũm kot finat Mojes mã mẽmoj tã karõ hkõt amnhĩ nhĩpêx o ixpa hkêt tã mẽ hkõt ri ixpa nẽ mẽ uràk nẽ hkõt amnhĩ nhĩpêx o ri ixpa. Mẽ kot ja hã ixpumunh nẽ ixte mẽ kãm Jejus jarênh mar nẽ ixpyrà nẽ amnhĩ kaxyw hkõt hamaxpêr kaxyw.

21Tã pa hpãnhã mẽ kêp Ijaew kêt xwỳnhjê hwỳr ixpa nẽ mẽ kot amnhĩ nhĩpêx kõt amnhĩ nhĩpêx o ri mẽ hkõt ixpa. Mẽ kot ja hã ixpumunh nẽ ixkapêr mar nẽ ixpyrà nẽ amnhĩ kaxyw Jejus kõt hamaxpêr kaxyw. Tĩrtũm mẽ Kris wa hamaxpêr xà hkõt na pa hte ahpỳnhã mẽ kot amnhĩ nhĩpêx xwỳnhjê hwỳr mra nẽ ã amnhĩ nhĩpêx anhỳr o ri mẽ hkõt ixpa.


22Nē na pa hte kormã mẽ kot Kris kôt amnhĩ xunhwỳr tohtuj anhỳr xwỳnhjê hkôt ri ixpa nê te ixte ho mẽ urak nê kormã hkôt amnhĩ xãm nyw pyrak o amnhĩ nhĩpêx o ri mẽ hkôt ixpa. Mẽ kot ja hã ixpumunh nê ixkapêr mar nê hkôt amnhĩ nhĩpêx mex kaxyw. ã na pa hte mẽ piitã mẽ hkôt ri ixpa nê mẽ hkôt amnhĩ nhĩpêx o ri ixpa anê. Mẽ kot ja hã ixpumunh nê inhmar nê ixpyrà nê Kris kôt amnhĩ nhĩpêx tỳx kaxyw. 23Mẽ kot mẽ ujarênh mex mar kaxyw na pa hte mẽ piitã mẽ hkôt ã amnhĩ nhĩpêx anhỳr o ri ixpa. Tĩrtũm kot mẽ ho hkra nê mẽ ho mex kaxyw. Nê mãnên pa kot mẽ hã ixto mex kaxyw.

**Pawre kot htỳx ri amnhĩ nhĩpêx kêt ã kot amnhĩ jarênh**

*Sikũn Ximotre 4.7; Eprêw 12.1-3*

24Mẽ hprôt xwỳnhjaja na htem hprôt tỳx no nhũm mēhō pixi nê wam hkwỳjê re nê wam tēn pōj nhũm htem ja hã omu nê kãm mẽ hkĩnhxà gō. Ja pyrà nê kêr ka mẽ apiitã tãm amnhĩ nhĩpêx mex rãhã ho ri apa kê Tĩrtũm mẽ apumu nê nhỹrmã ja pãnhã mẽ amã mẽmoj mex gō.

25Nē mẽ hprôt xwỳnhjaja na htem mẽ hkĩnhxà hpyr prãm xàj mẽ hprôt xà hã arĩgro hwỳr apkati mẽ hprôt o kuhê. Prôt tỳx prãm xàj. Tã mẽ hprôt xà hã arĩgrota ã nhũm hkwỳjê pē amnhĩ to wa nê amnhĩm hkĩnhxà py. Nom koja hkĩnhxàja kritpēm kãm mex ry hkêt nê. Koja gaa nê hapêx tokyx anê. Tã nom kot puj mẽ Tĩrtũm kapêr kôt amnhĩ nhĩpêx mex o ri papa. Nê mẽ hprôt xwỳnhjê kot hkĩnhxà hpyr prãm xàj apkati mẽ hprôt o kuhêta pyrà nê apkati mẽ hkôt amnhĩ nhĩpêx mex o ri papa. Hãmri nhũm amnhĩ tã mẽ pahpumu nê nhỹrmã mẽ pamã hkĩnhxà mex õ gō. No ãm jar hkĩnhxà kurom koja aa mẽ pahpê hapêx kêt nê. Koja mẽ pamã mex rãhã ho rãhã.



*Wam Korĩt 9.24-25*

26Nē na hte mẽ hprôt xwỳnhjaja htỳx ri tanhmã hprôt to ho pa hkêt nê. Na htem hkwỳjê pē amnhĩ to wa kaxyw hprôt nê nhỹri mẽ àhuk xàta pix pumunh pē hwỳr hprôt nê mra hãmri nê kamã ahtwỳ. Nê kamã àhuk pix kukamã hamaxpêr o hprôt tỳx nê mra. Ja pyrà nê na pa hte apkati mẽ Tĩrtũm kôt pix mã amnhĩ nhĩpêx o ri ixpa. Nhỹrmã kot inhmã mẽmoj mex nhõr kaxyw.

Ně mẽ pijapu mex xwýnhjaja na htem htýx ri nhýhýnh axpën tak kêt nẽ. Na htem nhýhýnh kot mẽ htak o mẽ rënh xà pix kamã mẽ htak o mẽ rënh kukamã hamaxpër pẽ kamã mẽ htak. Ja pyrã nẽ na pa hte ixtýx ri tanhmã amnhĩ nhípêx to ho ri ixpa hkêt nẽ. Na pa hte Tirtùm mã ijamaxpër pẽ tanhmã amnhĩ nhípêx to rãhã ho ixpa. Kot nhýrmã inhmã mẽmoj mex nhõr kaxyw. 27No na pa hte ixtýx ri amnhĩ jamaxpër xà hkôt tanhmã amnhĩ nhípêx to ho ri ixpa hkêt nẽ. Kot pa ã amnhĩ nhípêx anẽ nẽ ixte mẽ kãm Jejus kapër jarënh o ri ixpa htã ãm ri ixtýx ri ã amnhĩ nhípêx anhýr kaprý nhùm Tirtùmja tee ri ja hã ixpumu nẽ inhmã mẽmoj mex nhõr kêt nẽ.

### Ijaew kot amnhĩ nhípêx

*Rômãn 15.4; Eprêw 3.8-11; Jutre 5*

**10** <sup>1E</sup> Kris kôt ixkwýjaja. Kot paj mẽ amã amnepê mã mẽ ixpê Ijaew hkukamã mẽ inhĩgêjtjaja tanhmã mẽ harënh to ka mẽ inhma. Mẽ kot pahi finat Mojes kôt ri mẽ pa xwýnhjaja kot paj mẽ amã harẽ. Mẽ pahte mẽ urak nẽ pahtýx ri amnhĩ nhípêx pymaj kot paj mẽ amã tanhmã mẽ harënh to ka mẽ inhma. Mãn ka mẽ arĩ mẽ harënh ã anohtýx japër. Na prem piitã pika pẽ Ejit kamã pa htã kurùm kator pa. Hãmri nẽ ma kapôt ã kakrã pumunh o hkôt pa ho pa. Pry hkêt jakamã nhùm pre Tirtùm tanhmã kakrã hto nhùm ma mẽ hkukamã pa nhùm mẽ omu nẽ hkôt pa. Hãmri nẽ ra gô xujanãr mẽ kot kãm: “Gô kamrêk” anhýr xwýnhja wýr pôi nẽ tee ri rêr prãm xàj amnhĩ kukamã hamaxpër. Hãmri nhùm Tirtùm mẽ kãm hkôt ã ho amgrã nhùm mẽ hkôt mex pẽ rêr pa nẽ axte kakrã hkôt pa ho pa. <sup>2</sup>Finat Mojes kot mẽ o pa jakamã nhùm prem kêp hkwý hã amnhĩ jarẽ nẽ kãm amnhĩ jarënh o:

—Nà kot paj mẽ akapër ma nẽ akôt ri amnhĩ nhípêx o ixpa. Anẽ.

Te mẽ pahpê Kris kwý hã amnhĩ jarënh kaxyw mẽ kot gôx kãm mẽ pahkrã kumrãr nhùm mẽ pahte Kris mã amnhĩ jarënhhta pyrãk. <sup>3</sup>Na prem kapôt ã ri pa nhùm Tirtùm tãm kaxkwa rùm mẽ hwýr mẽ apkur xà rẽ nhùm mẽ hkawrà nẽ ho apkur o pa. <sup>4</sup>Tã ra kôr xàj hirot nhùm Tirtùm tanhmã mẽ kãm kën prêkja to nhùm kurùm mẽ kãm gô axkapĩ nhùm mẽ ho ixkõ nẽ akupým hihtýx. ã Krisja mẽ hkôt mẽ ho mẽ hihtýx o pa anẽ. Mẽ kot no ho omunh kêt tã nhùm mẽ hkôt mẽ ho mẽ hihtýx o pa.

<sup>5</sup>Tã no nhùm mẽ ohtô nẽ Tirtùm kôt amnhĩ nhípêx kêt nẽ. Kot mẽ ho mex kumrëx tã nhùm mẽ ãm amnhĩ tã omu nẽ ãm omu nẽ kapër kôt amnhĩ nhípêx kêt nẽ. ãm kapër kwým ri tanhmã amnhĩ tomnuj to ho pa nhùm tee ri amnhĩ tã mẽ omu nẽ tanhmã mẽ ho nhùm mẽ hkwýja hpikaprãr pa. Hãmri nhùm arĩ mẽ htír xwýnhjaja kapôt ã mẽ hagjênh pa nẽ axte ma pa.

6Jakamã kwa kêr pu mẽ kot ã amnhĩ nhĩpêx anhỹr ã mẽ harênh ma nê hã pano htỳx nê ho papa hãmri nê ho mẽ uràk kêt nê. Mẽ uràk nê pahtỳx ri tanhmã amnhĩ nhĩpêx to ho ri papa hkêt nê.

7Nê na pre mẽ hkwỳjaja sãnti kutã hkôn krã ho rôrôk nê hkrĩ nê kãm amnhĩ jagrer pê amnhĩ to kuwỳ. Tĩrtũm kapêr ã kagà htũm kot mẽ kot amnhĩ nhĩpêx anhỹr ã mẽ harênh kot:

Na prem sãnti kutã apkur o hkrĩ nê kãm amnhĩ jagrer o hkrĩ nê gaa nê pipãnh pix o pa. Jao axpên kamã hpijaàm kêt o pa. Anhỹr jakamã kwa kêr pu mẽ ã mẽ kot amnhĩ nhĩpêx anhỹrja ã pano htỳx nê ho mẽ uràk hkêt nê.

8Nê na pre mẽ hkwỳjaja htỳx ri mjên nê hprô kuhpa hã nhãm ri mẽ kamã hpijaàm kêt o pa. Mỳrapê nhũm arĩgro pixi hã mẽ ohtô rax kumrêx nê axkaprã. Mẽ kêp 23.000 nê pikaprãr pa. Tã ã Tĩrtũm kot mẽ panhĩpêx anhỹr pymaj kêr pu mẽ ja hã pano htỳx nê ho mẽ uràk kêt nê. Âm kwarĩ ho kwarĩ.

9Nê na pre mẽ hkwỳjaja axtem nê htỳx ri tanhmã axpên mã Tĩrtũm jarênh to nê harênh o:

—Nà Tĩrtũmja gryk tokyx anhỹr kêt jakamã kwa pu mẽ ã amnhĩ tomnuj anhỹr o papa. Koja mẽ pahpumu nê tanhmã mẽ pahto hkêt nê.

Anhỹr tã nhũm tee ri ja hã mẽ kuma nê mẽ omu nhũm ja kãm mex kêt nê nhũm mẽ hwỳr kagã xoprê nhõ wenên xihtỳx kwỳ rê nhũm mẽ hwỳr mra nê mẽ hkamnhar o mẽ hkwỳjê pa. Tã ã kot mẽ panhĩpêx anhỹr pymaj kwa kêr pu mẽ ja hã pano htỳx nê mẽ uràk nê amnhĩ tã Tĩrtũm kamã pajamak o papa hkêt nê. Kwarĩ ho kwarĩ.

10Nê na pre mẽ hkwỳjaja axtem nê Tĩrtũm o kapêr punuj nê nhũm tee ri amnhĩ tã mẽ kuma nê mẽ hwỳr kapêr o wrỳk xwỳnh mẽ nhũm ma mẽ hwỳr wrỳ nê ã hã mẽ hkwỳjê nhĩmex. Tã ã kot mẽ panhĩpêx anhỹr pymaj kwa kêr pu mẽ ja hã pano htỳx nê ho mẽ uràk nê Tĩrtũm o pakapêr punuj kêt nê.

11Na pre mẽ ixpê Ijaew nhĩgêjtjaja ã htỳx ri amnhĩ nhĩpêx o pa anê. Tĩrtũm kapêr ã kagà htũm kot ã mẽ kot amnhĩ nhĩpêx anhỹr piitã harênh par. Mẽ panhõ ejêp kaxyw. Mẽ pahte kamã harênh nê mẽ harênh mar tỳx nê mẽ uràk nê ã amnhĩ nhĩpêx anhỹr kêt kaxyw. Ra Jejus akupỳn mẽ pahwỳr wrỳk xà hã arĩgro hkukamã grêre jakamã kwa kêr pu mẽ kutêp mẽ kurom kapêr kôt pix mã ri amnhĩ nhĩpêx mex rãhã ho ri papa.

**Mẽ pahte mẽmoj punuj nê amnhĩ to htỳx ã mẽ pamã karõ**

*Matêwre 4.1, 6.9-13; Wam Korīt 1.8; Sikũn Pêtre 2.9; Jutre 24*

12Tã kêr ka mẽ ã Ijaew kot amnhĩ nhĩpêx anhỹr ã mẽ harênhja ma nê ã ajamaxpêr anhỹr kêt nê. Rỳ mẽ ajamaxpêr o:

—Nà mẽmoj piitã kutã ixihtỳx kênã kot pa hkêt mẽ uràk nê ã amnhĩ nhĩpêx anhỹr o ri ixpa.

Anhÿr o mẽ ajamaxpër kêt nê. Kot kaj mẽ ã amnhĩ jarênh anê nê ra mẽ uràk nê tanhmã amnhĩ tomnuj to.

13Nê na prem kapôt ã pare ri omnuj nê ri pa. Nhũm mẽkarõmnuti tanhmã mẽ hkrã hto nhũm mẽ tanhmã amnhĩ tomnuj to ho pa. Ja pyra nê na hte arĩ mẽ pahte amnhĩ tomnuj hprãm xaj tanhmã mẽ pahkrã hto ho pa. Mẽ pahpiitã ã mẽ pahto anhÿr o ri mẽ pahkôt pa. Nom nhũm Tirtũm ra kot mẽ pamã amnhĩ jarênh xà hkôt mẽ panê omunh mex rãhã ho pa. Jakamã na pu htem tanhmã amnhĩ tomnuj to hkukamã pajamaxpër nhũm ja hã mẽ pahpumu nê mẽ panê mẽkarõmnuti mã kapër. Nê kutã mẽ pahto paxihtÿx nê pu mẽ ÿ hã amnhĩ tomnuj kêt nê. Nê ãm kôt pix mã amnhĩ nhĩpêx mex o ri papa.

### Mẽ kot sãnti mã mẽmoj nhõr xwÿnhjê jarênh

*Wam Korîť 8.1-13; Karatas 4.8; Apokarip 9.20*

14Jakamã e Kris kôt ixkwÿjaja. Kêr ka mẽ amnhĩ kaxyw sãnti hkôt ajamaxpër o ri apa hkêt nê. Nê amnhĩ to hwÿr kêt nê. ãm kwarĩ ho kwarĩ.

15E mẽ axàhpumunh tÿx ã amnhĩ jarênh jakamã kot paj mẽ amã mẽmoj jarê ka mẽ aprĩ hã inhmar tÿx japêr. 16Nã na pu htem tõiã Jejus kot mẽ panê htyk mã pajamaxpër kaxyw axpên wÿr akuprõ. Hãmri nê mẽmo kagõ hkwy ru nê Tirtũm mã mex ã harê nê mẽmoj o pahkõm pê Jejus kot mẽ panê hkamrõ pikapĩr mã pajamaxpër. Nê hpãnhã pãwti hõ py nê axpên mã ho hkry nê mẽ kot Kris pĩr nê ĩ kamã hkamnhwÿr nhũm mẽ panê htykja mã pajamaxpër pê kuku. 17Pãwtita ãm pixire htã pu htem axpên mã ho hkry nê pahpiitã kuku. Mẽ pahpê Kris kwÿ hã mẽ pahte amnhĩ jarênh nhũm mẽ pahkwÿ kot ja hã mẽ pahpumunh kaxyw. Te mẽ pahtipxi nê ri mẽ papa pyrãk nê pãwti pixire htã pu mẽ pahpiitã kuku.

18E kot paj hpãnhã mẽ amã amnepê mã Ijaew kot tanhmã amnhĩ nhĩpêx to jarê ka mẽ inhma. Na pre htem Tirtũm mã mex ã harênh nê kãm amnhĩ nhõr ã kot amnhĩ tã mẽ omunh kaxyw nhũm prem tanhmã amnhĩ nhĩpêx to. Jao kãm mẽ apkur xà hkwy gõ nê kãm mex o mex ã harê. Hãmri nê amnhĩ mã mẽmojta kwÿ xà nê hkur o hkrĩ. Jao ra Tirtũm mã mex o mex ã harê nê kãm kêp hkra hã amnhĩ jarê.

19Nom mẽ kot sãnti mã mẽmoj nhõr xwÿnhjaja na htem kãm mẽmo mẽ apkur xà hkwy gõ nom ãm kãm õr kaprÿ. Tanhmã kot we amnhĩ to nê amnhĩ tã mẽ omu? Mo rĩt kaxyw no? ãm mẽ ĩhkra ho mẽ kot amnhĩm hipêx kênã. Jakamã na htem ãm kãm mẽ apkur xà hkwy nhõr kaprÿ. 20Mẽ kot sãnti mã mẽmoj nhõr xwÿnhjaja na htem Tirtũm mã õr kêt nê. Mẽkarõmnuti mã na htem kugõ. Jakamã kot kaj mẽ uràk nê sãnti mã mẽmoj gõ nê apê mẽkarõmnuti hkwy hã amnhĩ to amnhĩrĩt nê apê hkwy hã ri apa. Jakamã mẽ ate sãnti mã mẽmoj nhõrta na inhã hprãm kêt

kumrêx. **21**Kot kaj mẽ panhõ Pahihti Jejus kot mẽ panê htyk ã mẽmoj kagô hkwỳ ho ixkõ hãmri nê ma mra nê hpãnhã sãnti pê mẽkarõmnuti hã mẽmoj to ixkõ. Hãmri nhũm Tirtũmja tee ri ja hã mẽ apumu nhũm ja kêp omnuj tỳx nê. Rỳ ka mẽ Pahihti Jejus kot mẽ panê htyk ã pãwti hkwỳ hku nê hpãnhã ma mra nê sãnti pê mẽkarõmnuti hã mẽmoj hku. Hãmri nhũm Tirtũm kêp ja omnuj tỳx nê. Mẽ pahte ã amnhĩ nhĩpêx anhỳrja na axpên kuhpa hã. **22**Jakamã kot ka mẽ ã amnhĩ nhĩpêx anê nê te ra mẽ amã mẽkarõmnuti hkĩnh nê mããnên amã Tirtũm kĩnh pyrãk o amnhĩ nhĩpêx. Nê te Tirtũm kurom mẽ kajaja mẽ axàhpumunh tỳx pyrãk o amnhĩ nhĩpêx. Nhũm tee ri amnhĩ tã mẽ apumu nê mẽ akamã gryk tỳx nê. Kwa mẽ okora. Koja Tirtũm akamã gryk ka amex kêt kumrêx.

**Mẽ pamã Kris kôt mẽ pahkwỳjê hkĩnh pê mẽ ho mex ã mẽ pamã karõ**

*Matêwre 20.28; Rõmãn 14.1-15.7; Piripos 2.1-4*

**23**Nê na htem tõhã amnhĩ jarênh o:

— Nà kot pa inhmã mẽmoj to anhỳr prãm nê ixàmnhĩx ã amnhĩ nhĩpêx anhỳr o ri ixpa. Anê.

Tã no ãm mẽmoj piitã mẽ pamã mex kêt. Na htem kãm mẽmoj to anhỳr prãm xà hkôt mẽmoj piitã tanhmã ho ho ri pa nê tanhmã amnhĩ tomnuj to. Hãmri nhũm mẽ hkwỳjaja ja hã mẽ omu nê mẽ urak nê tanhmã ri amnhĩ tomnuj to. Jao Kris kôt amnhĩ xunhwỳr tỳx kêt nê. **24**Jakamã kwa kêr pu mẽ amnhĩ pix kukamã pajamxpêr pê tanhmã amnhĩ nhĩpêx to ho papa hkêt nê. Mããnên amnhĩ kwỳjê hkukamã pajamxpêr pê tanhmã mẽ ho mex to ho ri papa pê tãm ri amnhĩ nhĩpêx o papa.

**25**Nê kot kaj mẽ amnhĩ xàpkur xà japrõr kaxyw ma nhỹhỹm mra nê mãmrĩ axàmnhĩx ri amã mẽmoj prãm xà hkôt mẽmoj japrõ. Nom kêr ka mẽ axujaprõrja kêp sãnti xàpkur xà hã mẽ hkukjêr kêt nê. ãm axàmnhĩx ri mẽ kêp mẽmoj japrõr o ri apa. **26**Tirtũm kapêr ã kagã htũm kot ja jarênh kot:

Pika piitã hkôt mẽmoj piitã kêp Tirtũm nhõ na. Anê.

Jakamã mẽ mãmrĩ axàmnhĩx ri mẽmoj piitã haprõ nê mẽmoj piitã hkur o apa.

**27**Tã koja mẽ kêp Kris kwỳ hkêt xwỳnhjê hõ ate kutã axàpkur kaxyw amnhĩ wỳr awỳ ka amã hwỳr amõr prãm nê mãmrĩ ma hwỳr mõ. Nhũm mẽmoj to amã anhõ ka axàmnhĩx ri mãmrĩ aku. No ri tee ri amnhĩ kukamã ajamxpêr nê tanhmã hã hkukjêr to hkêt nê. Rỳ kãm:

— Kwa xà we mryja sãnti hã mẽ apkur xà na nà?

Anhỳr o hã mẽ hkukjêr kêt nê. ãm mãmrĩ axàmnhĩx hkur o akrĩ. **28-29**Nom koja Kris kôt mẽ kot amnhĩ xãm tohtuj anhỳr xwỳnhjê hõ mẽ awỳr axà nê tee ri ja hã apumu nê amã:

—Kwa sãnti hã mẽ apkur xà na ka ri mẽ kutã hkur o akrĩ.

Anhÿr o amã kapêr ka ama nê hkaga kurê kumrêx nê hkur kêt nê. Amã mex tã Kris kôt atôja kêp omnuj jakamã ka hkaga nê hkur kêt nê. No kot ka ãm ama nê arĩ hkur o anhÿr japêr. Kot amã harênh xwÿnhnta kêp omnuj tã ka arĩ noo mã hkur japêr. Nhũm ja hã apumu nê tee ri Tĩrtũm kapêr kukamã tanhmã hamaxpêr to. Hãmri nê apyrã nê kuku nê gaa nê tee ri amnhĩ kukamã hamaxpêr nê amnhĩ mã:

—Hêxta waa nê. Sãnti nhôja mex kêt tã pa ri kuku. Kwa na pa pêr hkurja o amnhĩ tomnuj nê. Hêxta waa nê. Anê.

Hãmri nê tee ri amnhĩ kukamã hamaxpêr o hkaprĩ nê. Ā kot amnhĩ nhĩpêx anhÿr pymaj koja mēhō ã mēmo mẽ apkur xà nê amã kapêr anê ka ama nê hkaga kurê kumrêx. Jao amnhĩ pix kukamã ajamaxpêr kêt nê. Mãânên Kris kôt atō nê atōxjê mex kukamã ajamaxpêr. Nom koja amã kêp sãnti hã mẽ apkur xà hã harê ka ama nê ã ajamaxpêr anhÿr japêr nê ajamaxpêr o:

—Nà kêp omnuj tã kot paj mamrĩ kuku. Ja inhmã mex kênã. <sup>30</sup>Ra ixte Tĩrtũm mã harênh nê ixãmnhĩx hkur o inhÿr kênã kot kêt ã nê inhmã kapêr anê. Anê.

Kwa mẽ ã ajamaxpêr anhÿr kêt. Kot kaj mẽ ã ajamaxpêr anê hãmri nê Kris kôt atō rÿ atōx mex kukamã ajamaxpêr kêt nê.

<sup>31</sup>Jakamã kêr ka mẽ tãm tanhmã amnhĩ nhĩpêx to ho ri apa. Nê axapênh mex nê. Kêr kê mẽ piitã ja hã mẽ apumu nê mẽ apumunh kôt amnhĩm Tĩrtũm mex ã harê. <sup>32</sup>Nê kêr ka mẽ piitã mẽ noo mã tãm ri amnhĩ nhĩpêx o apa. Ijaew noo mã nê Ijaew kêt xwÿnhjê noo mã. Nê Jejus kwÿjê noo mã. Mẽ piitã mẽ noo mã tãm ri amnhĩ nhĩpêx rãhã ho ri apa. Mẽ kot tee ri mẽmoj tã mẽ apumunh nê hpijaàm pymaj ka mẽ tãm ri mẽ piitã mẽ noo mã tanhmã amnhĩ nhĩpêx mex to ho ri apa. <sup>33</sup>Na pa hte ã amnhĩ nhĩpêx anhÿr o ri ixpa. No na pa hte pa amnhĩ pix kukamã ijamaxpêr kêt nê. Mẽ piitã mẽ mex kukamã na pa hte ijamaxpêr o ri ixpa. Pê tanhmã amnhĩ nhĩpêx to ho ri ixpa. Mẽ kot ja hã ixpumunh nê ixpyrà nê Jejus kôt amnhĩ xunhwÿr nê ãm kôt pix mã ri amnhĩ nhĩpêx o pa kaxyw.

**11** <sup>1</sup>Na pre hte Kris ã ã amnhĩ nhĩpêx anê nê mẽ piitã mẽ mex kukamã hamaxpêr rãhã ho ri pa. Tã na pa hte urãk nê ã amnhĩ nhĩpêx anê. Jakamã kwa kêr ka mẽ ixpyrà nê ã amnhĩ nhĩpêx anhÿr o mãn ri apa.

### Mënijaja mẽ mjên ã hpijaàm ã mẽ kãm karõ

*Epês 5.22; Wam Pêtre 3.1-6*

<sup>2</sup>Nê na ka xep htem arĩ ra ixte tanhmã mẽ amã ixkapêr toja mã ajamaxpêr tÿx o ri apa. Na pa pre Kris kôt mẽ pahtō nê mẽ pahtōxjaja xpên wÿr pikuprõnh nê tanhmã amnhĩ nhĩpêx to hã mẽ amã karõ ka

prem inhma nê mē urāk nê ã amnhĩ nhĩpêx anê. Ām hāmri na ka htem ã amnhĩ nhĩpêx anhỹr o apa. Ja na inhmã mex.

3Na pa pre krĩ hō kamã mēnijaja kot amnhĩ krã hpro hã mē amã mē harê. Ka prem inhma nhũm mē akwỳjaja kãm ja mex nê nhũm mē akwỳjaja tee ri ja kukamã ajamxpêr. No mēmo kaxyw na hte mēnijaja amnhĩ krã hpro? E kot paj ixprĩ hã mē amã ja jarê ka mē inhma. Nà Tirtũm kêp Kris jamār xwỳnh nhũm Kris kêp Tirtũm mã mē inhmyjê jamār xwỳnh. No mē anijaja mē amjên kêp Kris mã mē ajamār xwỳnh. Na hte mēnijaja ohtô nê ra mē mjên ã amnhĩ to amnhĩrit kaxyw amnhĩ krã hpro nê ri pa. No mē inhmyjaja na pa htem ã amnhĩ nhĩpêx anhỹr kêt nê. Na pa htem amarĩ ixkrã hkênh nê ixpa. 4Jakamã na pa htem Tirtũm kapêr mar xà hã ixkre hwỳr axpên wỳr akuprô nê Tirtũm nhỹ hã mē anijê mã kapêr jarênh o ixkuhê. Rỳ Tirtũm mã tanhmã mē pajarênh to. No ãm amnhĩ krã hpro hkêt rãhã kãm mē ajahkre rỳ kãm mē pajarê. Kot pa mē amnhĩ krã hpro nê te mē apê ixprôjaja mē apê mē ijamār xwỳnh ã mē ajarênh pyrāk. Jao te mē ixte mē ijamār xwỳnh Kris ã ixpijaàm kêt pyrāk o amnhĩ nhĩpêx. 5No mē anijaja mē ixte Kris mã mē ajamār xwỳnh jakamã na ka htem Tirtũm nhỹ hã mē inhmã kapêr jarênh rỳ kãm mē pajarênh kaxyw nê amnhĩ krã hpro. Mē ixte Kris mã mē ajamār xwỳnhjê hã apijaàm kaxyw ã amnhĩ nhĩpêx anê nê mē amnhĩ krã hpro. Kot ka mē ã amnhĩ nhĩpêx anhỹr kêt nê te mē ate mē ixtã apijaàm kêt pyrāk o amnhĩ nhĩpêx nhũm mē amjên tee ri ja hã apumu nê hpijaàm nê. Te ate amnhĩ krã hkênh nê ri apa nhũm tee ri apumunh nê hpijaàm pyrāk. 6Kot kaj mē amnhĩ krã hkênh nê ri apa nê amnhĩ kamã apijaàm nê ri apa. Mē anijaja na ka htem akrã hkĩ japjê nê kamã amex nê ri apa. No kot ka mē amnhĩm akrã hkênh nê apunuj nê amnhĩ kamã apijaàm nê ri apa. Jakamã kêr ka mē Tirtũm mã amnhĩ jarênh kaxyw nê amnhĩ krã hpro. Nom kot ka mē amjên ã apijaàm kêt nê ri apa hprãm japêr nê mamrĩ amnhĩm akrã hkênh nê ri amnhĩ kuk ã apijaàm kêt nê ri apa.

7No mē inhmyjaja na pa htem amnhĩ krã hpro hkêt nê. Te mē ixpê Tirtũm pyrāk nhũm mē anijaja te mē apê Tirtũm kra pyrāk o na pu htem axpên nhĩpêx. Tirtũm krajaja na htem mēmoj tã Tirtũm mã karô hkêt nê. Ja pyrã nê mē anijaja na ka htem mē inhmyjê mã mēmoj tã karô kamã axihtỳx o apa hkêt nê. Na ka htem mē ixtã apijaàm kãm mēmoj tã mē ixwỳ.

8Amnepê mã Tirtũm kot mēmoj to kator krax rũm na pre myja kumrêx nhĩpêx hāmri nê kêp ôkwa i hō kapa nê ho kãm hprô nhĩpêx. No na pre nija kumrêx nhĩpêx nê ôkwa i ho kãm mjên nhĩpêx kêt nê. 9Myja mã na pre hprô nhĩpêx. No nija mã mjên nhĩpêx kêt nê. 10Jakamã kêr ka mē anijaja amjên ã apijaàm ã amnhĩ to amnhĩrit kaxyw hāmri nê mē inhmã Tirtũm nhỹ hã tanhmã akapêr jarênh to kaxyw rỳ kãm amnhĩ

jarënh kaxyw hãmri nê amnhĩ krã hpro nê akuhê. Hãmri nhũm Tirtũm kapêr o mē wryk xwỳnhjaja ja hã mē apumu nê hkĩnh nê tee ri mē akukamã hamaxpêr kêt nê.

11-12Nê wam ni kator xwỳnhnta na pre myja rũm kato. Tã na pa htem jarãhã mē inhmyjaja hpãnhã mē anijê rũm ijapôj. Tirtũm jamaxpêr xà hkôt. Tãm na pre ã mē pahte amnhĩ nhĩpêx anhỹr kaxyw ã mē panhĩpêx anê. Tã mē ixpê Pahihti Kris kwỳ hã mē inhmyjaja nê mē anijaja na pu htem ri ahte papa hkêt nê. Na pu htem axpên kutã pamã axpên hkĩnh o papa nê mēmoj to axpên kutã panojarêr o ri papa. Nê axpên to presija ho papa. Na hte mē anijaja mē amjên o presija ho apa. Nê mē amyjaja na ka htem mē aprõ ho presija ho apa. Tã kêr ka mē anijaja mē amjên ã apijaàm o ri hkôt apa. 13Jakamã kwa mē kot amnhĩ krã hproja kukamã ajamaxpêr tỳx nê. Xà mē anhõ krĩ kamã mēnijaja mē mjên ã hpijaàm ã amnhĩ to amnhĩrit kaxyw amnhĩ krã hpro nà? Koja mē ja kaxyw ã amnhĩ nhĩpêx anhỹr japêr kê mē rĩ mē anoo mã Tirtũm mã amnhĩ jarënh kaxyw nê kupê xê hkwy ho amnhĩ krã hprõ nê rĩ kãm amnhĩ jarê. Nom koja mē ã amnhĩ nhĩpêx anhỹr kêt nhũm mēmyjaja tee ri ja hã mē omunh nê ho kapêr hkêt japêr hãmri kê mē rĩ amnhĩ krã hpro hkêt nê ri pa.

14Mê kot mē pahte amnhĩ nhĩpêx ã mē pahpumunh nê hkĩnh kaxyw na pu htem tanhmã amnhĩ nhĩpêx to ho ri papa. Na htem mē pahkrã hkĩ jarënh o: “Koja mēmyjaja hkrã hkĩ japjê nê ri pa nê ra kamã omnajti.” Anhỹr jakamã na pa htem amnhĩ krã hkênh nê ri ixpa. 15No mē anijaja na htem mē ajarënh o: “Mēnijaja na htem hkrã hkĩ japjê nê ri pa nê kamã muxti.” Anhỹr jakamã na ka htem akrã hkĩ japjê nê ri apa. Mē akĩ te kêt mē akrã hpro xà pyrãk. Na ka htem ã amnhĩ nhĩpêx anhỹr o apa.

16E na pa ra mē amã krĩ hkwy kamã Kris kwỳ nijaja kot mjên ã hpijaàm ã amnhĩ to amnhĩrit kaxyw tanhmã amnhĩ nhĩpêx to hã mē harê. Tã koja mēhõ nija tee ri ja ma nhũm ja kêt omnuj japêr. Nhũm amnhĩ jarënh o:

—Kêt. Kot paj tanhmã inhmã amnhĩ nhĩpêx to hprãm xà hkôt tanhmã ri amnhĩ nhĩpêx to ho ri ixpa. Koja inhmjên ja hã ixpumu nê hpijaàm nê rĩ tãm.

Anhỹr ã amnhĩ jarê ka mē tee ri ã kot amnhĩ jarënh anhỹrja ã ama nê kãm:

—Kwa nà ã ri ajamaxpêr anhỹr kêt nê. Na hte Kris kwỳjaja ã hamaxpêr anhỹr kêt nê. Anê.

**Jejus tyk mã mē pajamaxpêr pê tanhmã mē pahte  
amnhĩ to hã mē pajarënh**

*Matêwre 26.26-30; Makre 14.22-26; Rukre 22.19-20*

17Nê na ka xep htem Tirtũm mã amnhĩ jarënh xà hã ixkre hwỳr axpên wỳr akuprõ nê kamã amnhĩ to mex kêt nê. Na ka htem tanhmã

amnhĩ tomnuj to pa tee ri mẽ ajarēnh ma nẽ ixkaprĩ nẽ. Nẽ amnhĩm mẽ amex ã mẽ ajarēnh kêt nẽ. 18Na ka xep htem axpẽn wỳr akuprõ nẽ mẽmoj tã axpẽn mã akir nẽ axpẽn pẽ anghrà. Nẽ ahpỹnhã mẽmoj mã ajamaxpěr jao ra mẽ amã axpẽn kĩnh kêt nẽ. Na pa tee ri ã mẽ ajarēnh anhỹrja ma nẽ ixkaprĩ htỳx nẽ. 19Xà na hte Tirtũm ahpỹnhã tanhmã mẽ pahte amnhĩ anhĩpêx to hã mẽ pahpumunh kôt kãm mẽ pajapê hkêt ã amnhĩ jarẽ? Nà na hte ã amnhĩ nhĩpêx anhỹr kêt nẽ. Kãm mẽ pajapê ho axpẽn pyræk kênã.

20Nẽ na hte Kris kwỳjê piitã tũhã axpẽn wỳr akuprõ nẽ Jesus tyk mã hamaxpěr kaxyw pãwti hkwy hku. Tã mẽ kajaja na ka xep htem ja kaxyw axpẽn wỳr akuprõ nom axtem nẽ Jesus tyk mã ajamaxpěr pẽ axàpkur kêt nẽ. ãm mẽ axàpkur pix kukamã ajamaxpěr nẽ axtem nẽ axàpkur rũnh o akrĩ. 21Jao amnhĩ pix kukamã ajamaxpěr. Mẽ akwỳjaja wam mrar nẽ hpõx nẽ mẽ apkur xà hã mẽ hkrĩ xwỳnhjaja na xep htem hkwyjê rom mẽõta pinh pa. Nẽ wĩhtija nhũm mẽ mããnēn hpenh pa nẽ axtem nẽ ho axpã. Jakamã nhũm mẽ akwỳjaja kot amnhĩ to hapu nẽ hpõx xwỳnhjaja mẽmojta ã hprãr pa. 22Kwa mon ka mẽ amã hprãm nẽ anhõrkwỹ kamã axàpkur kêt nẽ? Mẽ kot Tirtũm mã amnhĩ jarēnh xà hã ixkre kamã na htem apkur rũnh hkêt nẽ. Ka mẽ ã amnhĩ nhĩpêx anẽ nhũm mẽõ hkêt xwỳnhjaja amnhĩ to hapu nẽ mra nẽ mẽõ hã prã nẽ amnhĩ kamã hpijaam nẽ. Kwa xà kot pa ã mẽ ate amnhĩ nhĩpêx anhỹr ã mẽ ajarēnh ma nẽ ixkĩnh nẽ mẽ ate amnhĩ nhĩpêx mex ã mẽ ajarẽ? Nà kot paj ã mẽ ajarēnh anhỹr kêt nẽ.

23Pahihti Jesus na pre ja hã tanhmã inhmã kapěr to nẽ inhmã:

— Kêr ka mẽ tũhã axpẽn wỳr akuprõ nẽ axàpkur pẽ ixtyk mã mãn mẽ ajamaxpěr pẽ ã amnhĩ nhĩpêx anẽ nẽ ã amnhĩ nhĩpêx anẽ. Anẽ.

Jakamã kot paj ixprĩ hã amnhĩ xõ ri mẽ amã kot tanhmã inhmã kapěr tota jarẽ ka mẽ inhma. Nà Jesus kormã htyk kêt ri Jut Kariot ra kot põristi mã hã àmnēnh kaxyw nhũm kamàt nhũm Jesus mẽ ỹ hã mẽ ahkre xwỳnhjê mẽ apkur kaxyw hkrĩ hpa. Hãmri nhũm Jesus pãwti hõ py nẽ o xa 24nẽ Tirtũm mã harẽ nẽ kãm:

— Pa Papaj. Nà ãm hãmri na ka hte mẽ inhmã mẽ inhõ mex o apa. Anẽ.

Nẽ hpãnhã pãwja o hkry pa nẽ ho mẽ kot ỹ hã mẽ ahkre ho mẽ pa xwỳnhjê nhĩpêx pa nẽ mẽ kãm:

— E na pa ã pãwti ho hkry nẽ mẽ amã õr anẽ. Koja mẽ ã inhĩpêx anẽ nẽ te mẽ kot ixto hkry hpar pyræk o inhĩpêx pa amnhĩ xà htỳx kamã ijamak kãm ty. Nom mẽ anẽ kot paj ty. Jakamã e kêr ka mẽ ixwakre kamã tũhã axpẽn wỳr akuprõ nẽ ixte mẽ ate amnhĩ tomnuj pãnhã amnhĩrer kaxyw mẽ anẽ ixtyk mã ajamaxpěr pẽ akĩnh nẽ pãwta kur o akrĩ. E mẽ mãmri axãmnhĩx aku. Anẽ.

25Hãmri nẽ hpãnhã kop kãm wĩhtita py nẽ o xa nẽ mẽ kãm:

—E kop kãm wĩhtija te kêp Tĩrtũm kot mẽ atã amnhĩ jarẽnh nyw xà jarẽnh pyræk. Ixtyk kukwak ri koja mẽ ato hkra. Kot paj ty nhũm ixkamrô mẽ anê axkapĩ. Jakamã e. Mẽ kopja kamã wĩhti ho akõm o axpẽn nhĩpêx. Nê ho akõm pê ixte mẽ anê ixtyk mã ajamaxpêr. Anê.

26Tã ã kot amnhĩ jarẽnh anhỹr jakamã na pu htem axpẽn wỳr akuprõ nê pãwti hkwy hku nê mẽmo kagô hkwy o ixkõ. Nê ho pahkõm pê axpẽn mã Jejus tyk jarẽnh o pahkrĩ. Tã kêr pu mẽ arĩ ã amnhĩ nhĩpêx anhỹr o ri papa rãhã nhũm Jejus akupỹn mẽ pahwỳr wrỳ. 27Jakamã kot kaj mẽ tõiã mẽmo arĩgro hã kot mẽ panê htykja mã ajamaxpêr kaxyw axpẽn wỳr akuprõ. Hãmri nhũm mẽ anhĩõ mẽ awỳr axà nê nhỹ. Nom axtem nê Jejus tyk mã hamaxpêr kêt japêr. Nê htỳx pãwti kur o nhỹ. Nê hkõt amarĩ mẽmo kagô ho hkõm o nhỹ. Koja ã htyk mã hamaxpêr kêt rãhã amnhĩ nhĩpêx anê nê te Jejus o kapêr pyræk o amnhĩ nhĩpêx. Te ho kapêr o:

—Nà Jejus amarĩ htyk nhũm hkamrô amarĩ hpikapĩr kênã. Na pre mẽ panê htyk kêt nê.

Anhỹr o ho kapêr pyræk. 28Jakamã kwa kêr ka mẽ ate pãwta kur kaxyw nê taxy kormã tanhmã ate amnhĩ nhĩpêx to mã ajamaxpêr nê ajamaxpêr o:

—Kwa mãn pa Tĩrtũm kapêr kõt amnhĩ nhĩpêx mex rãhã ho ri ixpa nã?

Anhỹr o mãn ajamaxpêr. Hãmri nê ate hkõt amnhĩ nhĩpêx mex ã amnhĩ pumu nê amarĩ axãmnhĩx aku. No kot ka mẽ kormã mẽmoj punuj kaga hkêt nê arĩ ri ho anhỹr o pa hãmri nê kãm ajamaxpêr nê hkur kêt nê. Rỳ tanhmãn tee ri tanhmã ate amnhĩ tomnuj tota mã ajamaxpêr nê akapĩr nê. Hãmri nê tokyx Tĩrtũm mã amnhĩ jarê nê amnhĩ to mex prãm xàj amnhĩ to awỳ hãmri nê arĩ kormã axãmnhĩx pãwtita ku. 29Koja mõiõ mẽ akõt axà nê mẽmoj kukamã hamaxpêr pê htỳx pãwti nhĩrênhta õ py hkur o nhỹ. Hãmri nhũm Tĩrtũm tee ri ja hã omu nê hã tanhmã ho. 30Na ka mẽ ra axohtõ nê ã amnhĩ nhĩpêx anê nê atỳx ri mẽmoj kukamã ajamaxpêr pê pãwta ku. Jejus kot mẽ panê htykja mã ajamaxpêr kêt pê atỳx tanhmã ajamaxpêr to pê hkwy hkur o akrĩ. Mỳrapê na ka mẽ ra ja hã axà nê ri apa. Nê mẽ akwỳjaja ra htyk rax nê. 31Nom kot ka mẽ axpẽn wỳr akuprõ hãmri nê akupỹm tãm axpẽn kõt ajamaxpêr nê axpẽn kõt amnhĩ nhĩpêx nê rĩ kormã pãwtita ku. Hãmri nhũm Tĩrtũm ja hã mẽ apumu nê tanhmã mẽ ato hkêt nê. 32Na hte mẽ pahte tanhmã amnhĩ tomnuj to hã mẽ pahpumu nê hã tanhmã mẽ pahto. Mẽ pahte ja hã amnhĩ pumunh nê axte ã amnhĩ nhĩpêx anhỹr kêt kaxyw na hte ã mẽ pahpê hkrajê nhĩpêx anê. Jakamã kot puj mẽ nhỹrmã mẽ kêp hkra hkêt xwỳnhjê hkõt kuwyta wỳr ma papa hkêt nê. 33Jakamã e Kris kõt ixtõ nê ixtõxjaja. Kêr ka mẽ axte Pahihti Jejus tyk mã ajamaxpêr kaxyw axpẽn wỳr akuprõ. Hãmri nê ra axpẽn wỳr apikuprõnh pa hã axpẽn pumu nê rĩ kormã pãwti hkwy hku nê hkur pê Jejus kot mẽ panê htyk

mã ajamaxpêr o akrĩ. <sup>34</sup>Nê ka mẽ atõ ra amã prãm japêr nê anhõrkwỹ kamã apku nê rĩ kormã mẽ hkõt tẽ. Jao ra anhõhy htu nê ajamakêtkati nê akwỹjê jamãr o nhỹ. Kê mẽ hpõx pa ka mẽ atipxi nê Pahihti Jejus tyk mã ajamaxpêr pê hkur o akrĩ. Hãmri nhũm Tĩrtũm ja hã mẽ apumu nê hkĩnh nê tanhmã mẽ ato hkêt nê.

Na ka prem mẽ ate inhmã kagà nê mênhta kamã mẽmoj tã ixkukjêr rax nê. Tã na pa ra kagà ja kamã mẽ amã hkwỹ jarênh rax nê. Nom kot paj piitã harênh par kêt nê. Kot paj ãm mẽ amã hkwỹ pix jarê. Hãmri nê nhỹrmã ma mẽ awỹr mõ nê mẽ apumu nê kormã axte mẽ amã harênh jatur xãm kumẽ.

### Mê kot Tĩrtũm kapêr o hêx xwỹnhjê jarênh

*Rõmãn 12.6-8; Wam Korīt 14.29; Wam Pêtre 4.10-11; Wam Juãw 4.1-2*

**12** <sup>1</sup>Nê kot paj hpãnhã mẽ amã tanhmã Tĩrtũm Karõ jarênh to ka mẽ inhma. Tanhmã kot mẽ pahkrã hto nhũm mẽ pahte ahpỹnhã tanhmã kãm amnhĩ nhĩpêx to ho papaja kot paj mẽ amã harê. <sup>2</sup>Amnepê mã kormã mẽ ate Kris kõt amnhĩ xunhwỹr kêt ri na ka prem sãnti hkõt ri amnhĩ nhĩpêx o ri apa. Kapêr kêt tã ka prem hkõt ri amnhĩ nhĩpêx rãhã ho ri apa. Te kot mẽ ano kupyrr pyrãk ka mẽ kãm mex o mex ã harênh o ri apa. Nê kãm amnhĩ jagrer pê amnhĩ to hwỹr o ri apa. ã na ka prem amnhĩ nhĩpêx anhỹr o ri apa. <sup>3</sup>Tã ra hpãnhã Tĩrtũm kõt amnhĩ xunhwỹ.

Na htem ohtõ nê Tĩrtũm nhỹ hã kapêr jarênh o pa hã amnhĩ jarênh tã no ãm mẽ hkwỹjaja ja hã amnhĩ to hêx. Tã kot paj ixprĩ hã mẽ amã tanhmã mẽ harênh to. Koja mẽhõ mẽ kãm Tĩrtũm nhỹ hã kapêr jarênh o pa hã amnhĩ jarê hã koja Jejus o kapêr punuj o pa hkêt nê. Koja harênh o:

—Jejus kêp mẽ panhõ Pahihti jakamã kwa pu mẽ hkõt amnhĩ xunhwỹ nê hkõt amnhĩ nhĩpêx o ri papa.

Anhỹr o harê. Koja mẽhõ ã mẽ amã kapêr anê ka mẽ ama nê mẽ kot Tĩrtũm nhỹ hã kapêr jarênh o pa xwỹnh ã omunh kurê kumrêx. No koja mẽ amã ã kapêr anhỹr kêt nê ka mẽ ama nê Tĩrtũm kapêr o hêx o pa hã omunh kurê kumrêx.

### Tĩrtũm Karõ kãm mẽ pahte axpên to mex prãm ã harênh

*Rõmãn 12.6; Epes 4.7; Wam Pêtre 4.10*

<sup>4</sup>Nê ahpỹnhã kot tanhmã mẽ panhĩpêx to xwỹnhja ãm pixii. Kêp Tĩrtũm Karõ. Na hte mẽ pahkarõ mã agjê nê ahpỹnhã tanhmã mẽ pahte axpên to mex kaxyw tanhmã mẽ panhĩpêx to. Kot tanhmã mẽ panhĩpêx to xãja ohtõ. Mẽ pahte ahpỹnhã ri tanhmã kãm amnhĩ nhĩpêx to nê tanhmã axpên to mex to ho ri papa kaxyw na. Tĩrtũm Karõ na hte ja kaxyw tanhmã mẽ pahkrã hto.

5Ně mẽ pahte kãm tanhmã amnhĩ nhĩpêx to ho papa xwỳnhja haxwỳja ãm pixii. Kêp Pahihti Jejus. Tã na pu htem ahpỳnhã kãm tanhmã amnhĩ nhĩpêx to ho ri papa.

6Ně kot mẽ pahto ajuta nhũm mẽ pahte ahpỳnhã tanhmã axpẽn to mex to ho papa xwỳnhja haxwỳja ãm pyxii. Kêp Tĩrtũm. Na pu htem ahpỳnhã tanhmã hkõt axpẽn xunhwỳr tỳx to kaxyw tanhmã axpẽn to mex to ho papa.

7Ně Karõja na hte ahpỳnhã tanhmã axpẽn kaxyw mẽ panhĩpêx to pu mẽ axpẽn to ajuta mex o ri papa.

8 Jakamã na pu hte mẽ pahkwỳjaja Tĩrtũm Karõ nhỹ hã ma mẽ pahkwỳjê mã Tĩrtũm kapêr jarênh o ri mẽ hkõt papa.

Ně mẽ pahkwỳjaja ma ỹ hã paxàhpumunh mex pê ma ri kapêr o mẽ ahkre ho mẽ hkõt papa.

9 Ně mẽ pahkwỳjaja Karõ nhỹ hã Tĩrtũm kot tanhmã mẽ pahto ajuta hto kaxyw hkõt pajamaxpêr tỳx nê.

Ně mẽ pahkwỳjaja akupỹm mẽ à xwỳnhjê ho mex o papa nhũm mẽ akupỹm mex nê pa.

10 Ně mẽ pahkwỳjaja aa mẽ kot mẽmoj pumunh kêt kwỳ ho anhỹr o ri mẽ hkõt papa.

Ně mẽ pahkwỳjaja Tĩrtũm kapêr mar tỳx nê ô ri mẽ kãm harênh o mẽ hkõt ri papa.

Ně mẽ pahkwỳjaja Tĩrtũm Karõ nhỹ hã tanhmã mẽ kot amnhĩ nhĩpêx to hã mẽ omunh o papa. Rỳ pahprĩ hã mẽkarõmnuti nhỹ hã mẽ kot amnhĩ nhĩpêx ã mẽ omunh o papa.

Ně mẽ pahkwỳjaja nhãm mẽ kapêr mar kêt tã ra mẽ kapêr o pakapêr.

Ně mẽ pahkwỳjaja mẽ kapêr o pakapêrja ma nê mẽ kot mar kêt xwỳnhjê mã harê. Kormã aa pahte mar kêt tã ra pahprĩ hã mar mex nê mẽ kãm harê.

11 ã na hte Tĩrtũm Karõ kãm hprãm xà hkõt tanhmã mẽ panhĩpêx to pu mẽ ahpỳnhã ỹ hã ã axpẽn nhĩpêx anhỹr o ri axpẽn kõt papa.

### **Te mẽ pahpê Kris nhĩ pyrãk ã mẽ pajarênh**

*Rõmãn 12.3-8; Epes 1.22-23, 4.11-16; Korosê 3.15*

12E pa hpãnhã mẽ amã mẽ panhĩ kamã tanhmã mẽmoj jarênh to ka mẽ inhma nê hã anohtỳx nê. Mẽ panhĩja ãm pixi htã no ãm kamã mẽmoj xohtôô. Kamã mẽ pahte nê kamã mẽ pahpa nê kamã mẽ pajakwa. Nê mẽ panhĩnhu nê mẽ pano. ã mẽ panhĩ kamã mẽmoj xohtô kot anhỹr. Ja pyrã nê Kris nhĩja ãm pixi htã te mẽ pahpê ĩ kamã mẽmoj xohtôta pyrãk. Mẽ pahkwỳjaja te mẽ pahpê hte pyrãk. Nê mẽ pahkwỳjaja te mẽ pahpê ĩhkra pyrãk. Nê mẽ pahkwỳjaja te mẽ pahpê no pyrãk.

13Mē pahpê Kris kwỳjaja axpēn kaxyw mē paxohtôô. Mē ixpê Ijaewjaja nê mē apê Ijaew kêt xwỳnhjaja. Nê amarī ri mē kām mē axapēnh o mē apa xwỳnhjaja nê amnhī mā ri mē axapēnh o mē apa xwỳnhjaja. Ā ahpỳnhã mē paxohtô kot anhỹr tã nhũm Tĩrtũm Karō te mē pahpê Kris nhī pixi pyrāk o mē panhĩpêx. Nhũm Krisja mē pahpiitã mē pamã Karō gō nhũm mē pahkarō mā agjê. Pixi htã mē pahpiitã mē pahkarō mā agjê.

14Nê mē panhĩja pixi tã kamã tanhmã mē pakute xàja ohtôô. Tã Kris nhĩja te kot mē panhĩja pyrāk. Urāk nê kamã mē paxohtôô. Jakamã na pu htem ahpỳnhã tanhmã kām amnhī nhĩpêx to ho ri papa. Karō kot tanhmã amnhī kaxyw mē panhĩpêx to xà hkôt.

15Nê kop ãm mē pahparja kapēr ronhỹx tee ri mē panhĩkra pumu nê amnhī mã:

—Hêxta waa nê. Kêp ãm ixpê mē ãhkra ronhỹx pa inhmex nê ijarir. No ãm ixpê mē hpar pix jakamã pēr ãm mē hkĩnhã ixpê mē hkwỳ hkêt ãm ixpê mē hatur xà pix na pa.

Anhỹr o amnhī jarēnh japêr. Nom ja kot anhỹr kêt. Axtem nhỹhỹm kot mē pahto pa kaxyw na mē pahparja. Nê axtem mēmoj tã mē paxapēnh rỳ mēmoj jamỳnh kaxyw na mē panhĩkraja. Na pu htem hamē wa ho presija rãhã ho papa. Ja pyrã nê kot puj mē pahkwỳjê hō mē parom Tĩrtũm Karō nhỹ hã mēmoj tã apēnh tỳx ã omu nê hkĩnhã mē pahte amnhī to warê hkêt ã amnhī jarēnh o papa hkêt nê.

16Nê mē pajamakja kapēr ronhỹx kapēr o:

—Hêxta waa nê. Kêp apu ixpê mē no ronhỹx pa inhmex nê ijarir. No ãm ixpê mē umar xà pix jakamã pēr ãm ixte ho warê hkêt kumrêx.

Anhỹr o amnhī jarēnh japêr. Nom ja kot anhỹr kêt. Hamē wa mex kênã. Axtem ho mē paxumar kaxyw na mē pajamakja. Nê axtem ho mē parīt kaxyw na mē panoja. 17Kêp ãm mē pano pix ronhỹx pu mē parīt pix nê paxumar kêt nê ri papa. Rỳ kêp ãm pajamak pix ronhỹx pu mē paxumar pix nê parīt kêt nê mē paxupār kêt nê ri papa. 18Mē panhĩja pixi htã kamã hikukrêx xohtôô. Na pre Tĩrtũm amnhī krã hkôt kamã mēmoj piitã hipêx nê hanhō. 19Kêp ãm mē panhĩja kamã ãm mēmoj pixi ronhỹx pu mē pamex kêt nê papa. 20Tã no ãm kot anhỹr kêt. Mē panhĩja ãm pixi htã kamã hikukrêx xohtôô. 21Jakamã na hte mē panoja amnhī nê mē panhĩkra mã kām:

—Tk kwa ma tẽ. Ixte ato presijare hã.

Anhỹr o kãm kapēr kêt nê. Rỳ mē pahkrãja amnhī nê mē pahpar mã kãm:

—Tk kwa ma tẽ. Na pa ato presija hkêt nê.

Anhỹr o kãm kapēr kêt nê. Ja pyrã nê kot puj mē nhỹri Kris kôt panhĩo pumu nê pamex o pahte hakrenh ã amnhī jarēnh kêt nê. 22Nê mē panhĩ kamã mēmoj kwỳ te hirerek pyrāk tã no pu mē arĩ pamã hapê

ně. Ja pyrà ně kêr pu mẽ kormã mẽ kot Kris kôt amnhĩ xunhwỳr tohtuj anhỳr xwỳnhjaja pu mẽ pamã mẽ hkĩnh kãm tanhmã mẽ kutã panojarêt to ho ri papa.

23-24Ně na pu htem mẽ panhĩ kamã mẽ pakukrêx kwỳ hã pahpijaàm mẽ hpro ně ri ho papa. Ně hkwỳ hã pahpijaàm kêt ně hpro hkêt ně ho ri papa. Ně hkwỳ mẽ pahpê omnajti htã pu mẽ ho mex ně ri ho papa. Tĩrtũm kot ã mẽ panhĩpêx anhỳr jakamã na pu htem mẽ pakamã mẽ pakukrêx kwỳ mẽ pahpê omnajti htã pu mẽ ho mex ně ri ho papa. Ja pyrà ně kêr pu mẽ Tĩrtũm kôt mẽ pahtõ mẽ mẽ pahtõx piitã ho mex o ri papa. Ně tãm mẽ hipêx. Mẽ pahkwỳjaja muxre ně mẽ pahkwỳjaja omnajti htãã. Tanhmã mẽ kute htã pu mẽ kêp mẽ Jesus kôt mẽ pahtõ mẽ mẽ pahtõx ã mẽ ho mex o ri papa.

25Ně na hte mẽ panhĩ kamã mẽ pahpar ně mẽ panhĩhkra ně piitã axpẽn kôt àpênh mex o pa. No na hte mẽ pahparja nhỹhỹm ma mra nhũm ihõja hkwỳm nhỹhỹm ma mrar kêt ně. Na hte wa axpẽn kôt àpênh mex o pa. Ja pyrà ně kêr pu mẽ pahpê Tĩrtũm krajaja axpẽn kôt amnhĩ nhĩpêx rãhã ho ri papa. Ně axpẽn to mex rãhã ho ri papa. No ri axpẽn kwỳm ri tanhmã amnhĩ nhĩpêx to ho ri papa hkêt ně.

26Na pu htem tõhã nhỹhỹnh panhĩ kamã paxà ně ri papa. Pahkrã tãtãk rỳ pakatut gêk. Jao te mẽ panhĩ piitã kamã mẽ paxà pyrãk. Ně nhỹhỹnh akupỹm pamex ně te panhĩ piitã hkôt akupỹm pamex pyrãk. Ja pyrà ně koja Kris kôt panhĩõ nhỹhỹnh à ně ri pa. Rỳ tanhmã amnhĩ to ně ra hkaprĩ ně ri pa pu mẽ ja hã omu ně ý hã pahkaprĩ ně papa. No koja mẽmoj tã hkĩnh ně pa pu mẽ ja hã omu ně ý hã pahkĩnh ně papa.

### **Te mẽ pahpê Kris nhĩ pixi pyrãk ã mẽ pa jarênh**

27Ně mẽ pahpê Kris kwỳjaja te mẽ pahpê Kris nhĩ pixi pyrãk. Ahpỳnhã mẽ pahte tanhmã amnhĩ nhĩpêx to ho papa htã mẽ pahpê Kris kwỳ jakamã te mẽ pahpê ĩ pixi pyrãk.

28Ně mẽ pahte Kris kôt tanhmã pahkwỳjê ho ajuta hto ho papa kaxyw na pre Kris ahpỳnhã tanhmã mẽ paxunhwỳr to.

Mẽ pahkwỳjaja mẽ pahte ý hã nhãm mẽ kãm kapêr jarênh o papa kaxyw mẽ paxunhwỳ.

Ně mẽ pahkwỳjaja mẽ pahte ý hã tanhmã kapêr jarênh to ho ri papa kaxyw mẽ paxunhwỳ.

Ně mẽ pahkwỳjaja Tĩrtũm kapêr jarênh o mẽ ahkre ho ri mẽ papa kaxyw mẽ paxunhwỳ.

Ně mẽ pahkwỳjaja mẽ pahte aa mẽ kot mẽmoj pumunh kêt kwỳ ho anhỳr o ri papa kaxyw mẽ pa xunhwỳ.

Ně mẽ pahkwỳjaja akupỹm mẽ à xwỳnhjê ho mex o mẽ papa kaxyw mẽ pa xunhwỳ.

Nē mẽ pahkwỳjaja mẽ kapēr o mẽ hihtỳx o mẽ papa kaxyw mẽ pa xunhwỳ.

Nē mẽ pahkwỳjaja mẽ pahte tanhmã mẽ ho ajuta ho ho ri papa kaxyw mẽ pa xunhwỳ.

Nē mẽ pahkwỳjaja nhãm mẽ kapēr ò ho mẽ pakapēr o mẽ papa kaxyw mẽ pa xunhwỳ.

Ã na pre ahpỳnhã mẽ pahpê hkwỳjê piitã mẽ paxunhwỳr anê. **29**No na pu htem pahpiitã axpên kôt Tĩrtũm kapēr o mẽ ahkre ho ri papa hkêt nê.

Nē mẽ pahpiitã ỹ hã tanhmã pakapēr to ho ri papa hkêt nê.

Nē mẽ pahpiitã kapēr jarēnh o ri papa hkêt nê.

Nē mẽ pahpiitã aa mẽ kot mẽmoj pumunh kêt kwỳ ho anhỳr o ri papa hkêt nê.

**30** Nē mẽ pahpiitã akupỳm mẽ à xwỳnhjê ho mex o ri papa hkêt nê.

Nē mẽ pahpiitã mẽ kapēr ò ho ri pakapēr o ri papa hkêt nê.

Nē mẽ pahpiitã ri mẽ kapērja ma nê pakapēr kãm pahkwỳjê mã harēnh o ri papa hkêt nê.

Na pu htem ahpỳnhã tanhmã Kris kôt mẽ pahkwỳjê ho ajuta hto ho ri papa. **31**Tã kēr pu mẽ pahpiitã pamã axpên kĩnh pê tanhmã axpên to mex to ho ri papa. Ja na mex o kot mẽmoj piitã hakrenh par. E kot paj ixprĩ hã tanhmã mẽ amã ja jarēnh to ka mẽ inhma.

### Mẽ pahte axpên kamã paxukapřĩ ho papa hã mẽ pamã karõ

*Juãw 13.31-35; Karatas 5.13-15; Korosê 3.12-14*

**13** <sup>1</sup>Kot pa ma mẽ piitã ahpỳnhã mẽ kapēr kãm mẽ kãm Tĩrtũm kapēr jarēnh o ri ixpa japêr. ãm mẽ piitã mẽ kapēr o ixkapêr mex o mẽ kãm harēnh o ri ixpa japêr. Nê Tĩrtũm kapēr o mẽ wrỳk xwỳnhjê kapēr o mẽ ahkre ho ri ixkwỳjê hkôt ixpa japêr. Tã inhmã mẽ hkĩnh kêt kãm ixte mẽ ahkre ho ri ixpa ronhỳx mẽ inhma nê ãm inhma. Nhũm ixkapêrja te ixte rat tatak pyræk o pa tee ri Tĩrtũm kapēr o mẽ ahkre kapřỳ ho ri mẽ hkôt ixpa nhũm Tĩrtũm tee ri inhmã mẽ hkĩnh kêt ã ixpumu nê inhmã:

—Nà amã mẽ hkĩnh kêt jakamã na ka tee ri ixkapêr o mẽ ahkre kapřỳ. Anê.

<sup>2</sup>Rỳ kot paj Tĩrtũm xàhpumunh tỳx o mẽ kãm kapêr pimxur kwỳ jarēnh o ri ixpa japêr. Rỳ Tĩrtũm mẽ kurom inhmã mẽmoj to amnhĩrĩt pa omu nê mẽ kãm harēnh o ri ixpa japêr. Rỳ pa Tĩrtũm kot amnhĩ nhĩpêx piitã omunh par japêr. Rỳ ixte amnhĩ kaxyw hkôt ijamaxpêr tỳx kôt ỹ hã kēn krã hprêk ò mã ixkapêr nhũm kot inhmar nê inhmar xà hkôt nhãm pikamēnh japêr. Tã inhmã ixkwỳjê hkĩnh kêt kãm ã amnhĩ nhĩpêx anê nhũm Tĩrtũm tee ri ja hã ixpumu nê inhmã:

—Nà amã mẽ hkĩnh kêt jakamã te axàhpumunh tỳx kêt kumrêx pyræk. Na ka tee ri ã mẽ kãm ixkapêr jarênh anhỹr o ri apa kaprỳ. Anê.

3Rỳ pa mẽ kêp amrakati xwỳnhjê mã ixkukrêx nhôr par japêr. Rỳ Kris ã mẽ kãm amnhĩ grôngh kôt mẽ kãm xa nhũm mẽ hã ixpĩr japêr. Tã inhmã mẽ hkĩnh kêt kãm ã amnhĩ nhĩpêx anê nhũm Tĩrtũm tee ri ja hã ixpumu nê inhmã:

—Nà ã ate mẽ kãm amnhĩ nhĩpêx anhỹr o ri apa htã amã mẽ hkĩnh kêt jakamã na ka tee ri ã mẽ kãm amnhĩ nhĩpêx anhỹr kaprỳ. Anê.

4Kot puj mẽ pamã axpên kĩnh hã kot puj mẽ kritpêm mẽ piitã mẽ kãm pahprĩ ho papa.

Jao axpên kãm pagryk tokyx anhỹr kêt nê.

Nê pamã axpên to mex pix prãm.

Nê mẽmoj tã axpên kamã pagryk kurê kumrêx kêt nê.

Nê mẽmoj tã amnhĩ to jarkrar o ri papa hkêt nê.

Kot puj mẽ pamã axpên kĩnh hã kot puj mẽ ã amnhĩ nhĩpêx anhỹr o ri papa hkêt nê.

5Nê kot puj mẽ axpên kamã paxukaprĩ ho papa hã kot puj mẽ tãm axpên nhĩpêx rãhã ho papa. Jao amnhĩ pix kukamã pajamaxpêr o ri papa hkêt nê. Nê mẽ pagryk tokyx anhỹr kêt nê. Rỳ axpên kãm pagryk tokyx anhỹr hkêt nê. Rỳ koja mẽhõ tanhmã mẽ panhĩpêx kati hto pu mẽ ãm amnhĩ tã omu nê axte kot tanhmã mẽ panhĩpêx tota mã pajamaxpêr kêt nê.

6Nê kot puj mẽ pamã axpên kĩnh o papa hã kot puj mẽ tee ri mẽhõ kot tanhmã amnhĩ tomnuj to hã omu nê pahkaprĩ nê. Rỳ tanhmã kot amnhĩ to mex to hã omu nê pahkĩnh nê.

7Nê kot puj mẽ pamã axpên kĩnh o papa hã kot puj mẽ arĩ Tĩrtũm kot mẽ pahto mex par jatur xà mêngh xà hã arĩgro jamãr rãhã ho ri papa. Nê mẽ kot Kris ã tanhmã mẽ pahto htã pu mẽ tee ri amnhĩ kukamã tanhmã pajamaxpêr to hkêt nê. ãm mẽ kutã amnhĩ to htỳx nê mẽ kãm pakuhê nê arĩ amnhĩ kaxyw Tĩrtũm mã pajamaxpêr tỳx rãhã nê.

8Nê kot puj mẽ pamã axpên kĩnh o papa hãmri nê aa mẽ pahte ã amnhĩ nhĩpêx anhỹrja mã panhũrer kêt nê. Nê arĩ mẽ pamã axpên kĩnh rãhã ho papa ho papa. Jar pika ja kamã mẽ pahte Tĩrtũm nhỹ hã mẽ kãm kapêr jarênh o ri papa htã kot puj mẽ nhỹrmã ma õ krĩ hwỳr api hãmri nê kuri axte ã kãm amnhĩ nhĩpêx anhỹr kêt nê. Mo kaxyw kot puj mẽ axte ri mẽhõ mã kapêr jarê? Kot puj mẽ õ krĩ hwỳr api nê ra mẽ pahpiitã paxàhpumunh o axpên pyræk.

Nê na pu htem tũhã mẽ kapêr õ ho pakapêr o ri papa. Nom kot puj mẽ nhỹrmã Tĩrtũm nhõ krĩ hwỳr api hãmri nê kuri axte nhãm ri mẽ kapêr o pakapêr kêt nê.

Nê na pu htem jar mẽ pahkwỳjaja mẽ paxàhpumunh mex kôt Tĩrtũm kapêr jarênh o ri papa. Tã kot puj mẽ nhỹrmã õ krĩ hwỳr api hãmri nê

axte ã amnhĩ nhĩpêx anhÿr kêt nê. ãm mẽ pamã axpên kĩnh pixja kot puj mẽ arĩ õ krĩ kamã mẽ pamã axpên kĩnh tũm rãhã papa ho papa. <sup>9</sup>Jar mẽ pahpiitã mẽ paxãhpumunh tohtuj anhÿr o pakapêr jakamã na pu htem kormã Tĩrtũm kapêr jarênh tohtuj anhÿr o ri papa. <sup>10</sup>Tã kot puj mẽ nhÿrmã õ krĩ hwÿr api nê kuri paxãhpumunh jatur xãm mẽnh pa. Jakamã nhũm jar mẽ paxãhpumunh tohtuj anhÿr xwÿnhhta mẽ pahpê hapêx.

<sup>11</sup>E pa mẽ amã ja hã ejêp jarê ka mẽ inhma. Nã amnepê mã ixprĩre ri na pa pre ixtÿx ri mẽhprĩjê kot amnhĩ nhĩpêx o amnhĩ nhĩpêx nê mẽ hamaxpêr o ijamaxpêr. Nê mẽ kapêr mex kêt o ixkapêr o ri ixpa. Tã ra ixaptãr hãmri nê mẽ aptãrjê jamaxpêr o ijamaxpêr o ri ixpa. Te ra mẽ pahte kaxkwa kamã mẽ paxãhpumunh jatur xãm mẽnh parta pyrãk mẽ aptãrjê jamaxpêr o ijamaxpêr o ri ixpa.


<sup>12</sup>Ja pyrã nê na pu htem kormã Tĩrtũm kot amnhĩ nhĩpêx ã omunh tohtuj anhÿr. Te mẽ pahte amnhĩ pumunh xã pynajre kamã pahprĩ hã amnhĩ pumunh mex kêêta pyrãk. Nom kot puj mẽ nhÿrmã õ krĩ hwÿr api hãmri nê pahprĩ hã paxãhpumunh jatur xãm kumê. Te Tĩrtũm kot hprĩ hã tanhmã mẽ pakute hã mẽ pahpumunh parja pyrãk.

<sup>13</sup>E arĩ mẽ pahte Tĩrtũm kôt amnhĩ nhĩpêx o papa xàja na axkrunêpxi. Mẽ pahte hkôt amnhĩ nhĩpêx o papa rãhã ho papa kaxyw. Wamta na ja: Kêr pu mẽ arĩ amnhĩ kaxyw Tĩrtũm mã pajamaxpêr mex rãhã ho ri papa. Nê hkôt ja: Kêr pu mẽ arĩ Tĩrtũm kot mẽ pahto mex par jatur xã mẽnh xã hã arĩgro jamãr rãhã ho papa. Nê hkôt ja: Kêr pu mẽ arĩ pamã axpên kĩnh pê tanhmã axpên to mex to rãhã ho papa. Ja na mex o kot wamta wa hakrenh. E kêr pu mẽ ã amnhĩ nhĩpêx anhÿr rãhã ho ri papa.

### Tĩrtũm Karõ kot mẽ pahto mẽ paxihtÿx ã harênh

*Wam Korĩt 12.7-11, 12.27-31*

**14** <sup>1</sup>E kêr ka mẽ arĩ amã axpên kĩnh pê axpên to mex rãhã ho ri apa nê aa jam anhÿrer nê ho ajamakêtkati hkêt nê. Nê amnhĩ to Tĩrtũm Karõ mãn amnhĩ to awÿ kê mẽ amã tanhmã mẽ ajamaxpêr to ka mẽ ahpÿnhã tanhmã axpên to mex to ho ri axpên kôt apa. Nê kêr ka mẽ ã ajamaxpêr anê nê ajamaxpêr o:



*Wam Korĩt 13.11-12*

—Inhmã mẽ hkính o ri ixpa hprãm tỳx. Nễ Tirtũm Karõ kot tanhmã ixto nhũm ixte ahpỳnhã tanhmã mẽ ho ajuta hto ho ixpaja pa mãânẽn inhmã ho anhỳr prãm. Nễ kot tanhmã ijakwa hto nhũm ixte ahpỳnhã mẽ kapễ õ ho ixkapễja pa mãânẽn inhmã ho anhỳr hprãm. No kêt ixte Tirtũm nhỹ hã mẽ kãm kapễ jarẻnhja na inhmã ho anhỳr prãm tỳx kumrẻx. Anẻ.

2-4Mẻ pakamã mẽ kapễ õ ho Tirtũm mã kapễ xwỳnhjaja na htem Tirtũm Karõ nhỹ hã ăm kumã pix mã kapễ õta o kãm kapễ nhũm tapxipix mẽ kuma. No mẽ papajaja na pu htem tee ri mar o pahkrĩ nom mar kêt nẻ. ăm kapễ xwỳnhhta pix koja mẽ pakurom amnhĩ ma. Nom koja mẽ pakapễ kãm Tirtũm mã amnhĩ jarẻ pu mẽ mar mex nẻ. Nhũm mẽ pakapễ kãm Tirtũm nhỹ hã mẽ pamã kapễ jarẻ pu mẽ pahprĩ hã kuma. Jao mẽ pamã kapễ kôt amnhĩ nhĩpẻx prãm nẻ. Nễ mẽmoj tã pahkaprĩ nẻ ri papa htã mẽ kuma nẻ amnhĩ kaxwỳnh kãm amnhĩ to paxihtỳx.

5Mẻ apiitã mẽ ate nhãm mẽ kapễ õ ho Tirtũm mã amnhĩ jarẻnhja na mex. Nom mẽ ate mẽ akapễ o mẽ akwỳjẻ mã Tirtũm kapễ jarẻnh o ri mẽ apaja na mex o wamta jakre. Kot ka mẽ nhãm mẽ kapễ õ ho Tirtũm mã amnhĩ jarẻ nhũm mẽ akwỳjaja mẽ amar kêt jakamã ka mẽ ả akapễ anhỳrja o Kris kôt mẽ ho mẽ hamaxpễ o hihtỳx kêt nẻ. ăm kapxipix amnhĩ ma. Rỳ koja kapễ õja mar mex xwỳnhjẻ hỏ amar japẻ nẻ mẽ akapễ kãm akwỳjẻ mã harẻ. Hã koja ja mex nẻ. Nom kot kaj mẽ apiitã ma mẽ kapễ kãm mẽ kãm Tirtũm kapễ jarẻnh o ri apa nhũm mẽ piitã hprĩ hã amar mex nẻ. Nễ amar xà hkôt Tirtũm kapễ kôt amnhĩ nhĩpẻx mex nẻ. 6Jakamã e Kris kôt ixtỏ nẻ ixtỏxjaja. Kot paj apu nhỹrmã ma mẽ awỳr mỏ hãmri nẻ nhãm mẽ kapễ õ ho mẽ amã ixkapễ japẻ ka mẽ inhmar kêt nẻ. Nom kot paj mẽ akapễ o mẽ amã ixkapễ ka mẽ apiitã aprĩ hã inhmar mex nẻ. Pa Tirtũm nhỹ hã mẽ amã mẽmoj jarẻ rỳ tanhmã kot amnhĩ nhĩpẻx toja pa mẽ amã harẻ. Rỳ Karõ nhỹ hã mẽ amã mẽmoj jarẻnh o ả mẽ amã Tirtũm kapễ jarẻnh anẻ ka mẽ aprĩ hã inhmar mex nẻ. 7Nom mẽ kapễ õ ho mẽ kapễ o mẽ akôt ri mẽ pa xwỳnhjaja te mẽhỏ kot htỳx ri wiorảwti kakrẻnh xwỳnh pyràk. Koja htỳx ri hkakrẻnh o xa nhũm mẽ tee ri kot grer mar mã. Rỳ nhũm mẽhỏ htỳx ri pifti kakỏr o xa nhũm mẽ tee ri mẽmo mẽ grer mar mã.

8Pỏristijaja na htem amarĩ ri tanhmã amnhĩ nhĩpẻx to ho pa nhũm mẽ hkrảhtũnja mẽ kãm pifti kakỏ nhũm mẽ kuma nẻ mẽ pijapu mã hamaxpẻ kurẻ kumrẻx nẻ hwỳr hprỏt. Nom koja kawax pẻ hkakỏ rỳ htỳx ri tanhmã hkakỏ to nhũm mẽ kuma nẻ ăm kuma. 9Ja pyrỏ nẻ kot kaj mẽ kapễ õ ho akwỳjẻ mã akapễ nhũm mẽ ama nẻ ăm mẽ ama. Ka te ăm mẽ kãm ajakwa momok pyràk o axãm o amnhĩ nhĩpẻx.

10Nẻ ahpỳnhã mẽ pakapễ xohtỏỏ. Na htem ahpỳnhã mẽ kapễ o amnhĩ kwỳjẻ mã kapễ nẻ axpẻn mar mex nẻ. 11Nom koja mẽhỏ

nhÿhÿnh pika hõ rûm ixwÿr mõ nẽ mẽ kapêr o inhmã kapêr pa mar kêt nẽ. Nẽ amnhĩ xwar kutã ixkapêr o kãm ixkapêr nhũm ixpyrà nẽ inhmar kêt nẽ. 12Jakamã kot kaj mẽ amã Tirtũm Karõ xihtÿx xà ho amã tanhmã kãm amnhĩ nhĩpêx to ho apa hprãm hã kot kaj mẽ amnhĩ to awÿ nẽ kãm:

—Kwa amnhĩ kôt ijamaxpêr o axihtÿx Tirtũm. Pa anhÿ hã ixkapêr o ma Kris kôt ixkwÿjê ho mẽ hamaxpêr o ixihtÿx o ri mẽ hkôt ixpa. Kê mẽ akapêr ma nẽ Kris kôt amnhĩ xunhwÿr tÿx nẽ. Nẽ hkôt amnhĩ nhĩpêx mex o ri pa. Anẽ.

13Nẽ kêr ka mẽ nhãm mẽ kapêr õ ho Tirtũm mã amnhĩ jarênh xwÿnhjaja amnhĩ to Tirtũm Karõ wÿ nẽ kãm:

—Ixte mẽ kapêr õ ho ixkapêr tã ixte amnhĩ mar kêt. Jakamã kwa tanhmã ixto ijamaxpêr mex to pa amnhĩ mar mex nẽ ixkapêr kãm ixprĩ hã Kris kôt ixkwÿjê mã ja jarê kê mẽ inhmar tÿx nẽ. Anẽ.

14Nom kot paj nhãm mẽ kapêr õ ho Tirtũm mã mex ã harênh tã amnhĩ mar kêt nẽ. Te ixpimtir kãm ixkarõ pix kapêr pyrãk. No kot paj pam amnhĩ krã hkôt ixkapêr o kãm mex ã harê hãmri nẽ ra amnhĩ mar mex nẽ. 15Nà ja na inhmã mex jakamã kot paj nhãm mẽ kapêr õ ho Tirtũm mã mex ã harê nẽ kãm gre. Nẽ mãânên ijamaxpêr xà hkôt ixkapêr o mãânên kãm mex ã harê nẽ kãm gre. Nà ja na inhmã mex. 16Nom kot puj mẽ ma mẽ kot Tirtũm kapêr mar xà hã ixkre hwÿr mra nẽ kamã Tirtũm mã mex ã harê. Tã pa nhãm mẽ kapêr õ ho kãm ixkapêr japêr. Ka mẽ ate inhmar o akrÿ xwÿnhjaja tee ri inhma. Jakamã tee ri inhma nẽ ixkôt Tirtũm mã akapêr kêt nẽ. Rÿ kãm:

—Nà ãm hãmri na ã amex ã ajarênh anẽ Tirtũm.

Anhÿr o kãm akapêr kêt nẽ. Mẽ ate inhmaare hã kot ka mẽ ã kãm akapêr anẽ. Jakamã kot paj ri mẽ akamã mẽ kapêr õ ho ixkapêr kêt nẽ. ãm mẽ akapêr pix o mẽ anom Tirtũm mã mex ã harê. 17Kot paj mẽ kapêr õ ho Tirtũm mã mex o mex ã harênh mex tã ka mẽ mẽmo mẽ kapêrja aprĩ hã mar kêt jakamã inhmar pê Tirtũm kôt amnhĩ xunhwÿr tÿx kêt nẽ.

18Na pa hte tõhã mẽ arom nhãm mẽ kapêr õ ho Tirtũm mã amnhĩ jarê. Nom nhÿri ahte nhÿ nẽ ã kãm amnhĩ jarênh anẽ. ãm hãmri na pre Tirtũm ja kaxyw tanhmã ixto pa hte ã amnhĩ nhĩpêx anhÿr o ri ixpa.

19Tã na pu htem Tirtũm mã mex o mex ã harênh kaxyw nẽ ma mẽ kot kãm amnhĩ jarênh xà hã ixkreta wÿr axpên wÿr mra pa mẽ pikuprõnh xwÿnhjê kapêr o mẽ kãm ixkapêr. Nom kot paj nhãm mẽ kapêr õ ho mẽ kãm ixkapêr ry rax kumrêx tã no nhũm mẽ inhmar kêt nẽ. Nom kot paj mẽ kapêr o ãm ixkapêr krãnre htã no nhũm mẽ inhmar mex kurê kumrêx. Ja na inhmã mex. 20Kwa mẽ ixkapêr ma nẽ mar tÿx nẽ. Nẽ mẽhprĩrejê jamaxpêr o ajamaxpêr kêt nẽ. ãm Kris kôt mẽ àptar tũmjê jamaxpêr o mãn kêt mẽ ajamaxpêr o ri apa. ãm mẽmoj pixire hkôt kot kaj mẽ ãm hãmri te mẽhprĩjê jamaxpêr pyrãk o ajamaxpêr.

Mêhprījaja na htem mëmoj punuj kukamã hamaxpêr kêt nê. Na htem âm htÿx pa. Tã kêr ka mê uràk nê mëmoj punuj kukamã ajamaxpêr o ri apa hkêt nê.

<sup>21</sup>Amnepê m na pre Tirtũm tanhmã Ijaewjê mã kapêr to. Mê kapêr o mê kãm kapêr tã no nhũm mê kuma nê âm kuma. Jakamã nhũm tee ri ja hã mê omu nê amnhĩ tã tanhmã mê harênh to. Tanhmã mê harênh toja Tirtũm kapêr ã kagà htũm kamã na. Kot mê harênh kot:

E kot paj ma mê hwÿr axtem pika hõ rũm pôristi hkwȳ rê kê mê ma mê hwÿr mra nê mê unê. Hãmri nê amnhĩ kapêr o mê kãm kapêr nhũm mê tee ri mê kuma no âm hkôt mëmoj pumunh kêt nê.

Koja mê ã mê hipêx anhÿr tã nhũm mê arĩ kãm ixkapêr mar nê amnhĩ kaxyw ixkôt hamaxpêr prãm kêt nê. Anê.

Tirtũm kapêr ã kagà htũm kot ã mê harênh kot anhÿr. <sup>22</sup>Jakamã kot kaj mê Tirtũm mã amnhĩ jarênh xà hã ixkre hwÿr akuprõ nê mê kapêr õ ho Tirtũm mã amnhĩ jarênh japêr. Nhũm Kris kôt amnhĩ xunhwÿr kêt xwÿnhjaja mê akôt agjê nê hkrĩ nê tee ri mê akapêr ma nê Kris kôt amnhĩ xunhwÿr kêt nê. Tanhmã kot mê amnhĩ to nê hkôt amnhĩ xunhwÿ? Mê kot akapêrta maare hã. No kot ka mê akapêr o Tirtũm nhÿ hã mê kãm akapêr nhũm mëhprĩ hã amar mex nê. Jao tanhmã hamaxpêr to nê mê apyrà nê Kris kôt amnhĩ xunhwÿr japêr. <sup>23</sup>Nom kot ka mê apiitã nhãm mê kapêr õ ho Tirtũm mã mex ã harê nhũm amarĩ ri mê pa xwÿnhjaja mê awÿr agjê nê mê akapêr ã mê ama nê hã mê apumu. Hãmri nê tee ri hamaxpêr nê mê akrã pipãnh ã axpên mã mê ajarê. <sup>24</sup>Nom koja mê awÿr agjê ka mê akatãt kôt mê amnhĩ kapêr o Tirtũm kapêr jarênh o akuhê nhũm mëhprĩ hã mê amar mex nê. Hãmri nê amnhĩ kapêr o akapêr ma nê hamaxpêr o:

—Hêxta waa nê. Xep ixte amnhĩ tomnuj xwÿnh na pa. Nã âm hãmri na mê Tirtũm kapêr jarê. Nã âm hãmri na kêt ja. Anê.

<sup>25</sup>Hãmri nê mê amã tanhmã kot amnhĩ tomnuj to hã amnhĩ jarênh pa hãmri nê hkaga nê Jejus kôt amnhĩ xunhwÿ. Nê hkõnkrã ho htêm nê hkrĩ nê Tirtũm mã mex o mex ã harê. Hãmri nê mê amã:

—Nã âm hãmri na hte Tirtũm mê akamã pa ho pa. Anê.

**Tirtũm nhõrkwÿ kamã mê pahte tanhmã amnhĩ nhĩpêx to hã  
mê pamã karõ**

*Atrẽ 2.42, 5.12-13; Eprêw 10.25*

<sup>26</sup>E Jejus kôt ixkwÿjaja. Kot paj hpãnhã axtem mê amã mëmoj tã karõ. Mê kot Tirtũm mã amnhĩ jarênh xà hã ixkre kamã tanhmã mê ate amnhĩ nhĩpêx to hã karõ ka mê inhma.

Nã kêr ka mê axpên wÿr akuprõ nê akrĩ ka mê atõ amã Tirtũm mã mex ã harênh ã mê grer o agrer prãm hãmri nê mãmrĩ kãm ho gre.

Hāmri nē agrer pa kê apānhā mēhō kànhmā xa nē Tirtūm kapēr kwỳ ho mē ajahkre. Nē ho anhỳr pa nhūm hpānhā mēhō kànhmā xa nē Tirtūm kot tanhmā ho mex to hā mē amā amnhĩ jarē. Nē amnhĩ jarēnh pa hāmri nhūm mēhō nhām mē kapēr ō ho mē amā ujarēnh japêr. Hāmri nē ujarēnh pa kê mēhō hpānhā mē akapēr o hprĩ hā mē amā kapërta jarē.

E kêr ka mē axpēn wỳr akuprō nē Kris kôt axpēn to axihtỳx kaxyw ā axpēn pānhā amnhĩ nhĩpêx anē.

27Nē ka mē atō amā nhām mē kapēr ō ho mē kām akapēr prām japêr. Nom kêr ka mē axohtō nē ā mē kām amnhĩ nhĩpêx anhỳr kêt nē. Ām mē atō wa axkrutre rỳ axkrunēpxire nē mē kapēr ō ho mē kām akapēr. Hāmri nē axpēn pānhā akapēr pa kê mēhō kot hprĩ hā mē kapēr ōta mar japêr nē mē apānhā xa nē mē akapēr o mē kām harē kê mēhprĩ hā mar mex nē. 28Nom koja ja kaxyw mēhō amrakati japêr ka mē kapēr ō ho akapēr kêt nē. Ām kapxipix nhỹri ahte Tirtūm mǎ akapēr.

29Nē kê Tirtūm nhỹ hā kapēr jarēnh xwỳnhjê hō wa axkrut rỳ axkrunēpxi nē mē ajahkre ka mē aprĩ hā mar o akrĩ. Hāmri nē mar pa nē tanhmā mē harēnh to. Ām hāmri Tirtūm nhỹ hā kapēr ā mē harē rỳ ho hêx ā mē harē.

30Nē koja mēhō Tirtūm nhỹ hā mēmoj jarēnh o xa. Rôm nhūm Tirtūm mē kaxyw mē atō mǎ ajamaxpēr kwỳ gō. Ka kapēr o ām xwỳnhhta mǎ kànhmā anhĩkra pē kê apumu nē anhĩkrê. Hāmri ka hpānhā xa nē mē kām tanhmā ajamaxpēr tota jarē. 31Nom kêr ka mē anhĩpê mē kām akapēr hkêt nē. Ām axpēn pānhā Tirtūm kapēr o axpēn jahkre nē ho axpēn jamaxpēr o axihtỳx. Ja mex. 32-34Nom kêr ka mē axpēn wỳr akuprō nē apiitā anhĩpê atỳx ri akapēr kêt nē. Ja na Tirtūm kêp hprām nōkati. Mē ate axpēn pānhā axpēn mǎ akapērja na kām hprām. Jakamā kê mē kot Tirtūm nhỹ hā mē kapēr jarēnh o pa xwỳnhjaja taxy axpēn jahkre hā axpēn jamǎ. Nhūm mēhō kumrêx kapēr pa hāmri ka hpānhā mē kām akapēr.

Nē kê mēnijaja amarĩ mē ahkreja mar o hkrĩ. Ijaew kot amnhĩ nhĩpêx xà hkôt. Jakamā kwa mē anijaja. Kêr ka mē amarĩ akryk mē mar o akrĩ nē axpēn mǎ akapēr o akrĩ hkêt nē. 35No kot kaj mē tee ri mēmoj ma nē mar mex kêt japêr tǎ hā axpēn kukjêr kêt nē. Ām akryk arĩ mar o akrĩ. Hāmri nē akupỳm anhōrkwỳ hwỳr tē nē rĩ kormā hā amjên kukja. Nom kot ka mē apikuprōnh xà hā ixkre kamā axpēn mǎ akapēr o akrĩ nhūm mē amjênjaja tee ri ja hā mē apumu nē hpijaàm nē.

36E na pa ā Tirtūm mǎ amnhĩ jarēnh xà hā ixkre kamā tanhmā mē pahte amnhĩ nhĩpêx to hā mē amā karō anē. Tǎ te mē apê ja mex kêt pyràk. Kwa mon ka wem ja ma nhūm mē apê omnuj nē? Xà mē ate Tirtūm kapēr mar mex o ijakrenh kôt na ka mē ā ajamaxpēr anē? Xà na pre Tirtūm mē akumrêx mǎ kapēr? Hā na ka mē ā ajamaxpēr anē? Rỳ xà mē kapxipix mǎ na pre kapēr? Hā na ka mē ixkapēr ma nhūm mē apê

omnuj nê? Nà ixkumrêx na pa pre mẽ awỳr inhmôr nê mẽ amã Tirtũm kapêr jarênh kênã kot ka kêt mẽ axtem nê ã ajamaxpêr anê. 37Kot kaj mẽ atô ã ajamaxpêr anhỳr japêr nê ajamaxpêr o:

— Nà na pre Tirtũm tanhmã inhmã kapêr to pa ô ri mẽ kãm ixujarênh mex o ri ixpa.

Anhỳr o ajamaxpêr. Rỳ ajamaxpêr o:

— Nà na pre Tirtũm Karô mẽ kaxyw tanhmã ixto pa ỹ hã tanhmã mẽ ho mex to ho ri ixpa.

Anhỳr o ajamaxpêr. Kot kaj mẽ ã ajamaxpêr anê hãmri nê mãânên pa ã ixte amnhĩ nhĩpêx anhỳr ã ixpumunh mex kurê kumrêx. Amnhĩ pyrã nê ixte Tirtũm nhỹ hã mẽ kãm ixkapêr xwỳnh ã ixpumunh nê hã ijarênh kurê kumrêx. 38Nom koja ja hã ijarênh kêt ka mẽ ja hã omu hãmri nê tanhmã kot mẽ amã kapêr toja ma nê ãm ama.

39E Kris kôt ixtô nê ixtôxjaja. Kêr ka mẽ amnhĩ to Tirtũm Karô wỳ kê ma mẽ ate mẽ kãm Tirtũm kapêr jarênh o ri apa kaxyw mẽ ato mẽ axihtỳx.

Nê koja mẽhõ kãm nhãm mẽ kapêr ô ho kapêr prãm ka mẽ ja nê kãm akapêr kêt nê. Kwãr mãmrĩ ã amnhĩ nhĩpêx anê. 40Nom kêr ka mẽ ate Tirtũm mã amnhĩ jarênh xà hã ixkre kamã axpên pãnhã axpên mã akapêr nom anhĩpê kãm akapêr hkêt nê.

### Kris akupỳm htĩr kumrêx ã harênh

*Atre 2.23-36, 10.39-41; Wam Korîť 6.14*

**15** 1E Kris kôt ixkwỳjaja. Kot paj axte mẽ amã Jejus kot mẽ panê tanhmã amnhĩ nhĩpêx to hã harê ka mẽ inhma. Na pa pre ra mẽ amã ja jarê ka mẽ ama nê hkôt amnhĩ xunhwỳ. Nê hkôt amnhĩ nhĩpêx mex o ri apa. 2Na pa pre mẽ amã harê ka mẽ amnhĩ kaxyw kãm ajamaxpêr tỳx nê nhũm Tirtũm mẽ ato hkra. Tã ka htem arĩ kapêr kôt amnhĩ nhĩpêx mex o ri apa. Koja mẽhõ kot Tirtũm kapêr mar tã amnhĩ kaxyw hkôt hamaxpêr kêt nê nhũm Tirtũm tee ri amnhĩ tã omu nê ho hkra hkêt nê.

3Na pa pre amnhĩ krã hkôt mẽ amã tanhmã Kris jarênh to hkêt nê. Ixte kapêr mar xà hkôt na pa hte amnhĩ xô ri mẽ amã tanhmã harênh to ho ri ixpa. Jejus jarênhja na mex o kot mẽ ujarênh piitã hakrenh par kumrêx. Tã tãm kot paj mẽ amã harê. Na pre Krisja mẽ pahte amnhĩ tomnuj pãnhã amnhĩrer kaxyw mẽ panê ty. Tirtũm kapêr ã kagà htũm kot hkukamã harênh xà hkôt. 4Hãmri nhũm mẽ kên kre kamã haxà nhũm kamã nôr o apkati. Nê axte hã apkati. Hãmri nhũm Tirtũm akupỳm ho htĩr. Kapêr ã kagà htũm kot hkukamã harênh xà hkôt. 5Tã nhũm Simãw Pêtre kumrêx akupỳm htĩr ã omu nhũm hpãnhã Jejus nhỹ hã mẽ ahkre ho mẽ pa xwỳnh maatiijaja haxwỳja omu. 6Hãmri nhũm mẽ kot hkôt mẽ pa xwỳnh pê 500 jakrenh xwỳnh piitã anhĩpê

haxwỳja akupỳm htír kām omu. Na pre ra mẽ hkwỳjjaja ty nhũm mẽ hkwỳjjaja arī htír nẽ pa. <sup>7</sup>Jakamā nhũm prem ra akupỳm htír kām omu. Hāmri nhũm hpānhã Xiakreja omu. Nhũm hpānhã ỹ hã mẽ ahkre o mẽ pa xwỳnh piitã omu. Akupỳm htír kām omu. <sup>8</sup>Tã pa na pa pre ijaxwỳja amnhĩ to hapu nẽ akupỳm htír kām omu. Te ixpê mẽ hkra kot hapu pyrã nẽ amnhĩ to hapu nẽ omu. Na pre kaxkwa kamã inhmã kapēr o xa pa ixprĩ hã omu. <sup>9</sup>No mẽ kot ixpyrã nẽ Kris nhỹ hã mẽ ahkre ho mẽ pa xwỳnh maati hkwỳjjaja na mẽ mex o kot ijakrenh. Na pa pre hte mẽ hkĩnhã amnhĩ tomnuj tỳx nẽ. Jao Kris pê hkrajê homnuj tỳx o ri ixpa. Tã hkôt amnhĩ xãm hāmri nẽ tee ri ã amnhĩ nhĩpêx anhỹr ã amnhĩ pumu nẽ amnhĩ kamã xipiijaàm tỳx nẽ. Jakamã na pa hte Kris nhỹ hã kapēr jarēnh o ixpa hã amnhĩ pumu nẽ ixte hkôt amnhĩ xãm kêt ri tanhmã ixte amnhĩ nhĩpêx toja mã ijamaxpēr nẽ xipiijaàm nẽ. <sup>10</sup>Na pa pre amnhĩ tomnuj tỳx o ixpa htã nhũm Tĩrtũm arī kām ijapê nẽ. Nẽ ixkamã ukaprĩ nẽ. Pa pre hkôt amnhĩ xãm nhũm ixto hkra pa ra kãm tanhmã amnhĩ nhĩpêx to mex rãhã ho ixpa. Jakamã na hte tee ri amnhĩ tã ixpumu nẽ tanhmã hamaxpēr to hkêt nẽ. Rỳ hamaxpēr o:

—Hêxta waa nẽ. Inhmã Pawre japê nẽ ixte ho mex tã nhũm ixkôt amnhĩ nhĩpêx kêt kumrêx.

Anhỹr o tee ri hamaxpēr kêt nẽ. Na pa hte kãm tanhmã amnhĩ nhĩpêx to ho ixpa rũnh o ỹ hã mẽ kapēr o pa xwỳnh kwỳjê jakre ho ixpa. Nom amnhĩ krã hkôt mẽ ahkre hkêt nẽ. Ja kaxyw na pre Tĩrtũmja ixto ixihtỳx pa ỹ hã kãm tanhmã amnhĩ nhĩpêx to ho ri ixpa nhũm ja hã ixpumu nẽ hkĩnh nẽ.

<sup>11</sup>Nẽ Jejus jarēnhja ãm pixii. Axtem hõ hkêt. Nẽ ỹ hã mẽ ahkre ho mẽ pa xwỳnhjê kapērja nẽ pa ixte mẽ amã harēnhja kot axpēn pyrãk. Harēnh tipxi. Kris kot mẽ pahte amnhĩ tomnuj mỳrapê mẽ panê htyk nhũm Tĩrtũm kot akupỳm ho htír ã wa harēnhja na pa hte pix jarēnh o ri mẽ akôt ixpa. Ka prem inhma nẽ amnhĩ kaxyw hkôt ajamaxpēr tỳx nẽ.

### **Tĩrtũm kot akupỳm mẽ pahto mẽ pahtír ã harēnh**

*Rukre 20.37*

<sup>12</sup>Nẽ kwa ra ixte mẽ amã Kris htyk nẽ akupỳm htír ã harēnh tã ka xep mẽ akwỳjjaja axtem nẽ mẽ htyk nẽ akupỳm mẽ htír kêt ã mẽ hkamnhĩx o ri apa. <sup>13</sup>Kwa mẽ ajamaxpērja mex kêt. Kêp apu ãm hāmri mẽ ate ã mẽ harēnh anhỹr ronhỹx pre Kris haxwỳja akupỳm htír kêt nẽ. Nhỹx pre htyk o ty.

<sup>14</sup>Nẽ kêp apu Kris akupỳm htír kêt ronhỹx pa mẽ ãm mẽ amã kapēr jarēnh o ixpa kaprỳ. Ka mẽ ajaxwỳja amnhĩ kaxyw hkôt ajamaxpēr kaprỳ.

- 15 Nē kēp ãm akupÿm mẽ htĩr kêt ronhÿx pa mẽ ixte mẽ amã  
Tĩrtũm kapēr jarēnh o ri ixpa xwÿnhjaja mẽ amã ho ixēx  
o ri ixpa. Na pa htem mẽ amã Tĩrtũm ra kot akupÿm Jejus  
o htĩr ã harēnh o mẽ akôt ixpa. Tã kēp apu akupÿm mẽ  
htĩr kêt ronhÿx pa mẽ ãm mẽ amã harēnh o ixēx.
- 16 Nē kēp apu akupÿm mẽ htĩr kêt ronhÿx pre Kris haxwÿja  
akupÿm htĩr kêt nē. Nhÿx pre ãm amarĩ tyn hapēx.
- 17 Nē Kris amarĩ htyk nē hapēx ronhÿx kot pu mẽ ri amnhĩ kaxyw  
hkôt pajamxpēr nē hkôt amnhĩ xunhwÿr kaprÿ.  
Nē Kris amarĩ htyk nē hapēx ronhÿx pre Tĩrtũm Jejus kukwak ri  
mẽ panē mẽ pahte amnhĩ tomnuj o hapēx kêt nē. Nhÿx pu  
mẽ pahpiitã nhÿrmã ma kuwy hwÿr pajapēx pa.
- 18 Nē kēp apu Kris htyk nē hapēx ronhÿx ra mẽ kot amnhĩ kaxyw  
hkôt hamaxpēr tã ra htyk xwÿnhjaja ma mẽ kot amnhĩ  
tomnuj mÿrapê kuwyta wÿr hapēx.
- 19 Nē kēp apu Kris htyk kumrēx nē hapēx ronhÿx pu mẽ kormã  
pahtyk kêt xwÿnhjaja tee ri amnhĩ wÿr kamã pajamak o ri  
papa kaprÿ. Nē pahpê hkra hã amnhĩ jarēnh kaprÿ. Jao  
pahkaprĩ htÿx o mēmoj piitã hakrenh par kumrēx nē ri  
papa.

**Kris kumrēx akupÿm htĩr ã harēnh**

*Atre 26.23; Sikũn Korīt 4.14; Piripos 3.10-11;*

*Wam Tesarõn 4.15-18; Apokarip 20.1-15*

20Nã mẽ htyk nē nhÿrmã akupÿm mẽ htĩr kêt ã mẽ harēnhja kot  
anhÿr kêt. Ra Tĩrtũm kot akupÿm Kris o htĩr jakamã koja määnēn hkra  
htyk xwÿnhjaja nhũm mẽ piitã Jejus pyrã nē nhÿrmã akupÿm mẽ ho htĩr  
pa. Jakamã na pu htem Kris akupÿm htĩrja mã pajamaxpēr nē amnhĩ  
kukamã pajamaxpēr o:

—Nã ra Tĩrtũm kot akupÿm Jejus o htĩr jakamã koja uràk nē nhÿrmã  
akupÿm mẽ pahte hkôt amnhĩ xunhwÿr xwÿnh piitã mẽ pahto mẽ  
pahtĩr. Nã koja ã mẽ panhĩpēx anē. Ja kaxyw àhpumunh tÿx kumrēx  
xwÿnh kēnã. Anē.

21Nē amnepēm na pre Tĩrtũm my kot waja nhĩpēx. Hãmri nhũm kot  
tanhmã amnhĩ tomnuj to ho ra mẽ htykja o hkrax. Tã nhũm wamta kôt  
my hõta wamta rom amnhĩ to mex o mẽ htyk tã akupÿm mẽ ho htĩr o  
hkrax. 22-23Tã mẽ pahpê wam my pê Atãw kanrēhã tàmnhwÿ jakamã  
kot puj mẽ uràk nē nhÿrmã ty. No ãm määnēn mẽ pahpê Kris kraa. Kris  
kumrēx na pre akupÿm htĩr. Tã koja nhÿrmã akupÿn mẽ pahwÿr wrÿ  
hãmri nhũm Tĩrtũmja kot hipēx pyrã nē akupÿm mẽ pahto mẽ pahtĩr.  
Mẽ pahte hkôt amnhĩ xunhwÿr ã mẽ pahpumunh kôt akupÿm mẽ pahto  
mẽ pahtĩr pa. No ãm kormã.

**Kris nhÿrmã kot mẽ htyk o hapêx ã harênh**

*Juãw 11.25; Rômãn 6.23; Wam Korit 15.54;  
Sikũn Ximotre 1.10; Eprêw 2.14; Apokarip 20.14*

24-28Nê koja Kris arĩ mẽ ho amnhĩptàr rãhã nhũm Tirtũm mẽ kot kutã amnhĩ xunhwÿr xwÿnhjê pê mẽ hihtÿx xà ho hapêx pa. Kapêr ã kagà htũm kot ja jarênh kot:

Koja nhÿrmã Tirtũm Kris kot kãm mẽ ho amnhĩptàr kaxyw ãm.  
Anê.

Jakamã Jejus tapxipix koja mẽ ho amnhĩptàr o pa. Koja Tirtũm pix mẽ ho amnhĩptàr kêt nê. Nom koja pahi hkwÿjê hõ axte nhãm mẽ ho amnhĩptàr kêt kumrêx.

Tã mẽ kot mẽkarõmnuti hkõt kãm tanhmã amnhĩ to ho mẽ pa xwÿnhjaja koja Tirtũm ma amnhĩ nê kuwy hwÿr mẽ rênh pa. Nê mẽhtykja o hapêx nhũm mẽhõ axte htyk kêt kumrêx. Jakamã koja Jejus Kris mẽmoj punuj piitã ho hapêx nê Mëpahpãm Tirtũm nhĩhkram akupÿm mẽmoj piitã haxàr pa. Tirtũm jamaxpêr xà hkõt ã mẽmoj to anhÿr par anê hãmri nê ìhkram mẽmoj jaxàr pa. Nê mãânên tãm kãm amnhĩ gõ. Jakamã nhũm Tirtũm tapxipix mẽmoj piitã ho amnhĩptàr pa.

**Mẽ htyk xwÿnhjê jarênh**

29Nê na hte mẽ pahkwÿjaja kormã kêp Tirtũm kra hkêt tã Jejus kôt mẽ kot amnhĩ xunhwÿr nê mẽ htyk xwÿnhjê mã hamaxpêr o pa. Hãmri nê mẽ kãm nhÿrmã axte mẽ omunh prãm xàj mẽ uràk nê Jejus kôt amnhĩ xunhwÿ nhũm mẽ hkrã kumrã. Tã akupÿm mẽ htĩr kêt ronhÿx mẽ ãm ã pajamaxpêr anhÿr kaprÿ. 30Nê paa. Na pa hte ma mẽ kãm Tirtũm kapêr jarênh o ri mẽ hkõt ixpa. Nhũm mẽ hkwÿjaja ja hã inhma nê ixkamã gryk nê ixtã amÿnê pa mẽ mÿrapê ixpunuj nê ri ixpa. No ãm amnhĩ to htÿx nê arĩ ri mẽ kãm Kris kapêr jarênh o ri mẽ hkõt ixpa. Tã kêp ãm nhÿrmã akupÿm ixtĩr mã kêt ronhÿx pa tee ri ã amnhĩ nhĩpêx anhÿr o ri ixpa kaprÿ. 31Na htem apkati mẽ ixtã tanhmã ãnnên to ho ri pa. ãm hãmri na pa mẽ amã ã mẽ harênh anê. Nom na pa hte tee ri amnhĩ kukamã ijamaxpêr o ri ixkaprĩ nê ixpa hkêt nê. Mẽ kot ixpĩr mã tã pa hte mẽ ate Pahihti Jejus Kris kôt amnhĩ nhĩpêx mex ã mẽ apumunh kôt ixkĩnh nê ri ixpa. Nhũm te ixkamã mẽmoj kêt pyràk pa hte ri ixpa. 32Na pa hte jar Epes kamã mẽ oprê xwÿnhjê kutã amnhĩ to htÿx pê mẽ kãm Jejus kapêr jarênh o ri mẽ hkõt ixpa nhũm mẽ kãm mar prãm kêt jakamã hã ixtomnuj tÿx nê. No nhÿrmã ixyk nê akupÿm ixtĩr mã kêt ronhÿx pa mẽ kêp Kris kwÿ hkêt xwÿnhjê jamaxpêr o ijamaxpêr nê mẽ uràk nê ijamaxpêr o:

Ixe ixyk ã arĩgro pumunh kêt jakamã kot paj mãmrĩ mẽmoj piitã hkur o ri ixpa.

Nē māmri mēmoj piitā ho ixkōm o ri ixpa.

Nē māmri mēmoj piitā ri tanhmā ho ho ri ixpa.

Ixyk nē axte ixte ā amnhī nhīpêx anhÿr o ixpare kaxyw ā.

Anhÿr o nhÿx pa ijamaxpēr o ixpa. Kêp ām Tirtūm kot akupÿm mē pahto mē pahÿr mā kêt ronhÿx pu mē ā mē kêp Kris kwÿ hkêt xwÿnhjê jamaxpēr anhÿrja kôt pajamaxpēr pix o ri papa. No ām ja kot anhÿr kêt.

33Na htem mēmoj jarēnh o:

—Mē kot htÿx ri amnhī tomnuj xwÿnhjê hkôt ri mē pa xwÿnhjaja koja mē gaa nē mē kot amnhī nhīpêx kôt amnhī nhīpêx o ri pa. Anē.

Ām hāmri na ā mē harēnh anhÿrja. Jakamā kwa mē okora. Kêr ka mē ā amnhī nē mē kot amnhī nhīpêx anhÿr o mē pa xwÿnhjê pumunh mex o ri apa. 34Kwa mē tokyx mē ate tanhmā amnhī tomnuj to hā amnhī pumu nē axte ā amnhī nhīpêx anhÿr kêt nē. Nē mē ate Tirtūm kot akupÿm mē ho htÿr kêt ā harēnh xwÿnhjaja. Te mē ate Tirtūm kot amnhī nhīpêx ā omunh kêt pyrāk. Tā mē ate tokyx ja hā amnhī pumunh nē amnhī kamā apijaàm kaxyw na pa ā mē amā ixkapēr anē.

### Mē panhī nyw jarēnh

*Rukre 20.34-36; Rōmān 8.10-11; Sikūn Korit 5.1; Pīripōs 3.20-21*

35Nē mān ka mē atō akupÿm mē htÿr ā mē harēnh ma nē tee ri mē hkukamā ajamaxpēr nē hā ri tanhmā axpēn kukjêr to nē axpēn mā:

—Kwa tanhmā koja we Tirtūm akupÿm hkra htyk xwÿnhjê ho htÿr to? Ra mē htyk nē mē ĩ katōk nē hapêx par mā kēnā. Tanhmā kot wem amnhī to nē akupÿm htÿr? Nē tanhmā koja we mē ĩ nywja kute wehe? Anē.

36Nā na ka mē atÿx ri ā ajamaxpēr anē nē tee ri mē hkukamā ajamaxpēr. E kot paj ixprī hā ja hā ejêp jarē ka mē inhma. Nā na htem mēmo y hkre. Te mē kot mē htyk jaxār pyrāk o hipêx nē hkre nhūm hikwÿ nē gaa nē higrōt hapōj. Nom te kêp mēmo yta pyrāk kêt. 37Ām hy pix na htem hkre. No higrōt kre hkêt nē. Rÿ tanhmān pār nywja kre hkêt nē. Ām hy pix na htem hkre. Tā nhūm higrōt hapōj nē hprêk nē gaa nē ô. 38Tirtūm na hte hamaxpēr xā hkôt tanhmā ho nhūm higrōt hapōj nē hprêk nē ô. Tā ja pyrā nē kot puj mē Tirtūm jamaxpēr xā hkôt pahtyk tā koja akupÿm mē pahto mē pahÿr nē mē pamā mē panhī nyw gō.

39Nē mēmo hy piitā te kot axpēn pyrāk kêt. Ahpÿnhā na. Ja pyrā nē ahpÿnhā ri mēmoj piitā ĩ. Na axtem mē panhī nē axtem mry nhī nē axtem àk nhī nē axtem tep nhī. Mēmoj piitā ahpÿnhā ri ĩ.

40-41Nē kaxkwa kamā haxwÿja mēmoj piitā ahpÿnhā no ām muxre. Myytija mex. Nē mytwrÿreja axte mā no ām haxwÿja mex. Nē kanhêti haxwÿja mex. Haxwÿja axte mā. Kamā hkwy hpôk kryre nē kamā hkwy hpôk rÿnhti no ām piitā mex.

Nē jar pika ja kamā haxwỳja mēmoj piitā mex. No ām te kot kaxkwa kamā mēmoj jarir xwỳnhja mex pyrāk kêt. Axtem na raa.

42Tā koja mē panhĩ nywja haxwỳja axte mā. Te kot panhĩ htũm pyrāk kêt. Na htem ty nhũm mē ma mē o mra nē mē hagjê. Nhũm mē hikwỳ nē gaa nē ĩ rerek nē hapêx. Tā koja Tirtũm akupỹm tanhmā mē pahto mē pahtĩr to pu mē hpānhã pamex kumrêx. Hāmri nē axte mā mē panhĩ nyw mex o mex jakamā koja axte htyk nē ĩ rerek kêt nē.

43Na htem ty nhũm mē hagjê nhũm htyk xwỳnhhta tanhmā amnhĩ to hkêt nē amarĩ hikwỳ. Omnuj nē ĩ nhenhek nē hikwỳ. Tā koja Tirtũm akupỹm mē ho mē htĩr nē mē kām mē ĩ nyw gō nhũm mē hpānhã mex kumrêx nē hihtỳx nē Tirtũm nhõ krĩ kamā pa ho pa.

44Mē htyk nhũm mē kot mē hagjênh xwỳnhjaja na htem arĩ ĩ htũm ā hikwỳ. Ām jar pika ja pix kām ri mē papa kaxyw na mē panhĩ htũmja. No mē panhĩ nywja axtem Tirtũm nhõ krĩ kamā ri mē papa kaxyw jakamā koja mē panhĩ nywja axte mā. Tirtũm Karõ koja mē pamā kugō.

### **Mē panhĩ nyw te kot Kris nhĩ pyrāk ā harênh**

*Rukre 20.34-36*

45-46Nē Tirtũm kapêr ā kagà htũm kot Atāw jarênh kot:

Na pre Tirtũm my kot wa Atāwja nhĩpêx. Jakamā Atāw kêp pika nhõ xwỳnh na pre. Anê.

Ā Atāw jarênh kot anhỹr. Ja pyrā nē na pu htem pakatorxà nhõhy rũm pajapôj nē Atāw pyrā nē pahpê pika nhõ xwỳnh. Tā nhũm Atāwja pa nē gaa nē hpigêt nē ty. Jakamā kot puj mē urāk nē papa nē gaa nē ty. Nom nhũm Krisja Atāw kurom kêp akupỹm mē ho mē htĩr xwỳnh jakamā kot puj mē pahpê hkwỳjaja Atāw pyrā nē nhỹrmā mē pahtyk tā nhũm Kris akupỹm mē pahto mē pahtĩr. Hāmri nhũm Tirtũm Karõ mē pamā mē panhĩ nyw gō pu mē axte pahtyk kêt nē. Pānhã axte mā mē pahpê kaxkwa nhõ xwỳnh.

47Nē Atāw na pre Tirtũm pika ho hipêx nē ho htĩr nhũm ri pa. Nom Kris na pre Atāw rom kaxkwa rũm mē pahwỳr wrỳ. 48Tā mē pahpê pika nhõ xwỳnhjaja te mē pahpê Tirtũm kot wam my nhĩpêx xwỳnhhta pyrāk. No mē pahte kaxkwa hwỳr ma papa mā xwỳnhjaja te mē pahte kaxkwa rũm my kot mē pahwỳr wrỳk xwỳnh Krista pyrāk. 49Tā kormā mē pahpê pika nhõ xwỳnh jakamā te mē pahpê my pika ho hipêx xwỳnhhta nhĩ pyrāk. Nom kot puj mē nhỹrmā ty hāmri nē hpānhã te pahpê kaxkwa rũm my kot mē pahwỳr wrỳk xwỳnhhta nhĩ pyrāk.

### **Axte mē pahtyk kêt kumrêx ā mē pajarênh**

*Juāw 11.25; Sikũn Korit 5.4; Wam Tesarõn 4.13-18*

50Nē kot puj mē panhĩ htũm rāhã Tirtũm nhõ krĩ hwỳr paxàpir kêt nē. Panhĩ htũm na hte ty nē rerek nē hapêx. Jakamā koja Tirtũm Karõ

mě pamã mě panhĩ nyw gõ pu mẽ rĩ kormã ma õ krĩ hwỳr pajapêx pa nẽ kamã papa ho papa.

51-52E mẽ inhma. Na pre kormã Tĩrtũm mẽ amã mẽmoj to amnhĩrĩt kêt tã ra inhmã ho amnhĩrĩt. Jakamã kot paj ÿ hã mẽ amã harẽ ka mẽ inhma. Nà kot puj mẽ pahpiitã mẽ pahtyk kêt nẽ. Koja nhỹrmã Tĩrtũm kapêr o mẽ wryk xwỳnhjê hõja mẽ pamã pifti kakô. Mẽ pajaêr pê hkakô. Hãmri nhũm Tĩrtũm kra ra mẽ htyk nẽ mẽ hikwỳ xwỳnhjaja akupỹm ĩ nyw o htĩr kurê kumrêx. Nẽ kormã mẽ pahtyk kêt xwỳnhjaja kot pu mẽ mẽ pahtyk kêt ri mẽ uràk nẽ panhĩ nyw kurê kumrêx. Hãmri pu mẽ pahpiitã pahĩr o pahĩr tũm nẽ papa. 53Koja Tĩrtũm mẽ panhĩpêx o te mẽ pahte paxê htũm o papinhĩpanh nẽ hpãnhã paxê nyw jagiênh pyràk. Jao mẽ panhĩ htũm o hapêx nẽ hpãnhã mẽ pamã mẽ panhĩ nyw gõ pu mẽ axte pahtyk kêt kumrêx nẽ ri papa ho papa. 54Tĩrtũm kapêr ã kagã htũm kot ja jarênh kot:

Na ra Tĩrtũmja mẽhtyk ho hapêx pa. Anẽ.

Te ra kot ho hapêx par pyràk o ã harênh kot anhỹr. No ãm kormã. Jakamã kot puj mẽ nhỹrmã panhĩ nyw nẽ ri papa nẽ mẽ pahtõ axte pahtyk kêt kumrêx. 55Mẽ pahtykja te mẽ kot makre par nhũm axte kot mẽ hkamnhwỳr kêtja pyràk. Urà nẽ koja Tĩrtũm akupỹm mẽ pahto mẽ pahĩr pu mẽ axte pahtyk kêt nẽ. Nẽ axte ri pamã ma hkêt nẽ papa. Nẽ axte paxà hkêt nẽ. 56Tĩrtũm kapêr ã kagã htũmja ã mẽ pakukamã mẽ pajarênh kot anhỹr. Mẽ pahte amnhĩ tomnuj xwỳnh jakamã kot puj mẽ nhỹrmã ty. 57Nom nhũm Tĩrtũm àhpumunh tỳx o àhpumunh tỳx jakamã na hte Pahihti Jejus Kris kukwak ri mẽ pahte hkôt amnhĩ xunhwỳr xwỳnhjê nẽ mẽ pahte amnhĩ tomnuj rênh pa. Pu mẽ nhỹrmã mẽ pahtyk tã nhũm akupỹm mẽ pahto pahĩr.

**Mẽ pahte Jejus mã tanhmã amnhĩ nhĩpêx mex to hã mẽ pamã karõ**

*Karatas 6.9; Korosẽ 1.10*

58Jakamã e kwa Jejus kôt ixkwỳjaja. Kêr ka mẽ arĩ Pahihti Jejus kôt mãn amnhĩ xunhwỳr tỳx rãhã ho ri apa. Nẽ kapêr kôt pix mã ri amnhĩ nhĩpêx rãhã nẽ kãm tanhmã amnhĩ nhĩpêx mex to ho ri apa. Kot kaj mẽ ã amnhĩ nhĩpêx anẽ hãmri nẽ kãm tanhmã amnhĩ nhĩpêx to kaprỳ ho ri apa hkêt nẽ. ãm hãmri kãm mẽmoj to anhỹr mex rãhã ho ri apa.

**Mẽ kêp amrakati xwỳnhjê jarênh**

*Atre 11.27-30; Rõmãn 15.25-27; Sikũn Korõt 8.1-24, 9.1-5; Wam Ximotre 6.18*

**16** 1Nẽ na pa pre krĩ pê Karatas kamã tanhmã Jerujarẽ kamã Kris kwỳjê jarênh to. Ijaew kwỳ kot mẽ pahpyrà nẽ Jejus kôt amnhĩ xunhwỳr ã mẽ harẽ nẽ mẽ kêp amrakati hã mẽ harẽ hãmri nẽ mẽ kãm:

—E. Kwa kêr ka mẽ kãm mẽ akàxpore hkwỳ ho akuprõ nẽ ma mẽ hwỳr amẽ.

Anhÿr o mẽ kãm ixkapêr. Jakamã kwa kêr ka mẽ uràk nê mẽ kaxyw mẽ kãm kàxpore hkwÿ ho akuprô. 2Mê panhõ arĩgromnu pê sap ã hkwÿ ho akuprô. Kot kaj mẽ akàxpore rax japêr nê mẽ kaxyw hkwÿ ho rax nê axi. Nom kot kaj akàxpore grire japêr nê mẽ kaxyw mẽ kãm ho grire nê agõ. Kêr pa mẽmo arĩgro hã ma mẽ awÿr mõi ka mẽ ra mẽ kaxyw ho apikuprõnh rax nê.

3Nê ma mẽ kot mẽ kãm ho mõi mã xwÿnhjaja ka mẽ ixkutêp mẽ akwÿjê rê. Kêr pa põi nê mẽ omu hãmri nê mẽ kaxyw kagã nhĩpêx nê kamã mẽ harê. Nê mẽ kãm kugõ nhũm mẽ ma Jerujarê hwÿr kàxpore mẽ ro hã amnhĩ kõt o mõi nê mẽ kãm kugõ. Mẽ kot kamã harênh nê mar hãmri nê mẽ kamjaja mẽ ate mẽ kaxyw mẽ rênh ã mẽ ajarênh ma. 4Rÿ kot ka mẽ amã mẽ hkõt inhmênh prãm nê mãmri mẽ hkõt inhmê pa ma mẽ hkõt mõi.

### **Pawre kot amnhĩ kukamã amnhĩ jarênh**

*Atre 19.21-22*

5Nom kot paj tokyx mẽ awÿr inhmõi kêt nê. Kot paj ja rũm ixkato nê hpãnhã ma pika pê Masetõn wÿr mõi. Hãmri nê mẽ hkõt ixpa grire nê ma kormã mẽ awÿr Korīt wÿr mõi. 6Hãmri nê põi nê mẽ akõt ri ixpa ryy nê. Nê ixtã amgrã pixi nê hapêx nê rĩ kormã ma axte nhãm krĩ hõ hwÿr mõi. Nê inhnojarêr ka mẽ ixto Tĩrtũm wÿ nê inhmã ixàpkur xà hkwÿ gõi pa ma mẽ hwÿr pry hã hkur o mõi. 7No ixte mẽ awÿr ixpõx nê tokyx mẽ akurũm ixkator nê hpãnhã ma nhãm krĩ hõ hwÿr inhmõi na inhmã hprãm kêt. Jakamã koja Tĩrtũm kãm ja mex pa arĩ ri mẽ akõt ri ixpa hã ixtã mytwrÿ xohtõ nê tokyx ma nhãm inhmõi kêt nê. 8Kot paj kormã jar Epes kamã ri ixpa rãhã nhũm mẽ hkĩnh pê Pêtekos kato nê hapêx pa rĩ kormã ma Masetõn wÿr mõi. 9Na pa hte jar kormã mẽ kãm Jejus kapêr jarênh o ri mẽ hkõt ixpa nhũm mẽ ohtõ nê inhmar o pa. Mẽ kãm mar prãm. Tã no nhũm mẽ hkwÿjaja ohtõ nê mẽ kêp ja omnuj nê nhũm mẽ hã ixkamã gryk nê ixtomnu o pa.

### **Mẽ kot Ximotre ho mex ã mẽ harênh**

*Hapuhã Juãw 5*

10Nê kwa koja Ximotre mẽmo arĩgro hã mẽ awÿr põi ka mẽ omu nê ho mex nê. Nê mẽ amnhĩ nhõrkwÿ hwÿr awÿ kê mẽ akutã apkur o pa. Na hte ixpyrã nê Pahihti Jejus mã tanhmã amnhĩ nhĩpêx to mex o pa. 11Kormã mẽ pahkĩnhã nyw tã kêr ka mẽ tee ri ja hã omu nê ri axpẽn mã tanhmã harênh to hkêt nê. Mẽ ãm akapêr mex pix o kãm akapêr. Nê koja akupÿn nojarêr ka mẽ pry hã kãm apkur xà hkwÿ gõi kê mex pê man akupÿn ixwÿr mõi pa tokyx omu. Kot paj jar mẽ pahkwÿjê mẽ akupÿn hpõx kamã ijamak o ixpa.

12Nê na pa hte xatã jar mē pahtō Aporja ma mē awÿr mōr kaxyw mē awÿr hano. Kot jar mē pahtō hkwÿjê mē ma mē awÿr mōr kaxyw. Nom kormã. Koja xep mē jar tanhmã amnhĩ to hpa nê rĩ kormã ma mē awÿr mō.

**Kagà jatur xà kamã Pawre kot mēmoj tã karō**

*Epes 6.10-12; Sikūn Ximotre 1.7; Wam Pêtre 5.8-9*

13E kwa kêr ka mē arĩ amnhĩ wÿr Jejus kamã ajamak rãhã ho ri apa. Nê hamãr pê kutêp tãm amnhĩ nhĩpêx o ri apa. Nê amnhĩ kaxyw hkôt ajamaxpêr tÿx rãhã nê.

14Nê mē amã axpên kĩnh pê tanhmã axpên to mex to.

15Mãn ka mē ra Estepti mē hkwÿjê jarênh ma. Mē hkumrêxjaja na prem pika pê Gres kamã Kris kôt amnhĩ xunhwÿ. Tã xep mē ra Kris kôt hkwÿjê ho mex o ri mē hkôt pa. 16Kêr ka mē ã mē kot amnhĩ nhĩpêx anhÿr xwÿnhjê kapêr ma nê hkôt ri amnhĩ nhĩpêx o ri apa. Mē kot Kris mã mē ajamãr xwÿnh piitã kêr ka mē kapêr ma nê mē hkôt ri amnhĩ nhĩpêx mex nê.

17Nê ota Estepti nê Akajkre nê Putunatrete na mē ra jar pōj. Pa mē Sostenes mē wa mē omu nê wa ixkĩnh nê. Te ixte mē apumunh nê ixkĩnh tÿxta pyrãk. 18Na xep prem ma mē awÿr mō nê tanhmã mē amã kapêr to ka prem mē ama nê akĩnh nê. Tã mē ra amnê ixwÿr mō nê tanhmã inhmã kapêr mex to pa mē kuma nê ijaxwÿja ixkĩnh nê. Kwa kêr pu mē ã mē kot mē panhĩpêx anhÿr xwÿnhjê ho mex o papa.

19-20Nê ota jar pika pê As kamã Kris kôt mē pahkwÿjaja piitã mē awÿr hpêr mē. Nê Akir mē hprō Prisireja wa. Nê wa òrkwy kamã mē kot Tĩrtũm mã amnhĩ jarênh kaxyw mē pikuprõnh xwÿnh piitã mē awÿr hpêr mē.

Nê kêr ka mē nhÿri axpên pumu nê mē apê Kris kôt mē ate axpên to atō nê atōx ã axpên mã akapêr mex nê akĩnh nê.

21E kot paj kagà jatur xà kamã inhĩhkra ho mē amã amnhĩ nhĩxi nhĩpêx ka mē omu. Koja inhmã ixkapêr ã kagà xwÿnhhta ja hã kagà hkêt nê. Pa kot paj hipêx. Ixpê Pawre na pa ã amnhĩ nhĩxi nhĩpêx anê ka mē omu.

22Nê kwa kêr ka mē arĩ amã Pahihti Jejus kĩnh o ri apa. Koja mēhō kãm hkĩnh kêt hã koja Tĩrtũm ja hã homnuj tÿx kumrêx.

E “maranat.” Mē pakapêr kãm na htem maranat jarênh o: “Kwa tokyx akupÿn mē ixwÿr wrÿ Pahihti.” Anê.

23E kê Pahihti Jejus Krisja mē ato mex nê mē akutã nojarêr rãhã ho pa. 24Ixpÿrà nê mē apê Jejus Kris kwÿ jakamã na pa hte inhmã mē akĩnh nê.

Tã ãm ja pix. Ixpê Pawre na pa ã mē awÿr kagà nhĩpêx nê mēnh anê.